

Ilamachiltisli cuali Jesucristo hual quijsuiluc San Lucas

Lucas pehua quijsuiluila (quescribiruila) Teófilo

1 Lasojli Teófilo, cate m'fac lacames hual molalilijque pa quijsuilulosquiaya se lapuhualisli hual quilamachiltisquiaya quinami panujque innojen hual quinch'iac Jesucristo hual neli ticmatilo. ²Inon techlamachiltijque yehuanten hual quinqaquijsue ilajtomes hual quijsue. Huan quitajque ca inmixtololojmes len quich'iac Jesucristo quiman yuliaya pan lalticpan huan quiman uyac pin cielo (ilhuicac). Yehuanten cate hual quilamachiltitinemiloaya ilajtol Jesucristo. ³Huan nehual noje nimomachiltisli cuali mochi in hual panuc, huan noje inon hual panuc pin tonalijmes quiman ayamo lacatic Jesucristo. Pampín niqixtocaya nimitzicuiluili tehual, Teófilo, pa nimitzmachiltisquiaya sejsa ca sejsa innojen hual panujque quiman pehuac huan hual quinchij'iac pa quiman laquisac. Inon nimitzicuiluila pa ticmatisquiaya jan quinami panuc. ⁴Nicchijtica inon pa ticmatis cuali pampa unca melahuac huan neli in hual mitzmaxtijque pampa quinch'iac Jesucristo innojen.

Quilamachiltis se ilanahuatini in cielo (ilhuicac) pampa yahui lacati Juan Lacuayatequini

⁵Pa innojen tonalijmes quiman Herodes yec in hué pin lalticpan Judea,

cataya se tiopista motocaya Zacarías. Yihual yec se ca inminlanechiculisli in tiopistas hual quintocayaltiloaya quinami motocaya Abías. In Abías yulini pa yina huan imiahuimes tiopistas tequipanunijme pin tiopan hué in tonalijmes hual quinlalilinijsue. Huan Zacarías quijsue isihua motocaya Elisabet. In Elisabet, yihual noje yec imiahuil in tiopista motocani Aarón hual yec in tiopista pa yina hual ca yihual Dios quinqehualtic inmintiopistas in israelitos pin lali Israel. ⁶In omenten, Zacarías huan Elisabet, Dios quinqmitaya cuali pampa quinqetocaloaya ilajtusli huan ilajtomes Dios toTata. Amaqui huil quinqmotexpahuiliaya ca nindenno hual amo cataya cuali. ⁷Ma yojsa, amo quiman quijsue se xolol pampa amo huil quinqjsue xolomes Elisabet. Huan in omenten Zacarías huan Elisabet axcan moviejotijque.

⁸Cuaquinon se tonali, Zacarías huan ic'fan inmintiopistas inechiculisli Abías quijsue pa quichihualosquiaya inmintequipanulisli tiopistas ilaixpan Dios pin tiopan hué. ⁹Quinami quichihuanijme yehuanten in tiopistas quiman quinqequiloaya quimatilo aqui yahuiaya quich'ia se huan oc se tequipanulisli pa itiopan hué Dios, quijsue inunijme (quescribirunijme) quinami

motocaloaya moxtin in tiopistas sejse itoca pan se cuajtzindi, quinlasaje mochi innojen pan se tapalcal.

Cuaquinon quiquixtijque pin tapalcal se cuajtzindi. Pa in tonali, quiquixtije inon capa quiqcuilujque quinami itocaya Zacarías. Yoje, in tonali quiqiaya yihual pa calaquisquiaya pin ilasojli calijtic in tiopan hué pa lapopochuisquiaya.

¹⁰Calaquic Zacarías, lapopochuiaya ca in ajuíac, huan moxtin in lacames huan sihuames cataloaya pa quiahuac in tiopan hué, quilajlantataloaya Dios.

¹¹Cuaquinon nesic se ilanahuatini toTata pin cielo (ilhuicac). Nesic capa Zacarías, moquezataya in lanahuatini pa ima cuali inon capa lapopochuilo.

¹²Quitac Zacarías in lanahuatini huan mocahuaya lachixtica, momajtic míac.

¹³Cuaquín in lanahuatini quilic:

—Amo ximomajti, Zacarías, pampa quicaquic Dios in hual ticlajlanic. Mitzlacatitilis mosihua Elisabet se xolol, huan tictocayaltis Juan. ¹⁴Tehual ticayas paquintzudo, ticpías paquilisli, huan quipiasqui paquilisli míac lacames pampa yihual lacatic.

¹⁵Huan Dios quitas in xolol quinami se lacal hué. Dios quilía pa camo quiman cunis iayo uva coc, huan nindeno hual quipía alcohol. Huan in Espíritu Santo canas in xolol quiman ayamo lacatis. ¹⁶In xolol quichías pa míac yehuanten pa Israel mocuepasqui quitequipanulisqui cuali in Tata Dios. Quincuepaltis pa quitequipanulisqui oc sejpa quinami quichihuanijme pa yina, quinami Dios quinnextilic. ¹⁷Huan Dios quitilanis in Juan moxolol hual quipixtías ilajtol Dios, quitilanis quinami quitilanic ilajtuni Elías hual yulini pa yina. Quema, Juan yes quinami Elías ca iyolo huan ilahuelilitlisli. Quinchihuilis inminyolo in tajtzitzían pa yesi jan sejpa ca mosehuilisli ca inminyolo inminxolomes. Huan

yehuanten hual aqui lacuilmatilo, yihual quinlaneltocaltis. Yojqe yahui quichijchihuilis toTata lacames hual aqui cayasqui lachijchihuali pa quinamiquisqui Dios.

¹⁸Cuaquín Zacarías quilajlanic in lanahuatini, quilic:

—¿Quinami nicmatis da in cayas jan quinami tiquijtutica? Pampa nehual nimoviejojtic huan nosihua moviejojtic.

¹⁹Ilanahuatini in cielo quinanguilic: —Nehual niGabriel, nictequipanuilía Dios. Cataya yihual hual nechtilanic pa nimitznotzas huan pa nimitzilis in cuali lamachiltisli. ²⁰Huan axcan, pampa amo tichneltocac, tía timocahua, amo huil tilajtus. Quiman lacatis moxolol, cuaquín tilajtus oc sejpa. Huan moxolol, quema, lacatis pan in tonali hual quipías pa mochías in hual nimitzilic.

²¹Huan pa quiahuac in tiopan hué yehuanten quichixtataloaya Zacarías huan moililoaya:

—¿Leca huejcajtica pa quisas pin tiopan hué?

²²Cuaquinon quisac Zacarías, huan amo huil quinnotzaya. Cuaquinon quimatiloaya yehuanten pampa yihual quitac len ilanextilisli in cielo nepa capa cataya pa icalijtic in tiopan hué. Huan Zacarías quinlaquetzilic ca imajmajuan pampa axcan mocahuac, amo huil lajtuaya.

²³Ajsic in tonali hual laquisac tequipanuc Zacarías ca ilachihualisli se tiopista pin tiopan hué, cuaquinon uyac pa ichan.

²⁴Quiman panuc inon, pehuac pilhuac Elisabet isihua Zacarías, yahuiaya quilacatilti se xolol, huan amo quisac pa icali pa macuili mesli. Quijtuaya lajtic yihual: ²⁵“Yojqe nejchihuilic in Tata, nechitac quinami nipinahuaya pampa amo nicpiaya se xolol. Axcan yajmo nipinahuas ca lacames pampa quema, nicpías se xolol.”

**Se ilanahuatini in cielo
(ilhuicac) quimachiltía
pampa lacatis Jesucristo**

²⁶Pa in mesli chucuase quiman pilhuaya Elisabet, quitilanic Dios in lanahuatini Gabriel pa se caltilan itoca Nazaret pin lalticpan Galilea.

²⁷Quitilanic pa quitas se sihual yancuic motocaya María. Yahuiaya monamicti María ca se lalac motocaya José. Yihual José yec imiahuil in hué David hual yulini pa yina. ²⁸Calaquic in lanahuatini capa María, quilic:

—Nimitzpialtía, tehual hual Dios yahui mijchihuilía len niman cuali. In Tata unca ca tehual, yahui mijchihuilía len hual unca hué. Mochi in lachihualisli hual quinchihuilía moxtin oc sequin sihuames amo quiman cataya yojque hué.

²⁹Mocahuac quiztataya María quiman quintonzac in lanahuatini, moilic laijtíc pa iyolo:

—Axcán, ¿leca yojque nechpialtitihuala in se?

³⁰Cuaquinon in ilanahuatini in cielo (ilhuicac) quilic:

—María, amo ximomajti, pampa tehual tía ticpía len niman cuali hual mitzmacas Dios. ³¹Axcán, tipilhuas huan ticpías se xolol huan tictocayaltis Jesús. ³²Yihual yes hué, quitocayaltisqui ixolol in niman hué hual chanti niman míac pa pani pin cielo. Huan Dios in Tata quimacas ilahueliltisli pa huelitis ca yehuanten pa Israel. Cayas yojque quinami quipiani in lahueliltisli pa yina in hué David hual yec itajtzin motajtzízan, yihual yulini niman pa yina. ³³Huan tehual moxolol huelitis ca yehuanten ilacames Jacobo, cate yehuanten pa Israel, huan amo quiman lamis ilahueliltisli yihual.

³⁴Cuaquinon María quilajlanic in lanahuatini, quilic:

—¿Quinami huil nechpanus inon? Pampa amo nicpía nolahuical.

³⁵Quinanquilic in lanahuatini, quilic:

—Hualas in Espíritu Santo mopán, huan ilahueliltisli yihual hual chanti niman pa pani pin cielo mitzyahualus quinami ilasehuán se mextemil. Yojque mitzhueliltis pa ticlacatiltis. Pampín, in se hual lacatis pa tehual cayas lalalili pa quichías Dios ilachihualisli niman hué, quilalilic pa cayas pa yihual pan lalticpan. Pampín, quitocayaltisqui ixolol Dios. ³⁶Huan noje Elisabet mocni pa oc se cali yahui quipía se xolol lalac, mas que axcán moviejotíc. Quema, huan axcán quipía chucuase mesli pilhuatica. Huan lacames quijtunijme yihual amo quiman yahuiaya quipía se xolol. ³⁷Ma yoje, ca Dios amo unca nindeno hual amo huil quichía.

³⁸Cuaquinon María quilic:

—Xiquita, nehual itequipanujquil in Tata. Ma nejchihuili quinami tichilic.

Cuaquinon quisac capa María ilanahuatini in cielo.

María quipaxalulía Elisabet

³⁹Pa in tonalijmes ejsehuic uyac María pa se caltilan pin lalticpan Judea, pin lali pani. ⁴⁰Calaquic pa ichan Zacarías huan quipialtic Elisabet. ⁴¹Huan yojque panuc quiman Elisabet quicaquic quipialtic María, cuaquín tzicuinic in xolol laijtíc capa iyolo Elisabet, quitemiltic Elisabet in Espíritu Santo. ⁴²Cuaquinon ca se lajtol chichahuac, quitzajtzilic:

—Dios mijchihuilic míac hual niman cuali. Yoje míac amo quiman quinchihuilic moxtin oc sequin sihuames. Huan Dios quichihuilis moxolol lachihualisli hué, hual amo quinchihuilis oc sequin, pampa quipías mochi lasojlalislis pa in lalticpan huan pin cielo. ⁴³Huan ¿len yes nechpanujtica? ¡Inantzin noTata nechpaxalulijtica! ⁴⁴Xiquita, jan

ajnxacan nimitzcaquic tinechpialtic, cuaquín tziucinic ca paquilisli in xolol laijtic capa nehual. ⁴⁵Tiyuli niman ca paquilisli pampa ticneltocac in hual mitzilic in Tata, huan yahui mochía in lajtol hual quijtuc.

⁴⁶Cuaquinon María quilic:

Laijtíc capa nehual niqijitúa
lajtomes huejué pa in Tata,

⁴⁷huan quipía paquilisli noyolo
pampa Dios nechquixtía pin
polehuilisi.

⁴⁸Unca pampa Dios nechitac cuali
nehual hual itequipanujquil,
nehual hual amo nilapía.

Huan xiquita, pejtica axcan pa
mochi xixihuil, moxtin lacames
huan yehuanten hual lacatisqui
laquetzasqui hué nonahuac
nehual.

Quijtusqui pampa nehual
nicanac ilachihualisli cuali
Dios, quijtusqui quinami Dios
nechtuchíac.

⁴⁹In Dios hual quipía mochi
lahueliltisli, yihual nejchihuilic
len hué.

Huan yihual unca niman hué huan
amo quimacahuiltía pa cayas
lajllaculisli capa yihual.

Pampín tehuanten tohuían amo
huil tiajsilo ca yihual.

⁵⁰Quinmicnilía yehuanten hual
yulinijme pa yina huan
yehuanten hual yulilo axcan
huan pa mochi xixihuimes hual
ajsitihualalo.

Quema, quinmicnilía yehuanten
hual quimatilo momajtilo
ilaixpan yihual.

⁵¹Ca ilahueliltisli imajma
quinchiuac innojen hual niman
huejué: quincholultic yehuanten
hual quijtuloaya pa inminyolo
pampa yehuanten huejueyenten.

⁵²Quinquixtic lacames chijchicahuac
pa capa huelitiloaya, huan

yehuanten hual tijtipichin
quinlalic capa huil canaloaya
lasojlalisli.

⁵³Quinmacac míac yehuanten hual
quimatiloaya pampa monequi pa
Dios quinpalehuis.

Huan quincholultic iyampa yihual
amo quipixtataloaya nindeno
yehuanten hual quijtuloaya
pampa amo monequiaya pa Dios
quinpalehuisquiaya.

⁵⁴Quinpalehuía yehuanten pa
Israel, yehuanten hual cate
itequipanujquimes, quijnamiquic
quinmicnilic.

⁵⁵Quinchihuilic jan quinami
quinmilic totajtzitzían, quinami
quinmilic Abraham huan
imiahuimes pa yina huan pa
axcan huan pa quiman.

⁵⁶María mocahuac chantitaya ye
mesli ca Elisabet, cuaquinon uyac pa
ichan.

Lacati Juan Lacuayatequini

⁵⁷Cuaquinon, ajsic in tonali capa
yahuiaya quipía ixolol Elisabet
huan quilacatiltic se xolol local.

⁵⁸Quimatijque ichantinijmes
huan icnían quinami in Tata
quichihuilic len cuali niman hué.
Pampín hualajque quipaxaluilijque
yehuanten, quipilijtataloaya yihual
paquilisli. ⁵⁹Cuaquinon, panuc in
chicue tonalijmes, huan quipialoaya
pa quitequililosquiaya nadita
icuilaxli in xolol, quinami monequi
pa quichihuasqui in judíos ca
inminxolomes lacames, huan yahuiloyaya
quitocayaltilo in xolol Zacarías, yojque
quinami motocaya itajtzin. ⁶⁰Huan
inanzin Elisabet quinmilic:
—Amo tictocayaltisqui yoje,
tictocayaltisqui Juan.

⁶¹Huan quilijque:
—Amo unca se anmocnían hual
motoca yoje.

⁶² Pampín quilajlaniloaya Zacarías ca inminmajmajuan quinami yihual quinequiaya pa motocasquiaya ixolol.

⁶³ Huan Zacarías molajlanilic se amal huan quijcuiluc: “Juan itoca.” Huan moxtin mocahualoaya moiztataloaya.

⁶⁴ Cuaquinon quilapuc icamac Zacarías huan jan ajnaxcan inejnepil huil lajtuaya, pehuac quijtuc lajtomes huejué pa Dios.

⁶⁵ Huan pehualoaya momajtilo moxtin in chantinijmes. Pa mochi in lali pa pani ilomera (itepetilan) in lalticpan Judea, moxtin pehualoaya moililo inahuac in hual panuc.

⁶⁶ Huan moxtin yehuanten hual quimatijque quinami panujque innojen quijnamictiahualoaya lajtic inminyolo, quijtuloaya:

—Axan, ¿len yahui caya ca in xolol?
Pampa cataya neli Dios ilahueliltilisli cataya ca yihual.

Zacarías quijtúa lajtomes huejué pa Dios

⁶⁷ Huan in Espíritu Santo quitemiltic Zacarías itajtzin in xolol Juan, quilaquetzaltic ilajtomes in Espíritu Santo, huan quilic:

⁶⁸ Ma cayacan lajtuli lajtomes huejué pa in Tata, iDios Israel, pampa techitac pa techpalehuis huan pa laxlahuis pa tiyelosquiaya lamacahuali tehuanten ilacames.

⁶⁹ Quitilanía se hual quipía mochi lahueliltilisli pa techquixtis pin polehuilisi.

In se unca imiahuil in hué David hual yec itequipanujquil Dios.

⁷⁰ Unca jan quinami Dios lajtuc pan inminpampa ilajtunijmes hual lajtujque pa yina, yehuanten quinlalilic pa quijtuc ilajtol.

⁷¹ Quijtuc pampa in se yahuiaya techquixti pin itemajquil tomocualantinijmes huan pin ilahueliltilisli moxtin hual amo techixtocalo.

⁷² Quijtuc pampa vojque yahuiaya quinmicnili totajtzitzián.

Yoje quijnamiquic in lajtol hual quijtuc pampa yahuiaya tejchihuili yihual ihuían.

⁷³ Dios quimacac Abraham totajtzin in lajtulisli ca lajtomes hual amo quinpalas.

⁷⁴ Quimacac pa yoje techquixtisquiaya pa inminlahueliltilisli tomocualantinijmes.

Yojque yajmo ticpialosquiaya pa timomajtilosquiaya inminpampa yehuanten.

⁷⁵ Quimacac in lajtol hual techilía quinami yahuiaya tejchihuili pa huil tictequipanuililosquiaya Dios ca toyolo lachipahuali, pa huil ticchihualosquiaya in hual Dios quixtoca pa ticchihuasi mochi in tonalijmes hual tiyulilo.

⁷⁶ Huan tehual, noxolol, mitztocayaltisqui ilajtuni in Dios hual chanti niman pa pani pin cielo, pampa ticlaicanas in Tata pa ticchijchihuilis iojli.

⁷⁷ In quinequi quijtúa tehual tía tiquinlamachiltía ilacames Dios quinami Dios yahui quinquixtía pin polehuilisi.

Huan yoje quinquixtía, cayas pampa quinquipuhuilía inminlajlaculisli.

⁷⁸ In unca pampa toDios quixtoca laicnília.

Pampín Dios techita capa unca pa niman pani pin cielo, unca quinami ilaixpelalisli in huajtzinquito.

⁷⁹ Techixpela tehuanten hual ticate pin laticumac, tehuanten hual tichantilo capa unca quinami ilaticumactilisli in miqulisli, quinequi quijtúa, capa tiyulilo timomajtiticate pampa timiquisi. Axcan huil tilachialo cuali pa in ojli hual techhuicas capa ticayasi jan

yoje ca Dios ca ilaijnamiqulislisli huan imosehuilislisli pa toyolo.

Ticpiasqui mochi hual unca cuali pa tehuanten, mochi hual Dios quipía pa tehuanten huan quinequi techmaca.

Techixpela pa techmelahuilislis tocxihuajmes pan in ojli capa ticayasi jan yojque tilaijnamiccate quinami Dios huan capa ticayasi ticpixticate imosehuilislisli pa toyolo.

Umpa laquisac lajtuc Zacarías.

⁸⁰Huan moscaltitiyahuiaya in xolol, cantiyahuiaya chicalualislisli pa iyolo huan chantiaya capa amaqui oc se chantiaya. Panuje xixihuimes huan cuaquinon ajsic in tonali quiman Dios quitilanic pa quinnotzasquiaya quinmilijtataya yehuanten pa Israel ilajtol Dios.

Lacati Jesucristo

(Mt. 1:18-25)

2 Cataya pa innojen tonalijmes in hué niman hué hual motocaya César Agosto quichihualjchihuac se lajtol pa quichihualosquiaya se ilapuhualislisli moxtin hual umpa chantiloaya pa mochi in lali. ²In lapuhualislisli quichihuajque pa innojen tonalijmes hual Quirinio yec huelitini (gobernador) pin lali itoca Siria. In lapuhualislisli cataya in calica yahuiloaya quipehualtilo ilapixcalislisli tomin pa in hueyenten hual huelitiloaya. ³Huan yahuiloaya moxtin pa cayalosquiaya lasaluli pa in lasalulislisli. Mochi sejsé uyac pa in caltilan capa moxtin itajtzitzián lacatijque huan yulinijme. ⁴Huan José noje uyac pa inmicaltilan itajtzitzián hual cataya pin ilomera (itepetilan) in lalticpan Judea. Quisac pin caltilan tipichin Nazaret pin lalticpan Galilea, huan panquisac pa Judea pa icaltilan tipichin David, in caltilan itoca Belén. José yec imiahuil

David, pampín uyac pa Belén. ⁵Huan lamiaya monamicti ca María hual pilhuatataya, amo huejcahuasquiaya pa lacatis ixolol. Huan José uyaje pa yesi lasaluli pin lasalulislisli. ⁶Cataloaya pa Belén, huan ajsic in tonali pa lacatis ixolol María. ⁷Huan lacatic pan yihual se xolol lacal, ca yihual quipehualtic in xolomes hual quilacatiltic María. Quiliaruc ca se tzotzomajli huan quitechac pan se sacalera lanechiculi lajitic se lacomultic capa lacualoaya in burros. Yojque quichíac María pampa amo cataya capa huil mosehuilosquiaya pin cali.

Ilanahuatini in cielo quinlamachiltía yehuanten hual quinmiztataloaya inminborregos

⁸Huan cataloaya lacames hual quinmiztataloaya inminborregos pa layúa pin ixlahuitos itejtenco Belén. ⁹Huan nestiquisac inminlaixpan yehuanten ilanahuatini in Tata, quisac pin cielo (ilhuicac). Huan laixpelatiquisac ilaixpelatislisli chicalhuac in Tata quinyahualujtataya, huan momajmajtjque míac. ¹⁰Huan in lanahuatini quinmilic:

—Amo ximomajtican. Xiquitacan, nehual nihuala pa annimitzlamachiltis se lamachiltislisli cuali hual anmitzmacas míac paquilislisli, huan in lamachiltislisli cayas pa moxtin.

¹¹Axcán anmitzlacatilitic axcán se hual anmitzquixtis pin polehuilislisli. Unca CRISTO in Tata, lacatic pa icaltilan David. ¹²Axcán annimitzilía quinami anquitas. Anquitemus huan anquitas se xolol iliarujtica ca se tzotzomajli huan lastica pan se sacalera pan se lacomultic calijtic capa lacualo in burros.

¹³Jan ajnaxcán ca in lanahuatini nestiquisajque míac oc sequin ilanahuatinijmes in cielo, quijtutataloaya lajtomes huejué pa Dios, quijtuje:

¹⁴ iXiquijtucan lajtomes huejué huan cuajcualtichin pa Dios hual chanti niman pa pani pin cielos, huan pan in lalticpan ma yulican ca mosehuilisli quipixticate in hual Dios quinmacasquiaya yehuanten hual yihual quinpilía paquilisli!

¹⁵ Cuaquín in lanahuatinijmes quincahuajque innojen lacames hual quinmitaloaya inminborregos, uyaje pin cielo. Huan moilijque in lacames se ca oc se, quilijque:

—Ma tiacan pa Belén pa tiquitasqui in hual axcan panuc, hual in Tata techlamachiltic.

¹⁶ Cuaquín uyaje ejsejtataloaya, latemujque huan quinmitajque María huan José huan in xolol lastataya pan se sacalera capa lacuanijme in burros. ¹⁷ Quinmitajque in yeyenten, quinlamachiltijque in hual ilanahuatini in cielo (ilhuicac) quinmilic inahuac in xolol. ¹⁸ Huan moxtin hual quicaquijque, mocahualoaya moiztataloaya ca lamajtilisli pampa quinmajtic inon hual quinmililoaya inminlaitanijmes in borregos. ¹⁹ Ma yoje, María cajcoquiaya mochi innojen lajitic capa iyolo, mojmosta quijnamiquiaya mochi hual panuc.

²⁰ Huan mocuepaje pa inminborregos in laitaniijmes quijutataloaya lajtomes huejué pa Dios. Quijutataloaya mochi hual cuali inahuac yihual, pampa quicaquijque huan quitajque mochi jan quinami quinmilic ilanahuatini in cielo (ilhuicac).

Quinextilo in xolol Jesús pin tiopan hué

²¹ Cuaquinon, quiman quinpiaya chicue tonaliijmes quiman lacatic Jesús, quitequilijque nadita icuilaxli huan quitocayaltijque JESÚS, quinami ilanahuatini in cielo quilic María pa quitocayaltilosquiaya pa in tonali hual

ayamo pehuaya moscalti in xolol lajitic María inantzin.

²² Ajsic in tonali hual María quiapiaya pa yes lachipahuali, quinami quijtúa ilajtol Moisés: Quijtúa pampa moxtin sihuames hual quilacatiltic se xolol quipialo pa mochipahuasi. Pampín, panquisajque pa Jerusalén itajtzitzian pa quinextilisqui in xolol Jesús ilaixpan in Tata Dios nepa pin tiopan hué. ²³ Quichihuajque inon pampa yojque unca lajcuiluli pa ilajtol in Tata: “Sinda unca lalac se xolol calica se sihual quinpehualtía ixolomes hual quinlacatiltía, cuaquín yihual unca lalalili pa yes iyaxca in Tata.”

²⁴ Huan itajtzin huan inantzin noje quilalilijque Dios in huendi pa María ilachipahuahualisli, quinami quijtúa ilajtol in Tata: In huendi yes ome huilomes o ome pichones sejselic.

²⁵ Huan xiquitacan. Cataya se lalac pa Jerusalén itocaya Simeón, yihual se lalac cuali, quilasojlaya in Tata huan cataya in Espíritu Santo lajitic capa yihual iyolo. Axcan quiapiaya míac yihual mochixtataya pa quiman yahuiaya ajsi in Cristo hual Dios yahuiaya quitilani pa quinquixtisquiaya yehuanten pa Israel pin polehuilisli. ²⁶ Huan in Espíritu Santo quilamachiltic Simeón pampa yahuiaya quita in Tata Dios iCristo hual in Tata Dios quilalilic pa hualasquiaya pa in lalticpan. Quilic pampa yahuiaya quita iCristo huan amo miquisquiaya sinda ayamo quitac. ²⁷ Huan in Espíritu Santo quichihuilic Simeón pa quimatis pa iyolo pampa monequiaya pa yas pa in tiopan hué. Huan nepa ajsije José huan María pa quichihuililosquiaya ca in xolol Jesús quinami in lajtol quijtuc pa quichihuililosquiaya yihual. ²⁸ Cuaquinon Simeón canac huan quimacuic in xolol, quijtuc lajtomes huejué pa Dios huan quilic:

²⁹ Axcan, Tata Hué, xinechtilani pa nimiquis ca paquilisli quinami tinechilic.

³⁰ Axcan niqitac ca noixtololojmes yihual hual tictilanic pa techquixtilis in miqulislisli.

³¹ Ticchijchíac inminlaixpan moxtin pa Israel.

³² Yihual yes quinami lahuilislis pa mitznexstis tehual, Dios, ca yehuanten hual amo lacatijque israelitos, pa mitziximatisqui yehuanten.

Huan yes quinami laixpelalislis chicahuac pa quinnexstilis yehuanten pa mochi in lalticpan in míac lachihualislis cuali, hual tehual, Dios, tiquinchihuilic in israelitos hual moyaxca yehuanten.

Yojque quijtuc Simeón. ³³Huan itajtzin huan inantzin in xolol Jesús mocahualoaya moizticate pampa quijtuya Simeón innojen lajtomes inahuac in xolol Jesús. ³⁴Cuaquinon quinlaquetzilizic cuali Simeón, quintuchihuaya, huan yihual quilic inantzin María, quilic:

—Xiquita. In xolol Dios quilalía ca tehuanten pa Israel huan yihual quinchihuilic pa míac ca yehuanten miquisqui amo lachipahuali ipampa inminlajlaculislis, huan míac yesi laquixtili pin ipolehuilislis inminlajlaculislis.

Noje Simeón quilic:

—Yihual in xolol yes se hual míac amo quinequisqui quineltocasqui pampa Dios quitilanic. Pampa inon, amo quinequisqui quineltocasqui inon hual quinmilis. ³⁵Yojque momatis quinami yehuanten laijnamiqilo lajtic inminyolo. Huan tehual, María, yahui mitzcocúa moyolo pampa panus mochi inon.

³⁶Nepa noje cataya Ana, ixolol sihual Fanuel. Yihual Fanuel imiahuil se hual

motocaya Aser. In Aser yulini pa yina, yihual yec se ca Israel ixolomes hual imiahuimes huan inminmiahuimes in oc sequin ixolomes Israel mochihuaje yehuanten ilacames Israel, yehuanten in judíos. Huan in sihual Ana yec se ilajtuni Dios, cataya niman ilamantzita. ³⁷Huan ilahuical chantije chicome xixihuil, cuaquín ilahuical polehuic. Huan mocahuac Ana ihuían pa nahuipuhualihuanahui (ochentaicuatro) xixihuil. In Ana mojmosta pa semilhuil cataya pin tiopan hué, amo quiman quisac huejca nepa, mosajtataya míac huan quilajlaniaya Dios mochi tonali, quimolancuacuetzilizic yihualitonali, pa semilhuil huan pa layúa. ³⁸Huan lamic laquetzac Simeón, jan ajnaxcan hualac capa yehuanten Ana, quisehuiaya Dios quijtutataya lajtomes huejué huan cuajcualtichin pa yihual, quinlaquetziliaya inahuac in xolol, quinlaquetziliaya moxtin hual quichixtataloaya in tonali hual Dios yahuiaya quilaxlahui inminlamacahualislis yehuanten in israelitos.

Mocuepalo pa Nazaret

³⁹Cuaquinon laquisajque quichihuajque José huan María mochi quinami quijtúa ilajtol in Tata, mocuepaje pa in lalticpan Galilea pa Nazaret inmincali yehuanten.

⁴⁰Huan moscaltiaya in xolol Jesús, mochicahualtitiahuiaya ca míac lajmatilislis huan Dios quichihuilijtiahuiaya cuali.

In xolol Jesús pin tiopan hué

⁴¹Itajtzitzían Jesús yahuiiloaya xixixihuil pa Jerusalén pa cayalosquiaya pin fiesta (ilhuil) capa quicualo in judíos inacal borrego pa quijnamiquisqui quinami Dios quinquixtic in israelitos pin Egipto. Quinquixtic pa yina capa yehuanten

pin lali Egipto hual quinchihuaje tequipanujquimes hual amo quinlaxlahuilinijme. ⁴²Cuaquinon, quiman Jesús moscaltic huan quinpiaya doce xixihuimes, yehuanten yeyenten panquisajque pa Jerusalén pa cayalosquiaya pa in fiesta, quinami quichihuanijme mochi xixihuil. ⁴³Huan quiman laquisajque inmintonalijmes in fiesta (ilhuil), mocuepaloaya itajtzitzían. Ma yoje, mocahuac Jesús in xolol pa Jerusalén, huan amo quimatiloaya itajtzitzían. ⁴⁴Quijtuloaya pampa yihual cataya ca in oc sequin míac hualca yehuanten canaloya ojli. Yoje cataloya pan ojli se tonali huan pehuajque quitemuñque ca inmicnían huan inminchantinijmes hualca yehuanten cataloya pa ojli. ⁴⁵Huan pampa amo quitajque, mocuepajque pa Jerusalén quitemuñtíajque.

⁴⁶Cuaquinon, quiman panuje ye tonalijmes quiman mocahuac Jesús pa Jerusalén, itajtzitzían quitajque pin tiopan hué, molalijtataya lajco pa in lamaxtinijmes, quincactataya huan quinlajlantataya. ⁴⁷Huan mocahualoaya moizticate moxtin hual quicaquiloaya, mocahualoaya yoje pampa quicaquiloaya quinami yihual quimatiaya huan quinami quinnanquiliaya. ⁴⁸Huan quipolujque inminlajtol itajtzitzían nepa capa quitajque. Cuaquín inantzin quillic:
—Noxól, ðleca yoje titejchiuilic?

Xiquita. Motajtzin huan nehual timitztemujtinemiloaya, techcocojtinemiaya toyolo.

⁴⁹Huan Jesús quinmilic:

—¿Len inon?

¿Annechtemujtinemiaya? ¿Amo anquimatiaya pampa nehual nicpía pa nicayas capa cate lachihuali innojen hual cate iyaxca noTajtzin?

⁵⁰Amo quimatiloaya yehuanten len quinequiaya quijtun inon hual quinmilic. ⁵¹Cuaquín temujtíac ca

yehuanten pa Nazaret huan yihual yuliaya quinneltoatataya itajtzitzían. Ma yoje, inantzin sejpa huan oc sejpa quinmijnamictiahuiaya mochi innojen laijtuc pa iyolo.

⁵²Huan cantiyahuiaya Jesús míac lajmatilislí huan moscaltitiahuiaya hué. Huan yultiahuiaya quinami Dios quinequi huan moxtin quixtocaloaya míac.

Juan Lacuayatequini quinnojtza lacames capa amaqui chanti

(Mt. 3:1-12; Mr. 1:1-8; Jn. 1:19-28)

3 Quipiaya quince xixihuil yihual huelitijtihuiaya in hué niman hué motocaya César Tiberias pa Roma. Huan Poncio Pilato yec huelitini romano pin lalticpan Judea, Herodes huelitiaya pin lalticpan Galilea, huan icni Felipe huelitiaya pin lali capa cataloya in lalticpan Iturea huan in lalticpan Traconite. Lisanas huelitiaya pin lalticpan Abilinia. ²Anás huan Caifás yeje in tiopistas huejué. Pan in tonalijmes, Dios quitilanic Juan ixolol Zacarías pa quinnotzas in lalalera. Chantiaya Juan capa amaqui oc sequin chantiloaya. ³Yoje uyac Juan lanojnoztinemiaya pa mochi in lali itenco in atenco hué itoca Jordán, quinmilijtinemiaya yehuanten pa mopatillosquiaya inminyolo pa pehualosquiaya lajnamiquilo quinami Dios quinequi. Yoje huil cayalosquiaya lacuayatequili, yoje yelosquiaya lapujpuhuali inminlajlaculislí. ⁴Cataya quinami yec lajcuiluli pa in amal hual quijcuiluc Isaías ilajtuni Dios pa yina, quijtuc:

Mocaqui se hual tzajtzitica pin lali capa amaqui chanti, quilía:
“Xicchijchiuilican iojli in Tata, xiquinchihuacan melahuac iojlitos.

⁵Mochi lali hual unca pa temuán cayas latemiltili ca lali, huan

mochi loma (tepel) huan lomita (tepetzindi) mochihuasqui ixlán.

Ojlimes pandera mochihuasqui ojlimes mejmelahuac.

Ojlimes huajuahuastic mochihuasqui ojlimes aj'alastic.

⁶ Cuaquinon moxtin quitasqui yihual hual Dios quitilanía pa quinquixtilis ipolehuilislisliniminlajlaculislislin.

Vojque unca lajcuiluli pin iamal Isaías.

⁷ Yoje, míac quisajque pa míac caltilan pa quincuayatequis Juan nepa pa in atenco hué Jordán. Cuaquín Juan quinmilic:

—iAmhuanten quinami cuhuames hual lapajuilo! ¿Anquijtúa sinda annimitzcuayatequis, cuaquín ancayas laquixtili pin polehuilislis quiman cualani Dios? No, amo yoje. Anquipía pa anyulis anquichijtías len unca cuali, pa yoje anquinnextilis Dios huan lacames pampa ca melahualislis anquipalac anmoyolo pa anpehuas anlajnamiquis quinami Dios quinequi. ⁸ Huan amo xipehuacan ximoilican lajitic pa anmoyolo pampa amhuanten anunca imiahuimes Abraham totajtzn huan pampín Dios amo anmitztojtocas ilaixpan yihual. Nehual annimitzilía pampa Dios huil quinchía lacames ca in tixcalimes nican hual yelosquiaya imiahuimes Abraham. ⁹ Axcán unca lalalili Dios pa anmijxitinis anmonapatilislis. Unca quinami se hacha hual quilalilo pa ilalhuayol se cuahuil. Sinda amo quipía laquilyo cuali in cuahuil, cuaquín quimayahuisqui huan quilasasqui pin tixuxli. Huan jan yoje sinda amo quipala iyolo se pa laijnamiquis quinami Dios quinequi, cuaquín Dios quichihuilislis quinami quichihuililo in cuahuil hual amo quipía laquilyo cuali.

¹⁰ Huan quilajlanijque Juan innojen míac lacames, quilije:

—¿Len ticchihuasqui tehuanten?

¹¹ Quinnanquilic Juan:

—Sinda se quipía ome cotones, ma quimaca se pa yihual hual amo quipía se cotón. Huan sinda se quipía len quicua hual mocajtica, ma quimaca yihual hual mayana.

¹² Hualajque noje lacames hual canaloaya ilapixcalislis in tomin pa in hueyenten romanos. Hualajque pa yelosquiaya lacuayatequili, quilajlanijque:

—Lamaxtini, ¿len ticchihuasqui pa tilanextilisqui pampa ticpalaje toyolo pa tipehuasi tilajnamiquisqui quinami Dios quinequi?

¹³ Juan quinmilic:

—Jan xicpixcacan in tomin san hual anmitztlalililo yehuanten hual huelitilo.

¹⁴ Noje quilajlanije in guaches hual quinlaquehuajque in lacames hual huelitiloaya, quilije:

—¿Len ticchihuasqui tehuanten noje?

Huan quinmilic:

—Amo xijquixtilican nindeno amaqi, amo pan ipampa quinami anquinmacajsía ca in lacocoltislis hual huil anquinchihuilía sinda amo quichihualo quinami anquinequi. Huan amo xiquinmacajsican pan ipampa quinami cuajnesi anquinmotexpahuilía inahuac len amo quichihuaje. Huan ximopaquiltican san ca in hual anmitztlaxlahuilo anmotecojuan.

¹⁵ Quijtuloaya moxtin yehuanten pampa Dios yahuiaya quitilani iCristo huan pampín quichialoaya. Quinequiloaya quimatilo da cuajnesi yesquiaya Juan in Cristo, pampa quijnamictinemiloaya lajitic pa inminyolo mochi hual quitaje hual quichihuaya Juan. ¹⁶ Huan Juan quinnanquilic moxtin, quinmilic:

—Nehual annimitzcuayatequía ca al. Ma yoje, hualas se hual quipía niman míac lahueliltilislis hual nel amo nicpía. Huan nehual amo nimonotza pa yes noyaxca pa nictomilislis ilailpili

ilacsames pa icxihuajmes. Yihual anmitzcuayatequis ca in Espíritu Santo, unca quinami tixuxli hual lachipahua.

¹⁷Huan yihual quinxilus yehuanten hual quineltocalo Dios pa camo cayasi ca yehuanten hual amo quineltocalo. Yes quinami yihual quipiasquiaya se latzejtzemeloni pa imajma calica quichipahuililo in trigo pa quisas in xiníful. Quimontus in trigo pa capa cajcoquilo huan in xiníful quilasas huan quichichinus pin tixuxli hual amo quiman sehuis.

¹⁸Joyque Juan quinnoztinemiaya yehuanten pa quinmilisquiaya len quipialoaya pa quichihualosquiaya. Yihual quinlaquetziliztinemiaya míc huan ca oc sequin lajtomes pa quinchicahualtisquiaya yehuanten. Joyque quinlaquetziliaya in lacames ca in lamachiltilisli cuali.

¹⁹Huan Herodes in hué cualanic ca Juan. Cataya pampa Juan cajuac inminlaixpan moxtin in lacames, cajuac pampa Herodes canac Herodías. In Herodías yec isihua Felipe huan Felipe yec icni Herodes in hué. Juan noje cajuac Herodes pampa quinchihuaya míc oc sequin lachihualisli amo cuajcuali.

²⁰Cuaquinon mocuepac quichíac Herodes oc se lachihualisli amo cuali. Latilanic pa quitzacualosquiaya Juan pin calijtic.

Jesús unca lacuayatequili

(Mt. 3:13-17; Mr. 1:9-11)

²¹Ayamo latilanic pa quitzacualosquiaya Juan pin calijtic, huan pampín, Juan ayamo mocaahuaya pa quincuayatequisquiaya lacames. Juan noje quicuayatequic Jesús. Quiman laquisac cayac lacuayatequili, yihual Jesús quilajlantataya Dios, huan molapuc in cielo (ilhuicac).

²²Temujthualac in Espíritu Santo nestihualaya quinami se huilol.

Moquetzac ipan capa yihual, huan quicaquiloaya moxtin se lajtol pin cielo (ilhuicac), quijtuc:

—Tehual noxolol hual nimitzlasojla, ca tehual nicpía míc paquilisli.

Nican lanextía quinami Jesús unca imiahuil Dios

(Mt. 1:1-17)

²³Jesús axcan moscaltic huan pehuaya quinpía quinami treinta xixihuil. Moxtin quijtujque pampa yihual yec ixolol José. ²⁴Huan José yec ixolol Elí. Elí yec ixolol Matat, Matat yec ixolol Leví, Leví yec ixolol Melqui, Melqui yec ixolol Jana, Jana yec ixolol José. ²⁵José yec ixolol Matatías, Matatías yec ixolol Amós, Amós yec ixolol Nahum, Nahum yec ixolol Esli, Esli yec ixolol Nagai. ²⁶Nagai yec ixolol Maat, Maat yec ixolol Matatías, Matatías yec ixolol Semei, Semei yec ixolol José, José yec ixolol Judá. ²⁷Judá yec ixolol Joana, Joana yec ixolol Resa, Resa yec ixolol Zorobabel, Zorobabel yec ixolol Salatiel, Salatiel yec ixolol Neri. ²⁸Neri yec ixolol Melqui, Melqui yec ixolol Adí, Adí yec ixolol Cosam, Cosam yec ixolol Elmodam, Elmodam yec ixolol Er. ²⁹Er yec ixolol Josué, Josué yec ixolol Eliezer, Eliezer yec ixolol Jorim, Jorim yec ixolol Matat, Matat yec ixolol Leví. ³⁰Leví yec ixolol Simeon, Simeon yec ixolol Judá, Judá yec ixolol José, José yec ixolol Jonán, Jonán yec ixolol Eliaquim. ³¹Eliaquim yec ixolol Melea, Melea yec ixolol Mainán, Mainán yec ixolol Matata, Matata yec ixolol Natán, Natán yec ixolol David. ³²David yec ixolol Isái, Isái yec ixolol Obed, Obed yec ixolol Booz, Booz yec ixolol Salmon, Salmon yec ixolol Naasón. ³³Naasón yec ixolol Aminadab, Aminadab yec ixolol Aram, Aram yec ixolol Esrom, Esrom yec ixolol Fares, Fares yec ixolol Judá, Judá yec ixolol Jacob. ³⁴Jacob yec

ixolol Isaac, Isaac yec ixolol Abraham, Abraham yec ixolol Taré, Taré yec ixolol Nacor. ³⁵Nacor yec ixolol Serug, Serug yec ixolol Ragau, Ragau yec ixolol Peleg, Peleg yec ixolol Heber, Heber yec ixolol Sala. ³⁶Sala yec ixolol Cainán Cainán yec ixolol Arfacsad, Arfacsad yec ixolol Sem, Sem yec ixolol Noé, Noé yec ixolol Lamec. ³⁷Lamec yec ixolol Matusalén, Matusalén yec ixolol Enoc, Enoc yec ixolol Jared, Jared yec ixolol Mahalaleel, Mahalaleel yec ixolol Cainán. ³⁸Cainán yec ixolol Enos, Enos yec ixolol Set, Set yec ixolol Adán, Adán yec ixolol Dios.

Satanás quitilanilía Jesús iyolo

(Mt. 4:1-11; Mr. 1:12-13)

4 Huan in Espíritu Santo quinejnemiltiaya Jesús nepa quiman quisac pin atenco hué Jordán pa mocuepasquiaya, huan quitilanic capa amaqui chantiaya. ²Nepa in lili quitilanic iyolo pa quichihuasquiaya len Dios amo quinequi, quitilaniliaya iyolo pa ompuhuali (cuarenta) tonalijmes. In tonalijmes amo quicuaya Jesús nindeno, huan quiman panuje in tonalijmes, yihual mayanaya. ³Cuaquín in lili quilic:

—Sinda tehual tiunca ixolol Dios, axan xiquili in tixcalimes pa mochihuasi len tijcuas.

⁴Cuaquinon quinanquilic Jesús, quilic:

—Yojque unca lajcuiluli pa ilajtol Dios, quijtúa: “Amo yulis se pan ipampa len quicua san, pampa in hual quicua se amo quichihuilía nindeno pa yulis se iyolo. No, se lalac yulis pan ipampa mochi lajtol hual Dios quijtúa.”

⁵Cuaquinon in lili quihuicac Jesús pa pani huan quinextilic ca jan se nadita san mochi in lalimes pin lalticpan ca inminlacialera huan inmintomin. ⁶Huan in lili quilic:

—Tehual nimitzmacas mochi inon pa tiquinchiuilis quinami tehual ticnequis tiquinchiuilis, huan ticpías mochi len cuali hual moitas pa yehuanten. Huil nimitzmaca inon pampa unca noyaxca pa nicmacas aqui yes nicnequis nicmacas. ⁷Huan nimitzmacas mochi inon sinda tehual tinechmolancuacuetzilis.

⁸Huan Jesús quinanquilic:

—Yojque unca lajcuiluli, quijtúa: “Ticolancuacuetzilis jan in Tata moDios san, huan jan yihual san tictequipanuilis.”

⁹Cuaquinon in lili quihuicac Jesús pa Jerusalén huan quilalic pa pani pin tiopan hué huan quilic:

—Sinda tehual tiunca Dios ixolol, ximolasa nican pan lali pa latzindan, ¹⁰pampa yojque unca lajcuiluli ilajtol Dios, quijtúa:

Dios quintilanic ilanahuatinijmes pin cielo pa mitziztiasi cuali.

¹¹Ca inminmajmajuan mitzajcoquisi pa camo timotecuas pan len tixcali mocxían.

¹²Huan quinanquilic Jesús, quilic:

—Huan yojque unca lajtuli: “Amo timolalis ca cuajnesi tipolehuis jan pa yoje ticmatis sinda in Tata moDios mitzquixtis pin polehuilislí.”

¹³Cuaquinon in lili lamac quitilanic Jesús iyolo, mijcuanic nepa capa Jesús, yahuiaya quichía pa se tonali quiman huil quitilanilisqueiaya iyolo oc sejpa.

Jesús pehua itequipanulisi pa Galilea

(Mt. 4:12-17; Mr. 1:14-15)

¹⁴Cuaquinon mocuepac Jesús pa in lalticpan Galilea, quixixtataya ilahueliltitilisi in Espiritu Santo. Huan momachiltijque pampa yihual panujtataya cajcapa pa mochi itenco in lali capa yes nejntinemiaya. ¹⁵Yihual lamaxtitinemiaya pa

mochi inmintiopajmes, huan moxtin quijtuloaya lajtomes huejué pa yihual.

Jesús pa Nazaret

(Mt. 13:53-58; Mr. 6:1-6)

¹⁶Huan uyac Jesús pa Nazaret capa itajtzitzían quiscaltijque, calaquic pa inmintiopan quinami quichihuaya pan mochi in tonalijmes hual mosehuilo in judíos huan yalo pa tiopan. Huan nepa Jesús moquetzac pa momaxtis.

¹⁷Quimacajque in amal hual quipía lajitic len quijcuiluc pa yina Isaías ilajtuni Dios. Quilapuc Jesús in amal, quitac capa yec lajcuiluli yojque:

¹⁸In Tata iEspiritu unca ca nehual pampa nechlalic yihual pa niquinmilis lamachiltisli cuali yehuanten hual quimatilo pampa monequi pa Dios quinpalehuis.

Nechtilanic pa niqinnahuatis pampa cate lamacahuali yehuanten hual Satanás quinpía lailpili.

Nechtilanic pa niqinnahuatis in pachacames pampa yalo lachialo oc sepa.

Nechtilanic pa niquinmacahuas yehuanten hual inminlajlaculisli quinxacualuilijque inminyolo, nechtilanic pa yojque yesi lachijchihuali yancuic.

¹⁹Nechtilanic pa nilanahuatis pa quimatisqui pampa axcan in xihuil unca quiman Dios ca mías paquilisli quinequi quinchihuilía moxtin ilachihualisli cuali niman hué hual san yihual huil quinchihuilía.

²⁰Cuaquinon quitzacuac Jesús in amal, quimacac in se hual cajcoquiaya in amal, cuaquinon molalic, huan mocahuajque quiztataloaya moxtin hual cataloaya pin tiopan calijtic. ²¹Cuaquinon pehuac quinlaquetzitic Jesús, quinmilic:

—Axcan lamic mochíac in lajcuilulisli hual anquicaquic nimomaxtic.

²²Huan moxtin quijtuloaya neli pampa cataloaya cuali ilajtomes, mocahualoaya moiztataloaya pampa quinlaquetzilijtataya in lajtomes. Cuaquinon pehualoaya quijtulo: —¿Amo in se ixolol José?

²³Cuaquinon Jesús quinmilic: —Neli amhuanten annehilis in lajtol hual quijtulo mías, annehilis: “Lapajtini, ximopajti tehual.” Huan annehilis: “Ticmatijque in hual ticchíac pin caltilan Capernaúm. Axan xicchía jan yoje nican pa mocaltilan capa timoscaltic.” Yoje annehilis.

²⁴Huan quinmilic: —Annimitzilía neli pampa yehuanten pin caltilan capa moscaltic se ilajtuni Dios amo quineltocalo in lajtuni sinda yihual quinmilía ilajtol Dios.

²⁵Huan annimitzilía len melahuac: Cataloaya pin lali Israel mías sihuames inminhuán nepa capa yulini Elías ilajtuni Dios, cataya pin tonalijmes hual amo quiahuiaya pa ye xixihuil huan lajco. Huan cataya se mayandi pa mochi in lali. ²⁶Ma yoje, Dios amo quitilanic Elías pa se ca innojen sihuames inminhuán pin lali Israel. Jan quitilanic pa se sihual ihuán hual amo yulini nican. Quitilanic pa se hual chantiaya pin caltilan tipichin itoca Sarepta, umpa amo huejca cataya in caltilan hué Sidón. ²⁷Huan cataloaya mías lacames pin lali Israel hual mococuloaya ca in cocolisli lepra pin tonalijmes quiman yulini Eliseo ilajtuni Dios. Ma yoje, Eliseo amo quipajtic se ca yehuanten. San quipajtic in lalal itocaya Naamán, yihual yulini pin lali Siria.

²⁸Pampín cualanije mías moxtin pa in tiopan pampa quinmilic Jesús innojen lajtomes. ²⁹Moquetziquisajque, quiquixtijque Jesús pa quiahuac in caltilan, quihuicajque pa itenco in loma (tepel) capa cataya in caltilan. Yahuiloyaya quilasalo pa in cuajtic nepa

pa miquisquiaya. ³⁰Ma yoje, yihual panuc lajco capa yehuanten huan uyac.

Jesús quipajtía se lalcal hual quipía ijyecal amo cuali

(Mr. 1:21-28)

³¹Cuaquinon temuc pa Capernaum, se caltilan pin lalticpan Galilea, nepa lamaxtiaya mochi in tonalijmes hual mosehuilo in judíos. ³²Mocahualoaya moiztataloaya míac pampa ilajtomes hual quinmaxtiaya yehuanten quipialoaya ilahueliltilisli Dios. ³³Huan pin tiopan cataya se lalcal quipiaya se ijyecal amo cuali huan catzahuac, huan quitzajtzilic ca lajtol chicahuac, quilic:

³⁴—¡Ah tel! ¿Len ticpía ca tehuanten, Jesús in nazareteco? ¿Tihualaya pa titechlamisquiaya? Nicmati aqui tiunca tehual, tiunca in lalcal lajtultili hual Dios quitilanic pa in lalticpan.

³⁵Jesús cajuac, quilic:

—Amo xinahuati huan xiquisa pa quiahuac yihual.

Jan axcan in ijyecal amo cuali quilasac in lalcal lajco capa yehuanten, quisac pa yihual, amo quicocoltic nindeno. ³⁶Huan momajtijque moxtin, moililoaya:

—¿Len yes in lajtol hual quijtúa? Pampa ca ichicahualisli quinami quipía se lalcal ca lahueliltilisli, yihual quinmilía in ijyecames amo cuajcuali huan quisalo pa lajtic yehuanten.

³⁷Huan pa mochi cajcapa pa itejtenco in caltilan quilamachiltije inon hual quichíac Jesús.

Jesús quipajtía inantzín isihua

Simón Pedro

(Mt. 8:14-15; Mr. 1:29-31)

³⁸Cuaquinon quisac pin tiopan, uyac pa ichan Simón, calaquic. Nepa quitac totontataya míac inantzín isihua Simón huan quilajlanijque Jesús pa quichihuilis len pa yihual. ³⁹Yoje hualac Jesús, moquetzac inahuac

huan cajuac in totonalisli. Pampín mosejtiquisac in totonalisli huan jan ajnaxcan moquetzac in sihual huan quinyucxiltilic len pa quicuasi.

Jesús quinpajtía míac

(Mt. 8:16-17; Mr. 1:32-34)

⁴⁰Calaquiaya in tonali pa tiolac huan moxtin hual quipialoaya pa inminchan cocoxquimes ca len yes cocolisli quihualiquililoaya Jesús. Huan yihual quilalilic imajmajuan pan mochi sejse in cocoxquimes, huan quinpajtic.

⁴¹Quisaje ijyecames pa míac yehuanten, tzajtztitaloaya, quilijtataloaya: —Tehual ti'ixolol Dios.

Huan Jesús quinmajuaya, amo quinequiaya pa lajtulosquiaya, pampa yehuanten quimatiloaya yihual yec iCristo Dios.

Jesús quinpaxaluilía in tiopajmes

(Mr. 1:35-39)

⁴²Lanesic, quisac Jesús pin caltilan, uyac capa amaqui cataya. Quitemujtihualaloaya in míac lacames capa cataya huan quinequiloaya quitzacuילו pa camo mohuicasquiaya, quinequiloaya pa mocahuas ca yehuanten. ⁴³Ma yoje, yihual quinmilic:

—Cate noje oc sequin caltilan capa nicpía pa niquinlaquetzilis ilamachiltilisli cuali Dios huan quinami huelitía. Unca pampa inon nechtilanic Dios pa nichíás.

⁴⁴Huan yahuiaya quinahuatijtjinemi ilajtol Dios pa inminttiopajmes in judíos.

Quinquitzquilo míac michimes

(Mt. 4:18-22; Mr. 1:16-20)

5 Cataya se tonali in míac lalalera monechiculoaya inahuac Jesús pa quicaquilosquiaya ilajtol Dios. Yihual noje moquetzaya pa itenco in al huejcalan itoca Genesaret. ²Quinmitac ome canoas cataloaya itenquito

in al huejcalan. Quincahuajque in micheros, axcan quinchipajtataloaya inminlatzojuinijmes calica quinqutzquiloaya michimes. ³Calaquic Jesús pa in se canoa hual iyaxca Simón, huan quilajlanic pa quinejnmiltis in canoa pa quijcuanis nadita pin al huejcalan pa camo cayas pa itenco in al. Cuaquinon molalic huan pa in canoa quinmaxtiaya in m'íac lacalera.

⁴Cuaquín quiman mocahuac laquetzac, Jesús quilic Simón, quilic:

—Xicnejnemilti in canoa, ma ajsi capa cayas huejcalan huan xiquinlasacan anmolatzojuinijmes huejué pa anquinqutzquis michimes.

⁵Simón quilic:

—Lamaxtini, pa mochi layúa titequipanuloaya huan amo tijqutzquije nindeno. Ma yoje, pampa tel tichilic, niquinlasas in latzojuinijmes.

⁶Quich'íac inon, huan quinnejnechicujque michera, m'íac, huan pehuajque tzayanijque inminlatzojuinijmes. ⁷Cuaquín quinculiniloaya inminmajmajuan pa hualasqui yehuanten pan in oc se canoa pa quinpalehuilosquiaya. Huan hualajque, quintemiltijque in ome canoas ca michimes, pampín pejtiajque moatoctijque. ⁸Huan quitaya mochi inon Simón Pedro, huetzic quimolancuacuetzilijtica capa ilaixpan Jesús, molaqutzquic pa ilancuajmes Jesús, quilic:

—Ximijcuani capa nehual, Tata, pampa nehual nilajlaculi.

⁹Quilic inon pampa momajtiaya pampa quinqutzquijque innojen m'íac michimes. ¹⁰Yojque mocahualoaya mozticate ca lamajtilisli moxtin hual cataloaya ca yihual. Quema, yoje mocahualoaya mozticate Jacobo huan Juan ixolomes Zebedeo, hual tequipanuloaya ca Simón. Huan Jesús quilic Simón:

—Amo ximomajti. Tiquinqutzquini michimes hual miqunijme. Pejtica ca axcan huan pa quiman tiquinqutzquis lacames hual yulisqui pampa yesi nolaneltocanijmes.

¹¹Cuaquinon quinquxtijque pin al huejcalan in canoas pa quinlalilosquiaya pa itenco in al, huan jan axcan quincajcahuajque mochi huan quitocajque Jesús.

Jesús quipajtía se hual quipía lepra

(Mt. 8:1-4; Mr. 1:40-45)

¹²Se tonali cataya Jesús pa se innojen caltilan, huan moitac se lacal, quipíaya in cocolisli itoca lepra pa mochi icuerpo. Huan quitac Jesús in lacal, mopachujtiquisac pan lali, huan quitemachic Jesús, quilic ca icnotilislisli, quilic:

—Tata, sinda ticnequi, huil tijchiphauilis in lepra.

¹³Huan Jesús quixilanic imajma, quimatocac, quilic:

—Nícnequi nic'hía. Xicaya lachipahuali.

Jan ajnaxcan pajtic in lepra pan in lacal. ¹⁴Cuaquinon Jesús quilic in lacal pa camo quilisquiaya amaqui, quilic:

—Axcan quiman timohuicas, ximonexti ca in tiopista huan xicuica se huendi hual quimaca se pa lachipahualisli, quinami moijcuiluc ilajtol Moisés. In huendi quinnextilis in tiopistas pampa axcan tichipahuac.

¹⁵Ma yoje, ilamachtilisli in lapajtilisli mosemanaya m'íac huan m'íac huan mojmosta momiactitihualaloaya in lacames pa quicaquilosquiaya Jesús huan pa yihual quinpajtilisquiaya inmincocolisli.

¹⁶Huan yihual yahuiaya ihuán capa amaqui chantiaya, yahuiaya pa nepa quilajlanis Dios.

Jesús quipajtía se hual amo huil nejnemiaya

(Mt. 9:1-8; Mr. 2:1-12)

¹⁷Cataya se tonali yihual lamaxtiaya huan molalijtataloaya nepa sequin

hual quineltocaloaya inminlamaxtilisli yehuanten hual itocaloaya fariseos, huan sequin ilamaxtinijmes inminlajtol hual quinextilía quinami quimolancuacuetzililo Dios in judíos. Yehuanten quisajque pa mochi caltilan pin lalticpan Galilea huan pin lalticpan Judea huan pin caltilan hué Jerusalén. Huan in Tata ilahueliltilisli cataya ca yihual pa lapajtisquiaya. ¹⁸Huan xiquitacan, quihualicatihualaloaya sequin lacames se lacal pan se lapejtzindi. In lacal amo huil moquetzaya, amo huil nejnemiaya. Yehuanten motolinijque pa quihualicalosquiaya pa calijtic pa quilalilosquiaya ilaixpan Jesús. ¹⁹Huan amo quitaloaya quinami quihualicalosquiaya pa calijtic pampa quintzacuililoaya in míac lacalera itenco in cali. Pampín, lejcujque pani in cali, quixitinijque ca pani pa quichihuasi se coyunquil pa in tapanco capa quitemuhijque in lacal lastataya pan in lapejtzindi. Quitemuhijque lajco capa in lacalera, capa ilaixpan Jesús. ²⁰Huan yoje quitac Jesús quinami yehuanten quineltocaloaya yihual yahuiaya quipajti in cocoxqui. Pampín quilic:

—Lacal, axcan cate lapujpuhuali molaijlaculisli.

²¹Cuaquinon pehualoaya quijitulo laijtic yehuanten in lamaxtinijmes huan in fariseos, quijtuloaya: “Huan ¿aquí in se hual quihuejuecaltitica Dios? Amo unca amaqui hual quipía lahueliltilisli pan in lalticpan pa quinpujpuhuas lacames inminlajlaculisli. Jan Dios san, unca iyaxca yihual.”

²²Quimatic Jesús len quijtuloaya pa inminyolo huan quinmilic:

—Anquijtutica laijtic pa anmoyolo pampa nicuejuecaltitica Dios pampa niquilic: “Cate lapujpuhuali molaijlaculisli.” ²³Axan, annimitznextilis len. Huil niqUILIS

pampa cate lapujpuhuali ilaijlaculisli. Noje huil niqUILIS pa moquetzas huan nejnemis. Sinda moquetzas huan nejnemis anquimatis pampa nicpía lahueliltilisli. ²⁴Yojque nehual ilacal in cielo nía annimitznextilía pampa unca noyaxca pan in lalticpan pa niquinpujpuhuilis lacames inminlajlaculisli, quinami unca iyaxca Dios pa quichías yoje. Huan neli annimitznextilis inon, pampa nía nicpajtía in lacal.

Cuaquín, quimalinac iixco huan quitac in cocoxqui, quilic:

—Nimitzilía, xicmama molapejtzindi huan xía pa mochan.

²⁵Jan ajnaxcan moquetzac in lacal inminlaxpan moxtin, quimamac in lapejtzindi capa lastataya, uyac pa ichan quijtutica lajtomes huejué pa Dios. ²⁶Huan mochahualoaya moizticate ca lamajtilisli moxtin. Pehualoaya quijtulo lajtomes huejué huan neli pa Dios. Pehualoaya momajtilo míac huan quilijtinemiloaya:

—Axan tiquinmitaje lejlen hual amo quiman moitaje pan lalticpan huan techmajtilo innojen.

Jesús quinotza Leví

(Mt. 9:9-13; Mr. 2:13-17)

²⁷Panujque innojen, quisac Jesús huan quitac se motocaya Leví molalijtataya pin cali capa quilaxlahuiloaya pa ilapixcalisli tomin pa in hueyenten romanos. Huan Jesús quilic:

—Xihuala xichtoca, xiye se nomonextilini ca in oc sequin.

²⁸Cuaquinon moquetzac Leví, quincahuac mochi, huan yihual uyaje. ²⁹Huan quichihuicilic Leví se lacualisli pa Jesús, quihuicac pa ichan. Noje quinhuicac Leví oc sequin míac lacames, cataloaya oc sequin hual canaloya ilapixcalisli tomin huan oc sequin lacames hual cataloaya ca

yehuanten pa in lacualisli. ³⁰Amo quixtocaloaya inon yehuanten in fariseos huan inminlamaxtinijmes. Pampín yehuanten quinlajlanije imonextilinjmes Jesús, quinmilije:
—¿Leca amhuanten anlacua huan anlauni ca in ilapixcanijmes tomin pa in romanos huan in oc sequin lacames hual amo yulilo cuali?

³¹Jesús quinnanquiloc:

—Amo monequi pa quitasi se lapajtini yehuanten hual amo cocoxquimes. Yehuanten hual, quema, cate cocoxquimes quipialo pa quitasi se lapajtini. ³²Huan nehual nihualaya pa niquinnotzas yehuanten hual quimatilo pampa quipialo laijlaculisli. Niquinmilis pa quinpalasi inminyolo pa pehuasi laijnamiquisqui quinami Dios quinequi. Amo nihualaya pa niquinnotzas yehuanten hual quijtulo laijtic inminyolo pampa quipialo inminyolo chipahuac. Yehuanten quijtulo pampa amo quipialo pa quipalasi inminyolo pa pehuasi laijnamiquisi quinami Dios quinequi.

Quilajlanilo Jesús quinami mosahualo

(Mt. 9:14-17; Mr. 2:18-22)

³³Sequin quilijque:

—Mosahualo míac imonextilinjmes Juan Lacuayatequini huan quilajlanilo Dios. Noje quichihualo yojque yehuanten in fariseos. Huan tehual momonextilinjmes mojmosta lacualo huan launilo, amo quiman mosahualo.

³⁴Huan Jesús quinmilic:

—Nomonextilinjmes cate quinami yehuanten hual cate lahuicali pa se lanamictilisli huan nehual niunca quinami hual yahui monamictía. Amo huil anquinmilis pa mosahuasi yehuanten hual quinnotza se pa hualasi pa se lanamictilisli sinda cate ca in lacal hual monamictitica. ³⁵Ma yoje, ajsisi in tonalijmes quiman

quinquixtilisi yehuanten in se hual monamictitica hual quinnotzac pa hualasi pa in lanamictilisli. Cuaquinon pa in tonalijmes mosahuasi.

³⁶Huan quinmilic yehuanten noje se lapuhualisli pa lamaxtisquiaya, se laijnamiquiltisli, quinmilic:

—Amaqui quitzayana se ilajco se nahuas yancuic pa quilalilis pan se tzayanquil pan se nahuas cacaxli. Sinda quichías in, yoje quijlacus in yancuic huan amo cayas iyaxca in lajco yancuic ca in nahuas cacaxli. ³⁷Noje amaqui quintemiltía cuilaxlimes cajcacaxli ca iayo uva yancuic. Sinda quichía yoje, iayo uva yancuic quixopunis in cuilaxlimes. ³⁸Pampín, quilalilo iayo uva yancuic pin cuilaxlimes yajyancuic. Huan jan yoje nolamaxtilisli amo unca iyaxca ilamaxtilisli in fariseos. ³⁹Huan sinda se cunic iayo uva hual axan quipía míac tonalijmes quiman quilalijque pin cuilaxlimes, cuaquín yihual amo quinequi cuni jan ajnaxcan iayo uva yancuic, pampa quijtúa: “Unca cuali in hual axan quipía míac tonalijmes quiman quichihuajque.”

Quincepeshualo miahuimes pan tonali quiman mosehuilo in judíos

(Mt. 12:1-8; Mr. 2:23-28)

6 Cataya pan se tonali quiman mosehuilo in judíos, panujtiahuiaya Jesús pan se cuajmilí capa cataya trigo, huan pehuajque quincepeshuajque miahuimes imonextilinjmes, quinxacualujque ca inminmajmajuan pa quisasquiaya in caliyó, cuaquinon quicuajque in trigo. ²Sequin fariseos quilijque:

—¿Leca anquichijtica len amo quimacahuiltía tolajtol pa quichías se pan tonalijmes hual timosehuilo?

³Huan quinnanquiloc Jesús, quinmilic:

—¿Amo quiman anmomaxtic in hual quichíac David quiman mayanaya,

yihual huan moxtin yehuanten hual cataloaya ca yihual? ⁴Yihual calaquic pa itioipan hué Dios, quinmanac in panes hual in tiopistas quinlalilo ilaixpan Dios. Quincuac huan quinmacac yehuanten hual cataloaya ca yihual. Huan toljatol lamacahuiltía pa quincuasi jan in tiopistas san.

⁵Cuaquinon quinmilic:

—Nehual ilacal in cielo niunca in Tata hual unca noyaxca pa niqijtus len huil quichía se pan in tonali chicome quiman mosehuilo.

Jesús quipía lahuelilitlisli

(Mt. 12:9-14; Mr. 3:1-6)

⁶Cataya pan oc se tonali chicome quiman mosehuilo in judíos, huan calaquic Jesús pa se tiopan calijtic huan lamaxtiaya. Nepa cataya se lacal ca imajma cuali huaqui.

⁷Huan quinapachijtataloaya in lamaxtinijmes huan fariseos pa quimatilosquiaya sinda cuajnesi yahuiaya quipajti Jesús pan in tonali chicome. Yoje quipialosquiaya quinami quimotexpahuililosquiaya. ⁸Ma yoje, quimataya Jesús len quijtuloaya pa inminyolo, huan quilic in lacal hual quiplaya imajma huaqui, quilic:

—Ximoquetza huan xihuala ximoquetza lajco capa ticate tehuanten.

Huan yojque quichíac in lacal.

⁹Cuaquinon Jesús quinmilic:

—Ma annimitzljalaní, çlen quijtúa toljatol? ¿Techmacahuiltía pa ticchihuasi len cuali o len amo cuali pan tonali chicome quiman timosehuilo? ¿Techmacahuiltía pa tijquixtisi se pin polehuilisi o pa tijcahuasi pa miquis?

¹⁰Quinmitac moxtin pa itenco, cuaquín quimalinac iixco ca in lacal hual quiplaya imajma huaqui, quilic:

—Xicxilani momajma.

Huan quixilanic imajma in lacal huan mocuepac yulic imajma quinami cuali cataya quiman ayamo huaquiaya.

¹¹Cuaquín cualaniloaya míac in fariseos huan lamaxtinijmes, pehuajque molajlanijque len huil quichihuililosquiaya Jesús.

Jesús quinnextilía len quinequi quijtúa in lapuhualisli

(Mt. 10:1-4; Mr. 3:13-19)

¹²Huan cataya pan innojen tonalijmes quisac in caltilan Jesús. Uyac pa in loma (tepel) pa quilajlanis Dios, panuc mochi in layúa quilajlantataya Dios. ¹³Quiman lanesic, quinnotzac pa hualalosquiaya ca yihual imonextiliniijmes. Ca yehuanten cataloaya majlaclihuanome (doce) hual quinlajtultic. Yihual noje quintocayaltic ilanahuatinijmes. ¹⁴Cataya Simón hual noje quitocayaltic Pedro, cataya Andrés, yihual icni Simón, cataloaya Jacobo huan Juan, cataya Felipe, cataya Bartolomé, ¹⁵cataya Mateo, cataya Tomás, cataya Judás ixolol Alfeo, cataya Simón hual cataya ca innojen hual quinequiloaya molalilo inminpan in romanos, motocaloaya in Zelotes, ¹⁶cataya Judás ixolol Jacobo, huan cataya Judás Iscariote. Yihual in se hual quitemacac Jesús ca yehuanten hual yahuiloaya quimictilo.

Quinmaxtía Jesús niman míac lacames

(Mt. 4:23-25)

¹⁷Temuc Jesús ca yehuanten, moquetzac pan se ixlán. Nepa hualaje míac imonextiliniijmes, huan hualaje noje míac yehuanten pa mochi in lalticpan Judea huan Jerusalén huan pin caltilan hué Tiro huan in caltilan hué Sidón hual cataloaya pa itenco in al niman huejcalan. ¹⁸Hualajque yehuanten pa quicaquilosquiaya Jesús huan pa yihual quinpajtisquiaya inmincocolisli. Noje quinpajtiaya Jesús yehuanten hual quincocoltiloaya noje ijyecames

amo cuajcuali. ¹⁹Huan motoliniloaya moxtin pa quimatocalosquiaya Jesús. Cataya pampa quistataya pa yihual ilahuelilitlisli pa lapajtisquiaya huan yoje pajtije moxtin hual quimatocaloaya.

Paquilisli huan icnotilisli

(Mt. 5:1-12)

²⁰Huan cajcoquic itzontecon Jesús pa quinmitasquiaya imonextilinjimes, pehuac quinmilic:

—Ma quiapiacan paquilisli yehuanten hual quimatilo pampa monequi niman míac pa canasi len Dios quiplá pa quinmacas. Quema, ma quiapiacan paquilisli, pampa Dios huelitis pa inminyolo.

²¹Ma quiapiacan paquilisli yehuanten hual aqui mayanalo pa len Dios quinequi quinmaca. Quema, ma quiapiacan paquilisli, pampa yehuanten pachihuisi.

Ma quiapiacan paquilisli yehuanten hual chocalo pampa quincocujtica inminyolo de mochi in amo cuali hual quichihualo. Quema, ma quiapiacan paquilisli, pampa Dios quinchihuilis pa paquisi.

²²Ma quiapiacan paquilisli sinda amo quinmixtocalo in lacames, sinda amo quinmacahuiltilo pa calaquisi pa calijtic inmintiopajmes, sinda quincocolijtialo huan sinda quinhuejuecaltilo. Jo quema, ma quiapiacan paquilisli sinda yehuanten quinchihuililo yoje pampa nechnehtocalo nehual ilacal in cielo.

²³Ma paquican pa in tonali quiman yoje quinpanus, ma tzicuinican ca paquilisli, pampa pin cielo quiyasi se laxlahuilisli hué. Quema, pampa inmintajtzitzían yehuanten hual anmijchihuililo yoje quinchihuilinijme yoje Dios ilajtunijmes pa yina.

²⁴Ma yoje, quichi cocolisli quiyasi pan inminyolo yehuanten hual quijtulo

pampa quiplalo mochi huan pampín amo monequi pa quiyasi in hual Dios quinequi quinmaca. Quema, quichi cocolisli quiyasi pampa axcan pan in lalticpan quiapiajque inminlalacahualtilisli.

²⁵Huan quichi cocolisli quiyasi pan inminyolo yehuanten hual axcan quijtulo pampa amo unca nindeno hual Dios quiplá pa quinmacas hual monequi pa quiyasi. Jo quema, iquichi cocolisli quiyasi pan inminyolo, pampa ajsis se tonali huan quinequisi quiyasi len huil quinmaca Dios huan yajmo quinmacas!

Huan quichi cocolisli pa inminyolo quiyasi yehuanten hual canal mochi inminpaquilisli ca in hual quiplalo nican pin lalticpan. Jo quema, quichi cocolisli quiyasi. Pampa ajsis se tonali huan quincocus inminyolo, chocasi huan ijyulantitiasi pampa yajmo quiyasi len calica mopactilisli.

²⁶Huan quichi cocolisli quiyasi pa inminyolo yehuanten hual moxtin laquetzalo cuali pampa quixtocalo in hual quichihualo yehuanten. Unca pampa yoje inmintajtzitzían laquetzaniyme pampa quixtocaniyme in lajtunijmes hual islacatinijme, quijtutataloaya pampa laquetzataloaya ilajtomes Dios.

Ma quilasoja se yihual hual quichihuilía amo cuali

(Mt. 5:38-48; 7:12)

²⁷Ma yojque, amhuanten hual annehcactica huan annehnehtocatica, annimitzilía xiquinlasojlancan yehuanten hual molalilo anmopan, xiquinchihuilicancan cuali yehuanten hual amo annitizitalo cuali.

²⁸Xiquinlaquetzilicancan cuali yehuanten hual annitizlaquetzililo amo cuali amhuanten, huan xiclajlanican Dios pa yehuanten hual anmijchihuililo amo cuali. ²⁹Sinda se mitztecua pa

moixco, xicmalina ca yihual oc se moixco pa mitztecucas oc sejpa. Huan sinda se mitzquixtilía monahuas, amo xictzacuili pa camo mitzquixtilis noje molaquen. Unca cuali pa timopepenialtis in amo cuali hual mijchihuililo yehuanten. Amo unca yojque cuali pa tiquincuepilis.

³⁰Sinda se mitzmlajlanilis len tehual, xicmaca. Huan sinda se mitzquixtilía len, cuaquín amo xiclajlani sejpa pa mitzcuepilis.

³¹Xiquinchihuilican cuali in lacames quinami anquinequi pa yehuanten anmijchihuilis cuali.

³²Sinda anquinnequi yehuanten hual anmitznequilo, Dios amo yahui anmijsehuía pampa inon. Yehuanten hual amo mocahualo pa quichihuasi laijlaculisli jan yoje quinnequilo oc sequin hual noje quinnequilo yehuanten. ³³Huan sinda anquichihuilía cuali san innojen hual aqui anmijchihuililo cuali, cuaquín ¿anquijtúa pampa yahui anmijsehuía Dios pampa inon? Xiquitacan. Yehuanten hual itequi quichihualo laijlaculisli quinchihuililo cuali innojen hual aqui quinchihuililo cuali yehuanten. ³⁴Huan sinda anquinlanehuía anmotomin anquichixtica pampa yehuanten yalo anmitzcuepililo anmotomin, yoje amo yahui anmijsehuía Dios pampa inon. Jan yoje quichihualo yehuanten hual yulilo quichijitcate laijlaculisli. Quilanehuilo oc sequin quichixticate pa yehuanten quincuepilis inmintomin. ³⁵Yoje, xiquinnequican yehuanten hual molalilo anmopan, xiquinchihuilican cuali huan xilalanehuican, amo xicchiacan lacuepilisli nindeno. Yoje Dios anmitzcuepilis míac huan anyes ixolomes Dios hual chanti niman pa pani pin cielo. Yihual quinchihuilía cuali yehuanten hual amo cuali huan yehuanten hual amo quisehuilo.

³⁶Xilainilican quinami anmoTajtzin pin cielo laicnilfa.

Amo xitenehuacan oc sequin

(Mt. 7:1-5)

³⁷Amo xiejsehuican pa anquinmotexpahuilis laijlaculisli oc sequin huan amo quiman anmitzmotexpahuilis laijlaculisli Dios. Xicpujpuhuacan in amo cuali hual oc sequin quichihualo, huan Dios anmitzpujpuhuilis in amo cuali hual anquichía. ³⁸Xitemacacan huan Dios anmitzmacas, anmitzlamachihuilijtica ca ilamachihualisli iyaxca hual unca niman míac, amo quinami inminlamachihualisli lacames. Jo quema, Dios quilamachihuilía anmitztemiltijtica huan anmijtzejteluulijtica huan anmitzpacihuiltitica, huan cuaquín anmitztemiltisli pa xinis pa in lali. Pampín, quinami amhuanten anlalamachihuilía, yoje Dios anmitzlamachihuilis.

³⁹Cuaquinon quinmilic se laijnamiquiltisli calica quinmaxtiaya, quinmilic:

—Se pachacal amo huil quilaicana oc se pachacal. Huetzilosquiaya in omenten pa je lali lacomultic.

⁴⁰Imonextilini se amo ajsis yes hué sinda ilamaxtini amo unca jan yojque hué. Laquis monextilía in monextilini mochi len quimaxtía ilamaxtini, cuaquinon in monextilini yes jan quinami ilamaxtini san. ⁴¹¿Leca tiquita mocni ilaijlaculisli tipichin huan amo tiquita tehual molaijlaculisli hué? Unca quinami tiquiztica se bagazo tipichichito pa iixtololon mocni, huan ma yoje amo timoitilía in cuahuil hual unca pa tehual moixtololon.

⁴²¿Quinami huil tehual tiquilis mocni: “Nito”, tiquilis, “ma nimitzquixtili in bagacito moixtololon”? Huan iamo tiquita in cuahuil hual unca pa

moixtololon tehual! iTimochijtica quinami se niman cuali huan mocni amo yojque cuali quinami tel! iLacuajcuamanani! Xipehua timoquixtilijtica in cuahuil hual ticpía pa moixtololon tehual. Cuaquinon tilachías cuali pa tijquixtilis in bagacito mocni iixtololon.

Quimatilo se cuahuil pan ipampa ilaquilyo

(Mt. 7:17-20; 12:34-35)

⁴³Amo unca se cuahuil cuali hual quimati laqui ca laquilyo hual amo huil quicualo. Huan se cuahuil amo cuali hual amo monotza amo temaca laquilyo cuali. ⁴⁴Ticmatilo se cuahuil huan oc se cuahuil pan ipampa ilaquilyo iyaxca. Amo huil canililo se ajual ilaquilyo se amacuajtzindi. Huan amo quinmanililo uvas se huitzcuajtzindi. ⁴⁵Yoje quichía len cuali se lacal cuali pampa iyolo cuali unca, huan amo quichía len cuali se lacal amo cuali pampa quipía iyolo amo cuali. Quinami lajtúa se lacal laijtic pa iyolo, yojque lajtus ca icamac.

In ome lalastili

(Mt. 7:24-27)

⁴⁶Huan ñleca annechnotza “Tata, Tata”, huan ma yoje amo anquinchía innojen hual annimitzilía? ⁴⁷Annimitzilía quinami unca se lacal hual ca nehual hualas huan quichías len niqulils. ⁴⁸Unca quinami se lacal hual quichihuaya se cali. Lahuajuana laijtic huejcalan. Huan quiman cajsic in xaltel, nepa pehua quilalía in tixcalimes pa quiquetzas icalí. Huejcalantíac in atenco hué huan quihuítequía in al pan in cali. Ma yojque amo huil quiculinía in cali pampa in lacal quichíac pani in xaltel. ⁴⁹Huan sinda nechcaqui se huan amo quichía quinami niqulíla, cuaquín yihual unca quinami se lacal

hual quichihuaya icalí pan in lali, amo quitoctic in cali. Huejcalantíac in atenco hué, quihuítequic in al pan in cali, huan jan ajnaxcan quimayajtiquisac, mocahuac laxitinili mochi.

Jesús quipajtía itequipanujquil se lacal romano

(Mt. 8:5-13)

7 Cuaquinon, quiman laquisac quinnotzac yehuanten ca mochi in lajtomes pa quicaquilosquiaya, uyac Jesús pa in caltilan Capernaúm. ²Huan cataya se inminlaicanani guaches, yec romano. Quipiaya in laicanani se itequipanujquil niman cocoxqui, yahuiaya miqúi. Huan in laicanani quinequiaya míac itequipanujquil. ³Quimatic in laicanani quinami Jesús huil tepajtiaya, quintilanic sequin inminhueyenten in judíos pa yasi quinahuatísi Jesús pa hualas quipajtis itequipanujquil in laicanani. ⁴Ajsijque in hueyenten capa cataya Jesús, pehualoaya quitemachilo ca míac lasojlalisli, quilijque:

⁵—Monequi pa ticpalehuis in laicanani pampa yihual technequi tehuanten in judíos huan techlaxlahuilic totiopan.

⁶Cuaquín uyac Jesús ca yehuanten. Ma yoje, amo cataya Jesús huejca pa ichan in laicanani huan quinamiquijque sequin hual cataloaya ca in laicanani, quintilanic in laicanani pa quinahuatilosquiaya Jesús, huan ca ilajtomes in laicanani quilijque:

—Tata, amo ximomaca tequil pa tihualas pa nochan pampa amo nimonotza pa ticalaquís nocali. ⁷Pampín niqújtuc amo cataya noyaxca pa nihualas ca tehual pa nimitzljalanis pa tinechpalehuis. Jan xiquijtu se lajtól san huan pajtis notequipanujquil. ⁸Nicmati yihual pajtis pan ipampa molajtol, pampa nehual nicpía pa

nicneltocas nolaicanani ilajtol. Noje niqinplá guaches hual quipialo pa nechneltocasi. Niquilía in se “iXía!” huan yahui, niquilía oc se “iXihuala!” huan huala. Niquilía notequipanujquil “iXicchía inon!” huan quichía. Huan sinda yehuanten nechneltocalo pampa niqinmilía inon, cuaquín iquinami amo yahui pajtía notequipanujquil pan ipampa molajtol tehual!

⁹Quicaquic Jesús inon, lajtuaya pa iyolo pampa quineltocaya chicahuac in laicanani mas que amo yec judío. Cuaquín, momalinac capa yehuanten hual quitocatiahuiloya, quinmilic: —Annimitzilía inon. Ayamo niquitac ca amhuanten israelitos jan se hual laneltoxa yojque chicahuac quinami laneltoxa in laicanani romano.

¹⁰Cuaquín, mocuepajque yehuanten hual quintilanic ca Jesús in laicanani. Ajsijque pa ichan, quitajque pajtic in tequipanujquil.

Jesús quiyuliltía ixolol se sihual ihuán

¹¹Panuc inon, yahuiaya Jesús pa se caltilan tipichin itoca Naín, quitocaloaya imonextiliniymes huan míac lalalera. ¹²Ajsic capa calaquilo pin caltilan, quitac se mijquil, quihuicatiahuiloya pa quilalpachulosquiaya. Se sihual ihuán yec inantzin in mijquil, huan yihual yec ja in se xolol san hual quiapiaya. Ca in sihual cataloaya míac hual chantiloaya pa in caltilan. ¹³Quitaya in sihual, in Tata Jesús quiapiaya laicnililislí pa yihual, quilic:

—Amo xichoca.

¹⁴Ajsic Jesús capa cataya ilacomultic in mijquil, quimatocac, huan moquetzaje yehuanten hual quimamaloaya. Cuaquinon Jesús quilic in mijquil:

—Oquixli, nimitzilía ximoquetza.

¹⁵Cuaquinon moquetzac molalic in hual miquic, axcan yuliaya oc sejpa, pehuac lajtuc. Huan Jesús quitemacac inantzin yihual hual cataya mijquil.

¹⁶Huan momajtijque moxtin huan pehualoaya quijtulo lajtomes huejué pa Dios, quililoaya:

—Axcán nescic ca tehuanten se ilajtuni hué Dios.

Noje quijtuloaya:

—Axcán hualac Dios techpaxaluilic tehuanten hual techlajtultic.

¹⁷Huan quimatijque quinami panuc inon yehuanten pa mochi in lali Judea. Huan pa mochi in lali itejtenco Judea quimatijque len quichihuac Jesús.

Quintilanía Juan Lacuayatequini sequin imonextiliniymes ca Jesús

(Mt. 11:2-19)

¹⁸Huan Juan Lacuayatequini imonextiliniymes quimachiltijque Juan mochi inon. Pampín quinnotzac Juan ome imonextiliniymes, quintilanic ca in Tata Jesús. ¹⁹Quintilanic pa quilajlanilosquiaya:

—¿Tehual tiunca in se hual Dios quijtuc yahuiaya techtilanilí? O ¿ticchiasi oc se?

²⁰Yojque hualajque capa Jesús in lacames imonextiliniymes Juan huan quilije:

—Techtilanic Juan Lacuayatequini ca tehual pa timitzajlanisi sinda tel tiunca in se hual Dios quijtuc yahuiaya huala pin lalticpan. ¿Tiunca tehual o ticchiasi oc se?

²¹Huan pa in nadita hual nepa cataloaya in omenten hual Juan quintilanic, quitajque Jesús tepajtic. Quinpajtic míac cocoximes hual quinplaloaya míac colislí. Quinpajtic míac hual quincocoltiloaya ijyecames amo cuajcuali lajtuc yehuanten, huan quinlalachaltic míac pachacames.

²²Cuaquinon Jesús quinnanquilic

in omenten imonextiliniymes Juan, quinmilic:

—Xiacan xicmachiltican Juan in hual anquitac huan in hual anquicaquic: Lachialo in pachacames, nejnemilo yehuanten hual amo huil nejneminijme. Pajtilo cuali yehuanten hual quipialo in cocolisli lepra. Lacaquilo hual cataloaya panatas. Yulticate oc seja in mijquimes. Huan quicacticate nolamachiltisli cuali yehuanten hual quimatilo pampa monequi pa quipiasi ilapalehuilisli Dios. ²³ Quipías paquilisli aqui hual quilalá ilaneltocalisli ca nehual.

²⁴ Yoique uyaje in omenten pa quinahuatilosquiaya Juan inon hual Jesús quinmilic. Cuaquinon inminyampa in míac lacames pehuaya Jesús quinlaquetzili quinami Juan quichijchiuilic Jesús iojli, quinmilic:

—Nepa in tonalijmes anquisani ca capic amaqui chantiaya. ¿Aqui anquijtuni pampa anyahuiaya anquita? ¿Anquisani pa anquitasquiaya se lalac hual momajtic quijtuc len Dios quinequiaya pa quijtususquiaya, se lalac hual quijtuc len quinequiloaya lacames? No, Juan amo quinami inon, yihual amo quinami se acal hual in iyecal quiculinía. ²⁵ Cuaquín ¿len anquisani anquita? ¿Anquisani pa anquitasquiaya se lalac lalaquentili ca tzotzomajli cualtichin? Xiquitacan.

Yehuanten hual molaquentilo ca tzotzomajli cualtichin cate capa chantilo in huejueyenten huan in huejueyenten quinchihuililo cuali huan quipialo míac hual cuajcuali. Juan amo quinami inon. ²⁶ Cuaquinon ¿len anquisani anquita?

¿Anquisani pa anquitasquiaya se ilajtuni Dios? Jo quema, annimitzilía. Huan yihual amo yec jan se ilajtuni Dios san.

²⁷ Unca pampa yoje unca lajcuiluli in hual Dios quijtuc pampa yihual Juan yahuiaya nejchihuilía, quil:

Xiquita, nimitzlaicanaltilía nolanahuatini pa yihual mijchijchiuilis mo'ojli moixpan,

pa mitziximatisqui yehuanten hual niquinlajtultic.

²⁸ Annimitzilía inon. Ca moxtin lacames hual quinlacatiltije lacames huan sihuames, amo unca se hual ajsic yec hué quinami Juan Lacuayatequini unca hué. Ma yoje, yihual Juan amo niman hué quinami unca hué in niman tipichin hual unca ca yehuanten hual cate capa Dios huelitía. ²⁹ Huan pa innojen tonalijmes quiman moxtin quicaquiloaya Juan, jo quema, quicaquiloaya in yehuanten hual quipixcalo tomin pa yehuanten hual huelitilo, cuaquín yehuanten quimacahuiltijque pa quincuyatequis Juan. Quipalajque inminyolo pa laijnamiquilosquiaya quinami Dios quinequi. Yoje lanextilijque pampa Dios quinchihuilía seje jan yoje quinami quinchihuilía in oc sequin. Huan yehuanten quineltocajque Juan ilamaxtilisli.

³⁰ Ma yoje, in fariseos huan yehuanten hual quimaxtilo in lajtol amo quimacahuiltijque pa quincuyatequis Juan. Yoje lanextilijque pampa amo quineltocajque Dios. Quichihuilijque pa como quinpalehuisquiaya ilajtol Dios, amo quipalajque inminyolo pa laijnamiquilosquiaya quinami Dios quinequi.

³¹ Jesús quilic:

—¿Quinami cate yehuanten hual yulticate axan? ³² Lachihualo quinami xolomes hual molalilo pa mahuiltisi. Quintzajtzilijtcate yehuanten hual mahuiltilo ca yehuanten, quinmilitjtcate: “Ticnequiloaya timahuiltilo quinami quiman monamictilo. Antimijtztotzonilije huan amo anmijtotic. Cuaquín ticnequiloaya timahuiltilo quinami quilalpachulo se mijquil, titzajtziye quinami techcocujtataya toyolo huan amo anchocac.” ³³ Yehuanten hual yulticate axan cate quinami in xolomes

pampa amo quimatilo len quinequilo. Amo quixtocalo len yes hual Dios quinequi quinmaca. Juan amo lacuani huan amo cunini iayo uva coc quinami amhuanten anlacualo huan ancuni huan anquijtuni: “Yihual quipía se ijyecal amo cuali.” ³⁴Huan nehual ilacal in cielo, nel niunca nican, nilacua huan nilauni quinami moxtin, huan anquijtúa: “Xiquitacan. Nepa unca se lacuani, unca se launini. Quinequi pa cayasi ca yihual yehuanten hual quipixcalo tomin pa yehuanten hual huelitilo. Quinequi pa cayasi ca yihual yehuanten hual laijlaculi.” ³⁵Ma yoje —quinmilic Jesús—, moxtin hual quimatilo, yehuanten quimatilo ilajmatilisli Dios, in hual tiquinlaquetzililo yehuanten Juan huan nehual. Yehuanten quineltocalo huan quilasojlalo in lajmatilisli.

Simón in fariseo quihuica Jesús pa ichan

³⁶Huan cataya se fariseo quihuicac Jesús pa ichan pa lacuas ca yihual. Calaquic Jesús icalí in fariseo, molalic pa in lacualisli. ³⁷Cataya se sihual yuliaya pin caltilan, se sihual laijlaculi. Yihual quimatic pampa lacuaya Jesús pa ichan in fariseo. Huan in sihual quihualicac se tapalquita lachijchihuali ca tixcali itoca alabastro. In tapalquita cataya tentica ca len hual ajuíac, itoca mirra. ³⁸Huan in sihual ajsic moquetzac pa icxihuajmes Jesús, chocaya huan ixicac ichoquis pani icxihuajmes Jesús, pehuac quinpaltilic icxihuajmes. Cuaquín in sihual quinhuactic icxihuajmes Jesús ca itzondi, huan pehuaya quintenamiqui icxihuajmes, quinxahuiliaya ca in mirra. ³⁹Quitac inon in fariseo hual quihuicac Jesús pa ichan, huan quijtuc laijtuc yihual, moilic: “Sinda in se yec se ilajtuni Dios, yoje quimatiaya aquí unca in sihual hual quimatocica.

Quimatiaya quinami yihual unca, yihual se sihual laijlaculi.”

⁴⁰Huan Jesús quilic in fariseo:

—Simón —quilic—, nicpía len pa nimitzilic.

Huan Simón quilic:

—Xichili, Lamaxtini.

⁴¹Jesús quilic:

—Cataloaya ome lacames quihuiquililoaya tomin se telanehuini. Se quihuiquiliaya quinientos denarios tomin, in oc se quihuiquiliaya cincuenta.

⁴²Pampa amo quipiaje in omenten nindeno calica quilaxlahuilosquiaya in telanehuini quinpujpuhuac pa camo quipialosquiaya pa quilaxlahuilosquiaya in tomin hual quihuiquililoaya. ¿Calía in omenten tehuiquilinijmes tiquijtúa yahuiaya quilasojla niman míac in telanehuini huan calfa amo yoje míac?

⁴³In fariseo quinanquilic:

—Niquijtúa in se hual quipujpuhuac hual quihuiquiliaya in míac tomin, yihual yahuiaya quilasojla niman míac.

Jesús quinanquilic:

—Tilananquilic cuali.

⁴⁴Cuaquinon momalinac Jesús ca in sihual huan quilic Simón:

—¿Tiquita in sihual, Simón?

Nicalaquic mochan huan tehual amo tichmacac al pa niquinpacasquiaya nocxihuajmes. Huan yihual nechpaltilic nocxihuajmes ca ichoquis iixtololjmes huan quinhuactic ca itzondi. ⁴⁵Amo tichtenamiquic pa tichpaltisquiaya, huan yihual quiman calaquic pehuaya quintenamiqui nocxihuajmes huan amo mocahuac quichíac. ⁴⁶Amo tijxahuilic notzontecan ca chahuac, huan yihual quinxahuilía nocxihuajmes ca mirra. ⁴⁷Pampín nimitzilía, Dios quipujpuhua ilajlaculisli hual unca míac. Quipujpuhua pampa yihual nechlasojlac míac. Yihual hual Dios quipujpuhua hual amo quipía míac

lajlajlaculisli, yihual quilasoja Dios jan nadita san.

⁴⁸Cuaquinon Jesús quilic in sihual, quilic:

—Nicpujpuá molajlajlaculisli.

⁴⁹Cuaquinon pehualoaya moililo laijtic inminyolo yehuanten hual cataloaya pa in lacualisli ca yihual, moilije: “¿Aquí inon hual quijtúa unca iyaxca pa quipujpuhuas laijlajlaculisli?”

⁵⁰Jesús quilic in sihual:

—Tiunca laquixtili pin ipolehuilislil molajlajlaculisli pampa tilaneltocac. Ximohuica cuali, xicmati pampa Dios mijchihuilic cuali.

Sihuames hual quipalehuiloaya Jesús

8 Panuc inon, cantiahuiaya ojli Jesús pa se caltilan huan pa oc se caltilan huan pa se calería pa yasquiaya pa oc se calería. Lanahuatijtineniaya ca Dios ilanahuatilisli, quinlamachiltitinemiaya moxtin ilamachiltilisli cuali hual unca quinami Dios huelitía. Uyaje ca yihual in doce imonextiliniymes ²huan sequin sihuames. In sihuames Jesús quinpajtilic inminocolisli huan quinquixtilic ijyecames amo cuajcuali. Cataya María hual yulini pa in caltilan Magdala, quisaje pa yihual chicome ijyecames amo cuajcuali. ³Noje cataya ca yehuanten Juana isihua Chuza. In Chuza yec se itequipanujquil hué in hué Herodes. Noje cataya Susana huan cataloaya mífac oc sequin sihuames. In sihuames quinpalehuiloaya moxtin ca inmintomin huan ca in hual quicuaje.

Ilajnamiquiltisli in latocani

(Mt. 13:1-9; Mr. 4:1-9)

⁴Huan monechiculoaya mífac, quistihualaloaya pa mochi caltilan ca capic yihual cataya. Huan yihual quinlaquetzilic ca se lapuhualisli quinami laijnamiquiltisli pa quinmaxtisqueiaya, quinmilic:

⁵—Quisac se latocani pa quitocasquiaya ilatocli. Quixintiahuiaya, sequin latocli huetzije pa itenco in ojrito huan cataloaya laticalsali huan in tutomes quincuaje. ⁶Huetziaya oc sequin latocli pan in xaltel, ixuaje in latocli huan jan ajnaxcan pilinije pampa amo cataya lapaltijcal. ⁷Huetzije oc sequin latocli lajco pin huiztilan, moscaltiloaya in huizli capa ixualoaya in ipacholimes in latocli huan in pacholimes mosaluje pin huiztilan huan miquije. ⁸Huetzije oc sequin latocli pan lali cuali huan moscaltije huan temacaje mífac laquilyo, cien pa se latocli hual quixinic in latocani.

Lamic quinmilic Jesús in laijnamiquiltisli, quintzajtzilic: —Aqui yes hual quinpía inacajmes pa lacaquis, ma lacaqui pampa etic pa quimatis se len quinequi quijtúa.

¿Leca quinmilía innojen laijnamiquiltisli?

(Mt. 13:10-17; Mr. 4:10-12)

⁹Cuaquinon pehuaje quilajlanije imonextiliniymes len quinequiaya quijtu in laijnamiquiltisli, in lapuhualisli calica yihual quinmaxtiaya, cataya lamaxtilisli lalatali. ¹⁰Huan Jesús quinmilic:

—Amhuanten anmitzmacahuilítia Dios pa anquimatis innojen lajtomes hual anmitznextilía quinami yihual huelitía, innojen hual jan tehuanten ticmatilo san. Huan in oc sequin niqinlaquetzilía ilajtol Dios ca laijnamiquiltisli ca lamaxtilisli lalatali. Yoje, mas que quizticate, Dios quinchihuilía pa camo quitasi len quinequi quijtúa. Noje, mas que quicacticate, Dios quinchihuilía pa camo ajsisi quimatisi len quinequi quijtúa.

Jesús quinmilía len quinequi quijtúa in laijnamiquiltisli

(Mt. 13:18-23; Mr. 4:13-20)

¹¹Inon unca hual quinequi quijtúa in laijnamiquiltisli: ¹²In latocli

unca ilajtol Dios. In latocli pa itenco in ojlitto cate quinami aquinojen hual quicaquilo ilajtol Dios, cuaquín huala in lili, quinquixtilía in lajtol pa laijtc inminyolo capa ayamo quineltocape. In lili quichíac inon pa camo yelosquiaya laquixtili pin ipolehuilisli inminlajlaculisli sinda quinequiloaya quineltocono. ¹³In latocli pin lali amo telahuac pan ipampa in xaltel cate quinami yehuanten hual quicaquilo ilajtol huan quineltocono ca paquilisli. Ma yoje, amo quilalilo in lajtol pa inminyolo quinami se ilalhuayol se cuahuil. Quineltocono san se nadita, huan sinda quipialo pa panusi lacocoltilisli pampa quineltocono in lajtol, cuaquinon mijcuanilo, yajmo quixtocono in lajtol. ¹⁴In latocli hual huetzije pin huiztilan, yehuanten cate quinami lacames hual quicaquije in lajtol huan quijnamiquilo niman míac in quinami yalo yulilo ca paquilisli. Yoje ca yehuanten ilajtol Dios amo moscaltía pa inminyolo, unca quinami se pacholi tzinlalajquil hual moscaltía pin lali, amo quiman yucsi. ¹⁵Huan in latocli hual huetzije pin lali cuali, yehuanten cate quinami lacames hual quicaquilo ilajtol Dios huan monextililo cuali pa camo quilcahuasi. Huan in lajtol quinchihuilía pa quichijtiási len cuali, amo siahuilo pa yulisi quichijtcate yoje.

Ilanextilisli in tapalquita calica lahuilo

(Mr. 4:21-25)

¹⁶Huan amaqui quitzacua se tapalquita calica lahuilo ca oc se tapalcal sinda quilalaltía. Huan amo quilalía itzindan se lapexli. Quema, quilalía capa mocahuas nestica pa quinalhuis yehuanten hual calacticate pin cali. ¹⁷Annimitzilía inon pampa amo unca nindeno lalatili hual amo yes laitali. Jo quema, mochi hual

amo quimatilo, inon quimatisi se tonali. ¹⁸Pampín xilaiztiacan quinami annehcaqui, xichcaquican cuali. Sinda annehcaqui cuali, anmonextilis niman míac in hual unca pa ilajtol Dios. Huan sinda amo annehcaqui cuali, Dios anmitzquixtilis in hual anquijtúa pampa anmonextilic pan ipampa ilajtol.

Inantzin huan icnían Jesús

(Mt. 12:46-50; Mr. 3:31-35)

¹⁹Cuaquinon hualaje inantzin huan icnían Jesús ca yihual, huan amo huil ajsije capa yihual pampa cataloaya míac hual quiyahualuloaya Jesús.

²⁰Pampín quilamachiltijque Jesús, quilijque:

—Moqueztcate pa quiahuac monantzin huan mocnían quinecticate mitzitalo.

²¹Huan yihual quinnanquilec yehuanten, quinmilic:

—Nonantzin huan nocnían cate yehuanten hual quicaquilo ilajtol Dios huan quichihualo in hual quijtúa.

Jesús quisehuía in ijyecal huan in al huejcalan

(Mt. 8:23-27; Mr. 4:35-41)

²²Cataya pan se tonali quiman panuloaya mochi innojen, calaquiaya Jesús pa lajco in al huejcalan ca se barquito. Huan imonextilinijmes cataloaya ca yihual. Yihual quinmilic:

—Ma ticpanahuican in al huejcalan ca yoje itenco (pa analco).

Yoje quipanajtiaje. ²³Huan uyajtiaje ca in barquito, cochic Jesús. Cuaquín quinmajsic se ijyecal chicahuac lajco capa yahuilooaya pin al huejcalan. Pehuaya calaqui al pin barquito, pejtiahuiaya temi huan ca nadita yahuiaya moatocti.

²⁴Quejxiltitiquisajque Jesús, quitzajtzilijtataloaya:

—iLamaxtini, Lamaxtini! iTipolehuisi! Ejsac Jesús, cajuac in ijyecal huan in al hual majcoctataya, yojque mosehuic,

mocahuac jan sejpa in al huejcalan.

²⁵ Cuaquinon Jesús quinmilic:

—¿Leca anmomajtic? ¿Leca amo anquimati anquilalía anmolaneltoocalisli ca nehual?

Cuaquín momajtiloaya yehuanten, amo huil mocahualoaya pa quijtulosquiaya pa inminyolo pampa quiپیaya Jesús lahueliltilisli hué. Huan moililoaya se ca oc se:

—¿Len yes in lalcal? Yihual quinmajua in ijyecal huan in al, huan quineltocalo.

In lalcal hual quiپیaya in ijyecal amo cuali

(Mt. 8:28-34; Mr. 5:1-20)

²⁶ Cuaquinon ajsijque pa yoje itenco (analco) in al huejcalan. Nepa cataya inminlali in lacames gerasatecos.

Nepa pa itenco in al huejcalan huil moitaya in lalticpan Galilea ca yoje itenco (analco) umpa capa hualajque.

²⁷ Quisac Jesús pin barquito pan itenco in al. Cuaquinon quinamiquic se lalcal hual yulini pin caltilan, quinپیaya ijyecames amo cuajcuali. Quiپیaya míac xixihuil amo molaquentiaya ca inahuas, huan amo quinequiaya chantia pa se cali. Chantia pa cuevas (ostumes) hual quinchihuajque pa lajlajitic. Nepa quinlalilosquiaya inminmijquimes. ²⁸ Huan jan axcan yihual quitac Jesús, quitzajtzilic, huetzic quimolancuacuetzilijtataya, huan ca lajtol chicahuac quilic:

—iXiquisa huan xichcahua, Jesús, tehual ti'ixolol in Dios hual chanti niman pa pani pin cielo! iNimitzilía ca noyolo, amo xichcocolti!

²⁹ Tzajtzcic yoje in ijyecal amo cuali, pampa Jesús quinmiliaya in ijyecalera pa quisalosquiaya ilajitic in lalcal. Quimpiaya míac xixihuimes in ijyecal pehuac quiquitzquic chicahuac in lalcal. Lacames quilpiloaya imajmajuan huan icxihuajmes ca teposli, yojque quiپیaloaya. Ma yoje,

yihual quincotonaya in teposli huan in ijyecal amo cuali quilaluxtiaya ca capic amaqui chantia. ³⁰ Huan Jesús quilajlanic:

—¿Quinami timotoca?

Huan in ijyecal quinanquilic:

—Nimotoca Legión.

Legión quinequi quijtúa míac, pampa calaquijque míac ijyecames amo cuajcuali pa lajitic in lalcal.

³¹ Huan innojen ijyecames pehuaje quitemachijque Jesús ca mochi inminyolo pa camo quintilanisquiaya pa capa Dios yahui quintzacua, capa amo quiman huil quisalosquiaya. ³² Huan nepa cataya niman míac coyamimes (cuchis), lacuajtataloaya pan in loma (tepel). In ijyecames quitemachijque Jesús pa quinmacahuiltisquiaya calaquilo ca lajitic innojen coyamimes.

³³ Yojque quinmacahuiltic. Cuaquín quisajque in ijyecames pin lalcal, calaquijque ca lajitic innojen coyamimes. Molalujtiquisajque in coyamimes pa iixlán in loma pa temuán (temuayan), molasajque pa in al huejcalan huan moatoctijque. ³⁴ Quitajque len panuc yehuanten hual quinmiztataloaya in coyamimes. Pampín cholujque huan quilamachiltijque pin caltilan huan pin calerías itenco in caltilan inon hual panuc. ³⁵ Cuaquinon quisajque yehuanten pa quitalosquiaya len panuc, hualajque capa cataya Jesús huan in lalcal huan nepa quitaje molalijtataya in lalcal. Axcan quisajque pa yihual in ijyecames, axcan cataya lalaquentili ca inahuas. Yajmo tzajtztinemiaya quinami se hual amo quiñamiquí, huan yajmo cualantnemiaya, nepa cataya molalijtataya pa icxihuajmes Jesús. Pampín momajtiloaya in lacames.

³⁶ Huan yehuanten hual quitajque len panuc quinlamachiltijque quinami cataya lapajtli in lalcal hual in ijyecames quiquitzquinijme. ³⁷ Cuaquinon moxtin yehuanten pa inminlali in

gerasatecos quitemachijque Jesús pa mohuicasquiaya quistataya pa inminlali yehuanten, pampa momajtiloaya. Yojque uyac pa calaquisquiaya Jesús pin barquito pa mocuepas. ³⁸Huan in lalac hual capa yihual quisajque in ijyecames quitemachic Jesús pa quimacahuiltis pa cayasquiaya ca yihual. Ma yoje, Jesús quitilanic pa yasquiaya, quilic:

³⁹—Ximocuepa pa mochan huan xiquinpuhuili mochi hual mijchihuilic Dios.

Huan yihual mohuicaya pa mochi caltilan lamachiltitinemiaya mochi hual quichihuilic Jesús.

Jesús quipajtía se sihual huan quiyuliltía ixól sihual Jairo

(Mt. 9:18-26; Mr. 5:21-43)

⁴⁰Cuaquinon Jesús mocuepac pa yoje itenco (analco) in al huejcalan pin lalticpan Galilea. Nepa quinamiquijque mías lalalera, pampa moxtin quichialoaya. ⁴¹Huan umpa, xiquitacan, hualac se lalac itocaya Jairo, yihual yec se ihué in tiopan. Yihual molasac ilaixpan Jesús pa icxihuajmes, quitemachiaya pa yasquiaya pa ichan. ⁴²Quipiaya se xolol sihual, quil, quinpiaya majlacliuanome (doce) xixihuil, huan yahuiaya polehui, quil, huan in Jairo amo quiapiaya oc se xolol. Huan yahuiyoaya in mías lalalera cajsitiahuiyoaya inahuac Jesús. ⁴³Yahuiaya ca yehuanten se sihual hual quinpiaya doce xixihuil pehuaya quicocu se cocolisli hual iesli quisaya. Quinlaxlahuiaya sepa huan oc sepa in lapajtinijmes huan axan yajmo quicahuilic se tomin. Amo hual quipajtijque in lapajtinijmes, amo jan se ca yehuanten. ⁴⁴Yoje ajsic pa Jesús itepotzcon, quimatocac itenco inahuas. Huan jan ajnaxcan mocahuac iesli in sihual, yajmo quisaya. ⁴⁵Cuaquinon Jesús quijituc:

—¿Aqui nechmatocac?

Quilijque moxtin pampa no, amo quimatocajque. Huan Pedro quilic:
—Lamaxtini, mitzajsitialo monahuac in lalalera, yehuanten mijchihuic. ¿Leca tilajlanía: “Aqui nechmatocac”?

⁴⁶Jesús quilic:

—Nechmatocac se. Nicmati inon, pampa quisac pa nehual nolahuelilitisli calica nitapajtía.

⁴⁷Yojque quimatic in sihual amo huil quimolatic Jesús. Yuyucatihualac, huetzic ilaixpan, quilamachiltic Jesús inminlaxpan moxtin leca yihual quimatocac huan quilic quinami pajtic jan ajnaxcan. ⁴⁸Cuaquín Jesús quilic:

—Nito, tipajtic pampa tilaneltocac. Ximohuica, xicaya jan cuali ca Dios.

⁴⁹Ayamo laquisac lajtuc Jesús huan hualac se hual cataya pa icali Jairo, quilic:

—Axcan polehuic moxolol sihual. Yajmo ximaca tequil in lamaxtini.

⁵⁰Ma yoje, inon quicaquic Jesús, huan quilic:

—Amo ximomajti, Jairo, jan xilaneltoaca san, huan moxolol yes lapajtili.

⁵¹Cuaquinon uyac pa ichan Jairo, huan amo quimacahuilic pa calaquilosquiaya ca yihual oc sequin, jan Pedro huan Juan huan Jacobo huan itajtzin in xolol sihual huan inantzin san. ⁵²Chocaloaya huan tzajtziloaya moxtin, motecuילוaya inminlaxpan itzindan in huajcol pampa polehuic in xolol, quinccocuhuaya inminyolo. Ma yoje, Jesús quinmilic:

⁵³—Amo xichocacan. Amo polehuic in xól, jan coxtica san.

Yehuanten quihuitzquilijque Jesús pampa quimatiloaya in xolol yajmo yultataya. ⁵⁴Ma yoje, Jesús quinquitzquic imajmajuan in xolol, quilic ca lajtol chicahuac:

—Muachita, ximoquetza.

⁵⁵Jan ajnaxcan mocuepac iyulilislilajitc yihual iyolo huan

moquetzac. Cuaquín Jesús quinmilic pa quilacualtilosquiaya. ⁵⁶Yoje mochahualoaya moizticate ca lamajtilisli itajtztizían. Ma yoje, Jesús quinmilic pa camo quililosquiaya amaqui len panuc.

Jesús quintilanía in doce imonextilinijmes pa oc sequin caltilan

(Mt. 10:5-15; Mr. 6:7-13)

9 Cuaquinon quinahuatic Jesús pa monechiculosquiaya capa yihual in doce imonextilinijmes. Quinmacac lahuelilitisli pa yes inminyaxca pa quinquixtilisli lacames iyecames amo cuajcuali. Quinmacac in lahuelilitisli pa quinpajtilosquiaya aquinojen hual quipialoaya len yes cocolisli. ²Cuaquinon quintilanic pa quilamachiltislosquiaya cajcapa yes inminlaixpan lacames quinami Dios huelitía, huan quinmilic pa quinpajtilosquiaya. ³Quinmilic:

—Amo xiquihuicacan nindeno pa anmo'ojli, amo xiquihuicacan cuahuil pa anmopalehuis annejnemis, amo xiquihuicacan xotopa huan len pa anquicuas huan tomin. Huan xiquihuicacan jan se laquen san, sejse huan sejse ca amhuanten.

⁴Huan ancalaquis pa ichan se hual anmitznotzas pa anmocahuas, cuaquín nepa xichantican anquistía mojmosta pa nepa pa anquilamachiltitinemis quinami Dios huelitía. ⁵Huan sinda yehuanten anmiztojtocasi pampa amo quixtocalo nolamachiltisli cuali, cuaquín quiman anquisas pa in caltilan, xictzejtzeluilican in lalpotocli hual salijtica pan anmolacsames. Yoje momatis pampa in lacames anmijchihuilic len niman amo cuali.

⁶Cuaquinon mohuicajque Jesús ilanahuatinijmes, yahuilooaya pa míac caltilan tijtipichin sejse huan sejse, quinlamachiltitinemiloaya ilamachiltisli cuali Jesús huan quinpajtitinemiloaya cocoxquimes.

Herodes quimahuilía da unca Jesús o amo unca

(Mt. 14:1-12; Mr. 6:14-29)

⁷Huan quicaquic Herodes in hué quinami molaquetzilijtinemiloaya lacames, molaquetzilijtinemiloaya mochi hual quichihuaya Jesús. Pampín amo quimatiaya len quijtusquiaya Herodes pampa quijtuloaya sequin pampa Juan Lacuayatequini axcan yuliaya oc sejpa, quisac pa capa in mijquimes. ⁸Huan quijtuloaya oc sequin pampa Elías ilajtuni Dios, ilajtuni hual yulini pa yina, axcan mocuepac pan lalticpan. Oc sequin quijtuloaya pampa yuliaya oc sejpa oc se ilajtuni Dios hual yulini pa yina quinami yulinijme innojen ilajtunijmes Dios hual quitequipanuulinijme pa yina.

⁹Huan Herodes quilic:

—Nehual nilatilanic pa quicotonilisqui Juan iquixlan. Axcan, ¿aqui in se hual mojmosta nicmaztica len quichijtica?

Huan pehuaya quitemu Herodes quinami quitasquiaya Jesús.

Jesús quinlacualtía macuili mil lacames

(Mt. 14:13-21; Mr. 6:30-44; Jn. 6:1-14)

¹⁰Ajsic in tonali quiman mocuepajque ilanahuatinijmes Jesús, quipuhuilijque mochi sejse lachihualisli hual quichihuajque. Cuaquín quinhuicac Jesús ca yihual, huan mohuicajque. Uyajque ajsijque capa cataloaya inminhuían capa amo huejca cataya se caltilan itocaya Betsaida. ¹¹Ma yoje, quimatijque in míac lacames ca capic uyac Jesús, pampín quitocajque. Ajsijque yehuanten, quinpialtic cuali Jesús huan pehuac quinlaquetzilic pa quimatilosquiaya quinami Dios huelitía. Huan quinpajtic yehuanten hual quipialoaya cocolisli. ¹²Cuaquinon pehuac tiolactic, huan hualajque in doce ilanahuatinijmes, quinmilic:

—Xiquintilani in lacalera pa yasi pa innojen caltilan tijtipichin huan in calerías pa totenco. Yojque quitasi capa huil cochisi pa layúa huan quitasi len quicuasi. Amo unca nindeno nican pampa ticate nican capa amaqui chantitica.

¹³Huan Jesús quinmilic:

—Amhuanten xiquinmacacan len quicuasi.

Huan yehuanten quilijque:

—Amo ticpialo nindeno, jan ticpialo macuili panes huan ome michimes. Sinda ticnequilo ticanalo oc sequin, cuaquín ticpiasi pa tiasi tiquincuhuilisi len pa quicuasi moxtin.

¹⁴Cataya quinami macuili mil lacames. Cuaquín Jesús quinmilic ilanahuatinijmes, quinmilic: —Xiquinmilican pa molalisi monechicujticate quinami cincuenta huan cincuenta lacames.

¹⁵Yojque quichihujque, quinchihuilijque pa molalilosquiaya, quinmolaliltijque moxtin. ¹⁶Cuaquinon quinmanac Jesús in macuili panes huan in ome michimes, lachíac pa in cielo (ilhuicac), quisehuic Dios, pehuac quincapahuac ca lajlajco in panes huan in michimes, quinmacatinemiaya imonextilinjmes pa yehuanten quinhuiquilijtinemilosquiaya in lacalera. ¹⁷Yojque lacualoaya in lacalera, pachihujque moxtin. Huan quinpejpenajque imonextilinjmes in lajlajco lacapehuali hual quincahuajque, cataloaya doce chiquihuimes tentataloaya ca innojen pa yehuanten.

Pedro quijtua pampa Jesús unca in Cristo

(Mt. 16:13-19; Mr. 8:27-29)

¹⁸Cataya se tonali Jesús quilajlaniaya Dios, huan umpa cataloaya ca yihual jan imonextilinjmes san. Huan Jesús quinlajlanic:

—Molaquetzilijticate lacames nonahuac nehual, ¿aqui quijitulo pampa nehual niunca?

¹⁹Quinanquilijque:

—Sequin quijtulo pampa tehual tiunca Juan Lacuayatequini. Oc sequin quijtulo pampa tehual tiElías ilajtuni Dios. Huan oc sequin quijtulo tehual tiunca se ilajtuni Dios hual yulini pa yina huan axan yultica oc sejpa.

Cuaquinon Jesús quinmilic:

—Huan amhuanten, ¿aqui anquijtua pampa nehual niunca?

²⁰Huan Pedro quinanquilic:

—Tehual tiunca iCristo Dios.

Jesús quinlamachiltía pampa yahui miqui

(Mt. 16:20-28; Mr. 8:30-9:1)

²¹Cuaquinon quinmilic chicahuac Jesús pa camo quillosquiaya amaqui inon, quinmilic:

²²—Nehual ilacal in cielo nicpías pa nipanus míac lacocoltilisli. In hueyenten huan in tiopistas huejué huan in lamaxtinijmes nejchihuilisi pa nipanus inon, nechtojpheuasqui. Yehuanten quilalisi pa quichihuasi se lajtulisli pa nechquitzquisi, cuaquinon nechmictisi. Ma yoje, quiman panusi ye tonalijmes, cuaquín niyulis oc sejpa.

²³Cuaquinon quinnotzac Jesús mochi in lacames, quinmilic:

—Sinda se quinequi ye nomonextilini, ma camo yuli quichijtica len yihual quinequi. Quipía pa yulis quichijtica len quinequi Dios. Huan ma quimati mojmosta pampa quipía pa panus lacocoltilisli sinda nechtoctías, quinami nehual nipanus lacocoltilisli.

²⁴In annimitzilía pampa sinda yuli se quitemujtinemi quinami canas mochi len calica huil mopaquiltis nican capa yultica pan lalticpan, cuaquín Dios amo quimacas in se in yulilisli hual jan quipía Dios san pa quimacas yihual. Huan sinda se yuli quitemujtinemi quinami quichías mochi quinami nehual nicnequi, huan sinda amo quimonotzilía nindeno inon

hual unca pin lalticpan calica huil mopaquiltía, cuaquín Dios quimacas in se in yulilislí hual amo quiman lamis. ²⁵¿Quinami quipalehuis se lacal sinda canas mochi hual unca pin lalticpan calica mopaquiltis huan cuaquín polehuis? Amo quipalehuis nindeno sinda amo quipías in yulilislí calica Dios quinequi quiyuliltía. ²⁶Pampín, aquí yes hual pinahua nonahuac nehual huan len niqijtúa, yoje nehual ilacal in cielo nipinahuas inahuac in se. Quemá, nehual nipinahuas inahuac in se pa in tonali quiman nihualas ca laixpelalislí cualtichin pan lalticpan ca mífac nochicahualislí nehual huan ichicahualislí noTajtzin huan inminchicahualislí in lanahuatinijmes pin cielo hual techtequipanuililo yihual huan nehual. ²⁷Huan neli annimitzilía. Sequin hual nican moquezticate neli yulisi pa quitasi quinami cayas pa in tonali hual Dios huelitía pan lalticpan.

Jesús nesi laixpelatica

(Mt. 17:1-8; Mr. 9:2-8)

²⁸Quiman lamis quinmilic Jesús in lajtomes, panuje quinami chicué tonalijmes, huan quinhuicac Pedro huan Juan huan Jacobo, panquisaje pan se loma (tepel) pa nepa Jesús quilajlanisquiaya Dios. ²⁹Huan quiman lajlantataya yihual, mopalac iixco ca oc se lanextilislí. Itzotzomajli nesiaya iztatataya, laixpelatataya chicahuac. ³⁰Huan moitilijque ome lacames laqueztataloaya ca yihual. Yehuanten cataloaya Moisés huan Elías ilajtunijmes Dios hual yulinijme pa yina. ³¹Yehuanten noje moitaloaya laixpelatataloaya, ca Jesús molaquetzililoaya quinami quipiaya pa miquisquiaya Jesús pa Jerusalén. ³²Quipialoaya mífac cochilislí Pedro huan in oc sequin imonextiliniijmes. Ma yoje, ejsatiquisajque huan quitajque ilaixpelalislí chicahuac

Jesús. Noje quinmitaje in omenten hual moqueztataloaya ca yihual.

³³Cataloaya mijcuanataloaya in omenten capa Jesús moqueztataya, huan Pedro quilic:

—Lamaxtini, unca cuali pampa ticate nican. Ma tiquinchihuacan ye calitos, se pa tehual huan se pa Moisés huan se pa Elías.

Amo quimatiaya Pedro len quiliaya.

³⁴Ma yoje, quijtutataya inon, hualac se mextemil, quintzacuac. Huan momajtijque quiman quintzacuac in mextemil. ³⁵Cuaquinon mocaquic se lajtol quistataya pin mextemil, quijtuc: —In noxolol hual niclasojla mífac.

Xicayacan anquicactica len yes quijtúa.

³⁶Quiman lamis mocaquic in lajtol, jan moitilic Jesús ihuían san. Huan yehuanten amo nahuatijque nindeno pa innojen tonalijmes, amo quilamachiltijque amaqui in hual quitaje.

Jesús quiquixtilía se ijyecal amo cuali se muachito

(Mt. 17:14-21; Mr. 9:14-29)

³⁷Cataya mostatica quiman temujque pani in loma (tepel), quinamiquijque Jesús se lacalera. ³⁸Huan se lacal ca yehuanten quinotzac Jesús chicahuac, quilic:

—Lamaxtini, nicnequi pa tijchihuilis se cuali. Xichitili noxól, pampa jan in se san nicpía. ³⁹Huan ixiquita! Se ijyecal cana huan jan ajnaxcan quilatzajtiltía, quitzejtzeltúa, cuaquín quisa posunquil pa icamac huan quicahuilía aniles, quixacualúa, amo quinequi quimacahua. ⁴⁰Huan niqintemachic momonextiliniijmes pa quiquixtililosquiaya, huan amo huil quiquixtilije.

⁴¹Jesús quinanquilic:

—iAmhuanten hual anyultica axan! iAmo anlaneltoaca, anmitzmalinilic in lili anmoyolo pa se ojli amo cuali!

¿Quichi tonalijmes nicpías pa nicayas ca amhuanten? ¿Quichi tonalijmes nicpías pa niqitas cocolisli pa noyolo pampa amo annehneltoaca? Xichualiquili moxól nican.

⁴²Huan quihualiquilijtataya itajtzin, in ijyecal canac in xolol, quitzejtzelum niman chichahuac, quimayajtiquisac.

Jan axcan Jesús cajcajuac in ijyecal amo cuali huan quipajtic in xolol, cuaquinon quicuepilic in xolol itajtzin.

⁴³Pampín mocahualoaya moiztataloaya in lacames ca lamajtilisli pampa quitajque Dios ilahueliltilisli hué.

Jesús quinlamachiltía oc sejpa pampa yahui miqui

(Mt. 17:22-23; Mr. 9:30-32)

Huan quiman moiztataloaya ca lamajtilisli moxtin mochi innojen huejué hual quinchijtataya Jesús, yihual quinmilic imonextilinjmes:

⁴⁴—Xiclalican inon pa anmotzontecon hual annimitzilía: Amo huejcahuas ajsis in tonali quiman nehual ilacal in cielo nechtemacasi ca lacames hual cate Dios ilacocolininjmes.

⁴⁵Ma yoje, yehuanten amo quimatiloaya len quinequiloaya quiqtulo in lajtomes, quinmolatililoaya len quinequiloaya quiqtulo in lajtomes pa yoje amo quimatilosquiaya yehuanten. Huan momajtiloaya pa quilajlanilosquiaya len quinequiloaya quiqtulo in lajtomes.

¿Aqui unca in hué hual quinlaicanas?

(Mt. 18:1-5; Mr. 9:33-37)

⁴⁶Huan pehualoaya quinmolaxililo lajtomes yehuanten, laquetzaloya pa quimatisi calía ca yehuanten yahuiaya ye in lacal hué. ⁴⁷Huan Jesús momachiltic inon hual quiqtuloaya laijtic inminyolo. Cuaquinon canac se xolotzindi, quiquetzac inahuac ⁴⁸huan quinmilic:

—Se hual quimosehuiltía se xól tipichin pa quichihuilis mochi hual monequi, huan quichía inon pampa quineltoca pampa Dios nechtilanic pin lalticpan, cuaquín yoje in se nechmosehuiltía nehual. Huan aqui yes hual nechmosehuiltía, yoje quimosehuiltía yihual hual nechtilanic pin lalticpan. Yoje, yihual hual unca in niman tipichin ca anmoxtin cayas in niman hué.

Unca pa tehuanten aqui hual amo tejtzacuilía tehuanten

(Mr. 9:38-40)

⁴⁹Cuaquinon Juan quilic: —Lamaxtini, tiquitaje se hual quinquixtiliaya ijyecames in lacames pan ipampa molahueliltilisli. Huan tiquilije pa camo quichihuasquiaya pampa yihual amo techtoaca.

⁵⁰Jesús quilic: —Amo xiclatzacuilican, pampa aqui yes hual amo tejtzacuilía yoje techpalehuía.

Jesús quinmajua Jacobo huan Juan

⁵¹Ajsitihualaya in tonali hual Dios yahuiaya quilejculi Jesús pin cielo, huan molalilic Jesús pa yas pa Jerusalén huan amaqi huil quitzacuilíaya.

⁵²Quintilanic lanahuatininjmes pa lamachiltitilosquiaya pampa yihual yahuiaya huala. Cuaquín uyaje in lanahuatininjmes, ajsijque pa se icaltilan in samaritecos pa quilajlanilosquiaya sinda quipialoaya calijtic capa mocahuasquiaya Jesús. ⁵³Huan in samaritecos amo quinequiloaya pa ajsis capa yehuanten, pampa yihual yec se judío hual yahuiaya pa Jerusalén. ⁵⁴Huan quimatijque inon imonextilinjmes Jacobo huan Juan, yoje quilijque:

—Lamaxtini, éticnequi pa tiquilisi pa temus itixuxli in cielo pa lamis

quinchichinus yehuanten? Yoje pa yina quinchihuilic Elías in guaches.

⁵⁵ Momalinac Jesús, quinmiztataya Juan huan Jacobo, quinmajuac, quinmilic:

—Ayamo anquimati quinami niquijtúa lajitic nehual. Nehual ilacal in cielo amo nihualaya pa niquinmictisquiaya lacames. Nihualaya pa niquinquixtilisquiaya pin ipolehuilisi inminlajlaculisi.

⁵⁶ Cuaquinon uyaje pa oc se caltilan.

Ome lacames quinequilo quitocalo

Jesús

(Mt. 8:19-22)

⁵⁷ Huan nejnentiياهوiloaya pa ojli, se lacal quilic Jesús:

—Tata, nicnequi nimitztoca ca capic yes tías tel.

⁵⁸ Jesús quilic:

—Quipialo in zorras inmincojcoyunqui, huan quinpialo inminchan in tutomes. Huan pa nehual ilacal in cielo amo unca capa nicpía nochan.

⁵⁹ Jesús quilic oc se lacal:

—Xichtoca nehual.

Huan yihual quilic:

—Xichmacahuiliti pa nías niclaltocas notajtzin. Cuaquín nimitztocas.

⁶⁰ Jesús quilic:

—Ma quinlaltocacan inminmijquimes yehuanten hual yulticate mas que pa inminyolo miquije. Huan tehual, xía xiquinlamachiliti lacames quinami huelitía Dios.

⁶¹ Oc se lacal quilic Jesús:

—Nimitztocas, Tata. Ma yoje, xinehmacahuiliti pa nimochicahuas ca yehuanten pa nochan. Cuaquinon nimitztocas.

⁶² Huan Jesús quilic:

—Sinda se pehua laxahua huan sejpa huan oc sejpa lachixtía pa itepotzcon, yihual amo monotza pa laxahuas. Noje, sinda se pehua nechtoaca huan sejpa

huan oc sejpa quijnamictica in hual quixtocaya pin tonalijmes quiman ayamo pehuac nechtoac, cuaquín yihual amo monotza pa cayas capa Dios huelitía.

Jesús quintilanía in setenta imonextilinijmes

10 Panujque innojen, quinsaluc in Tata Jesús oc sequin setenta, quintilanic oj'ome huan oj'ome pa yalosquiaya pa mochi caltilan capa yihual yahuiaya quinpaxaluili. ² Huan quinmilic:

—Cate mías hual yalo nechnehtocalo huan ticpialo pa tiquinnechicusi pa pehuas huelitis Dios pa inminyolo.

Yoje yes quinami se quipía se cuajmili hué pa lapixcas huan amo quipía mías lacames pa quipalehuisi pa lapixcas. Pampín xicte machican

in Teco hual unca Dios pa yihual quintijtilantiquisas mías oc sequin lacames pa techpalehuisi ca in

lapixcalisi. ³ Ximohuicacan axan, huan xiquitacan: Annimitztilantica amhuanten huan anunca quinami

borreguitos lajco capa cate coyomes.

⁴ Amo xiquihuicacan xotopa pa tomin, amo xiquihuicacan xiquipili pa anquihuictías len anquicuas, amo xiquihuicacan oc sequin ome lacsames.

Huan amo xiquinpialtitiacan in lacames hual anquinnamictías pa ojli.

⁵ Quiman ancalaquis pan aquí yes icali, xipehuacan ca anquilis: “Xicayacan ca Dios imosehuilisi amhuanten pa

in cali.” ⁶ Huan sinda nepa iteco in cali unca se lacal hual quinequi pa cayas ca Dios imosehuilisi, cuaquinon amhuanten anquimatis, huan yihual

cayas ca Dios imosehuilisi. Huan sinda iteco in cali amo quinequi caya ca Dios imosehuilisi, amhuanten anquimatis,

huan yihual amo cayas ca Dios imosehuilisi. ⁷ Huan xichantitiacan san pin cali capa anmitzajxiltisi.

Xijcuacan huan xicunican len yes anmitzmacasi, pampa unca iyaxca in tequipanujquil ilaxlahuilisli. Amo ximopalacan pa anchantis pa oc se cali pa in cali capa anpehuac anchantic.⁸ Huan calía yes caltilan ancalaquis huan anmitzajxiltis, xijcuacan len yes hual anmitzmacasi pa anquicuas.⁹ Xiquinpajtican in cocoxquimes, huan xiquinmilican: “Nican ca amhuanten axcan ajsitihualac in tonali quiman Dios huelitía.”¹⁰ Huan pin calía yes caltilan ancalaquis huan amo anmitzajxiltisi xiquisacan pa iojlimes in caltilan, xiquinmilican: ¹¹“Quema, ilalmoluncal anmolcaltilan hual salijtica capa tehuanten antimijtzejtzeluililo amhuanten. Yoje anquimatis pampa anquichíac len niman amo cuali pampa amo antechajxiltic tehuanten huan amo anquineltoac Dios ilamachiltisli cuali. Jan yoje, xicmatican pampa ajsitihualac in tonali quiman Dios huelitía.” Yoje xiquinmilican.¹² Annimitzílía inon: In tonali hual Dios quintojtocas ilaixpan yihual ipampa inminlaijlaculisli yehuanten pin lalticpan pa panusi polehuilisli hual amo quiman lamis, nepa yesi lacocoltili niman míac yehuanten hual yuliloaya pa in caltilan hual amo anmitzajxiltisi. Amo yoje míac yesi lacocoltili yehuanten hual yulinijme pin caltilan hué Sodoma, yehuanten in lacames ej'elehuis hual yulinijme pa yina.

Innojen caltilan hual amo quineltocajque

(Mt. 11:20-24)

¹³Huan iquichi anyahui ancaya lacocoltili, amhuanten hual anyuli pin caltilan Corazín! Huan iquichi anyahui ancaya lacocoltili amhuanten pa Betsaida! Pa amhuanten niquinchíac míac hual anmitzlapolultije huan anmocahuac anmoiztica ca lamajtilisli pampa anquitac Dios ilahueliltisli.

Ma yoje, amhuanten amo anquipalac anmoyolo pa anpehuasquiaya anlajnamiquía quinami Dios quinequi. Huan pa yina cataloaya in caltilan hué motocaya Tiro huan in caltilan hué Sidón. Huan sinda cataloaya lachihuali innojen huejué capa yehuanten, quipalaloaya inminyolo yehuanten pa lajnamiquilosquiaya quinami Dios quinequi. Jo quema, molaquentiloaya ca tzotzomajli xinqui huan molaliloaya pin tinextilan pa lanextilosquiaya quichi icnotiloaya pampa quichihuaque míac hual amo cuali.¹⁴ Ma yoje, amo míac panusi lacocoltilisli yehuanten hual yulinijme pa Tiro huan Sidón quinami anpanus amhuanten hual anchanti pa Corazín huan Betsaida pa in tonali hual Dios quintojtocas ilaixpan yihual pa camo lamisi pa yesi lacocoltili yehuanten pin lalticpan hual amo quineltocalo.¹⁵ Huan amhuanten hual anchanti pa Capernaum, ¿cuajnesi anquijtúa ancayas se caltilan hual yehuanten pin cielo anmitzlasojlasi míac? Amo quiman. Amhuanten antemus capa cate in mijquimes, yajmo annesis.

¹⁶‘Aqui hual quicaqui len anquijtúa amhuanten nomonextilinjmes yoje quicaquía inon hual niquijtúa nehual. Huan aqui hual amo anmitzcaquía, yoje amo nechcaquía nel. Huan aqui hual amo nechcaquía, yoje amo quicaquía Dios hual nechtilanic.

Yojque quinmilic Jesús imonextilinjmes. Cuaquinon mohucajque.

Mocuepalo in setenta capa unca Jesús

¹⁷Panuje tonaljmes, mocuepajque ca niman míac paquilisli in setenta ca Jesús, niman pactataloaya, quilijque: —Tata, yehuanten in ijyecames amo cuajcuali techneltocalo pampa titechmacac tehual molahueliltisli hual ticpía pampa tel ¡Cristo de Dios.

18 Jesús quinmilic:

—Nolacocolini Satanás quipiani ilahueliltilisli hué calica quinequini mopalehuiaya pa ajsisquiaya pin cielo. Ma yoje, axcan unca lasulahuali. Unca quinami niqitac hueztihualaya pin cielo quinami lapelanilisli, jan ajnaxcan yihual cataya lasulahuali.

19 Xiquitacan. Annimitzmacac lajtol chicahuac calica anquipías lahueliltilisli pa anquinsulahuas nolacocolinijmes hual cate quinami cuhames huan culomes. Yes quinami anquintelicsa nolacocolinijmes. Quema, huan annimitzmacac nolajtol chicahuac calica anquipías lahueliltilisli pa anquisulahuas huan anquixijxicus mochi ichicahualisli in lacocolini. Huan amo huil anmijchihuilisli nindeno pa anmijtzacuulis. **20** Ma yoje, amo xicayacan anpactica jan pampa anmitzneltoalo in ijyecames amo cuajcuali. Quema, xicayacan anpactica pampa quinmijcuiluc Dios anmotocajmes nepa pin cielo.

Quipía paquilisli Jesús

(Mt. 11:25-27; 13:16-17)

21 Axcan in Espíritu Santo quimacac Jesús mías paquilisli, pampín ca paquilisli quilic:

—Tehual noTajtzin, tel iTeco in cielo huan in lalticpan, nimitzilía inminlaixpan moxtin quinami timonotza pa timitzilisi quinami ticpía mochi lahueyilisli. Timonotza pa ticpías in, pampa tiqintzacuilic pa camo quimatisi innojen lachihualisli hual lanextilía quinami tihuelitía, tiqintzacuilic yehuanten hual quijtulo pampa quimatilo. Quijtulo pampa amo monequi pa tiqinpalehuis tehual. Jo quema, tiqintzacuilic yehuanten huan ma yoje tiqinnextilic yehuanten hual quimatilo pampa monequi pa tiqinpalehuis tehual. Quema, noTajtzin, inon ticchihuac pampa tiqitac cuali pa ticchihuasquiaya yoje.

22 Cuaquinon Jesús quinmilic imonextilinijmes:

—Nehmacac noTajtzin nehual mochi lahueliltilisli huan nechmacac mochi len quichíac. Huan amo unca oc se, jan Dios in Tajtzin san hual quimati aqui niunca nehual ixól. Huan amo unca oc se, jan nehual san hual quimati aqui unca in Tajtzin Dios. No, amo unca oc se, jan nehual san huan aqui yes hual nicnequi nicnextili aqui unca noTajtzin.

23 Cuaquinon momalinac quinmiztataya imonextilinijmes, quinmilic pa jan yehuanten san quicaquilosquiaya, quinmilic:

—Xicayacan ca niman mías paquilisli amhuanten pampa anquinmiztica innojen hual panujtcate anmoyampa.

24 In annimitzilía pampa cataloaya mías ilajtunijmes Dios huan mías huejueyenten hual quinequiloaya quinmitalo innojen hual amhuanten anquinmita, huan ma yoje amo quinmitaje. Huan quinequiloaya quicaquilo innojen hual anquinaqui, huan amo quicaquije.

Jesús quinlapuhuilía in hual quichíac in cuali samaritano

25 Cuaquinon moquetzac se ilamaxtini inminlajtol in judíos, quinequiaya quichihuilisli pa quijtsquiaya Jesús len lajtol calica huil quimotexpahuilisquiaya, quilajlanic:

—Lamaxtini, ¿len nicchías pa nicanas yulilisli hual amo quiman lamis?

26 Jesús quinanquilic:

—¿Len unca lajcuiluli pa ilajtol Dios? ¿Len anmitznextilía pin lajtol?

27 Quinanquilic ilamaxtini in lajtol, quilic:

—In lajtol quijtua: “Ticlasojlas in Tata moDios ca mochi quinami huil ticlasojla pa moyolo huan ca mochi quinami huil ticlasojla pa moyulilisli huan ca mochi mochicahualisli huan ca mochi molaijnamiqilisli. Huan

ticlasojlas in oc se hual unca ca tehual san quinami tehual timolasojla.”

²⁸ Jesús quilic:

—Cuali tilananquilic. Xicchía inon huan amo tilamis tiyulis.

²⁹ Ma yoje, in lamaxtini quinequiaya monapati pampa Jesús quilic inon.

Pampín quilajlanic:

—Huan ¿aqui tiquijtúa unca in oc se hual nicpía pa niclasojlas?

³⁰ Canac Jesús in lajtol, quilic:

—Cataya se lacal quisac pa Jerusalén, temujtiahuiaya pa in caltilan Jérico.

Quinnamiquic sequin laxtequinijmes hual quitecuaje huan quixtequilije mochi, quiquixtilije itzotzomajli, cuaquín uyaje, quicahuaje lastataya in lacal, ca je nadita miquiaya. ³¹ Huan quinami panuc, yajtihualac se tiopista pa in ojli, quitac in lacal, panuc ca yoje pa in ojli. ³² Cuaquín hualac se levita (se de yehuanten hual tequipanulo pin tiopan hué), huan quitac. Yihual noje panuc ca yoje pa in ojli, quinami in tiopista. ³³ Cuaquinon umpa panujtihualaya se lacal samariteco hual amo anquixtoca. Quipanajtihualaya tola. Quitac in lacal huan quicniliaya yihual. ³⁴ Hualac ca yihual, quinlalilic dangos pin sahuames capa quitecuaje, quinxahuilic ca chahuac huan iayo uva coc. Cuaquinon quilejcultic pan yihual iburro, quihuicac pan se cali, nepa quitaya pa quipajtis. ³⁵ Mostatica pa huajtzinco quimacac tomin iteco in cali, quilic: “Xiquita yihual huan mochi hual ticpías pa ticlaxlahuis pa in hual monequi pa quipías yihual, nehual nimitzcuepilis in tonali nimocuepas ca níc.” ³⁶ Axan —quilic Jesús—,

ye lacames quitaje in lacal hual laixtequinijmes quitecuaje. ¿Calía ca in yeyenten quichihuilic in lacal quinami quijtúa in lajtol pa ticchihuilisi mochi oc se hual moita ca tehuanten?

³⁷ In lamaxtini quinancuilic Jesús, quilic:

—Yihual hual quipiliaya laicnillilisi in lacal hual quitecuaje, yihual quichihuilic quinami quijtúa in lajtol.

Cuaquín Jesús quilic:

—Xía huan xicchía quinami yihual quichíac.

Jesús pa inminchan Marta huan María

³⁸ Yajtiahuiuloaya yehuanten pan ojli, Jesús ihuían calaquic pan se caltilan tipichin, nepa cataya se sihual motocaya Marta, yehuanten moiximatiloaya. Yihual quinotzac Jesús pa quipaxaluilisquiaya pa ichan.

³⁹ Huan Marta quipiaya se icni sihual motocaya María. Yihual molalic pa icxihuajmes in Tata Jesús huan pehuaya quicaqui quinami quimaxtiaya ilajtol Dios. ⁴⁰ Ma yoje, icni Marta laijnamiquiaya sjajtataya pampa quiyucxiltiaya mochi pa quicuasquiaya Jesús. Cuaquín hualac capa cataya Jesús, quilic:

—Tata, ¿amo tiquita quinami nocni nechcahuac pa nitequipanusquiaya nohuían? Xiquili pa hualas nechpalehuis.

⁴¹ Huan in Tata Jesús quinancuilic:

—Marta, Marta, timomaca míac tequil huan amo huil timosehuía. ⁴² Jan inon san monequi pa ticchías quinami María quichijtica. Quinequiaya quichía in cuali, quinequiaya quicaqui ilajtol Dios. Amaqui quiquixtilis María in hual yihual cana quicactica ilajtol Dios.

Jesús quinmilía quinami se quilajlanía Dios

(Mt. 6:9-15; 7:7-11)

11 Cataya se tonali cataya Jesús pan se lajcotiyan capa quilajlantataya Dios. Nepa noje cataloaya imonextiliniijmes. Lamic quilajlanic, se imonextilini quilic: —Tata, xitechnextili pa ticmatisi quinami ticlajlanisi Dios, quinami

Juan Lacuayatequini quinnextilic imonextilinijmes.

²Huan Jesús quinmilic:

—Quiman anquilajlanía Dios, xiquilican yoje:

ToTajtzin Dios hual tiunca pin cielo, ma quijtucan moxtin motoca ca mochi inminlasojlalisli huan inminlajtomes huejué huan cuajcualtichin.

Ma ajsi in tonali hual tihuelitía capa tehuanten.

Ma mochía len ticnequi pan lalticpan jan quinami mochía pin cielo.

³Xitechmaca mojmosta pa tijcuasi in hual monequi.

⁴Huan xiquinpujpuhua tolaijilaculisli, pampa yoje tiquinpujpuhualo moxtin yehuanten hual tejchihuililo amo cuali.

Huan amo xitechlaicana ca capic Satanás huil techtilanilía toyolo pa ticchihuasi len amo cuali, quema, huan xitechmacahuili pa camo techana yihual hual elehuis.

⁵Cuaquinon quinmilic:

—Cuajnesi se ca amhuanten ticpía se mocni hual chanti pa oc se cali huan tiajsi pa ichan yihual pa lajco layúa huan tiquilía: “Eh, Nito, ¿amo ticpía se ome laxcali pa tichlanehuis?”

⁶Ajsic pa nochan se tocní pa oc se cali panujtihuialaya pa ojli, huan amo nicpía nindeno pa nicmacas pa lacuas” tiquilía. ⁷Huan pa calijtic yihual quinanquilía: “Amo xichyantitihuála. Nictzacuac nochan, axan tilasticate pa tolapexlimes nehual huan noxolomes. Amo huil nimoquetzas pa nimitzmacas nindeno” quilía. ⁸Annimitzilía —quilic Jesús—, cuajnesi in se pa icalijtic amo moquetzas pa mitzmacas tehual ome laxcali mas que tiunca icni pa oc se cali. Ma yoje, tehual hual tiunca icni pa quiahuac amo

tipinahuac timotemachilic in se ome laxcali. Pampín, mocni pa calijtic neli moquetzas mitzmacas mochi in hual monequi pa ticpías. ⁹Huan annimitzilía: Ximotemachilican, huan Dios anmitzmacas. Xictemucan len Dios quipía pa amhuanten, huan anquitas. Quema, xiclajlánican Dios, unca quinami anquitecuilijtica pa ilalapujquil Dios. Huan anmitzlapulis. ¹⁰Xicchihuacan yoje pampa ancanas mochi hual len anmotemachilía Dios pa anmitzmacas. Huan moxtin hual len quitemulo in hual Dios quipía pa quinmacas, quema, yehuanten quitalo. Huan moxtin hual quinami quitecuililo ilalapujquil Dios, yoje Dios quinlapulis.

¹¹‘Amo unca se itajtzin ca amhuanten hual quimacas se tixcali ixól sinda ixól motemachilía len quicuas. Noje amo unca se tata hual quimacas se cuhual sinda motemachilis se michin. ¹²Huan amo unca se tata hual quimacas se culol ixól sinda motemachilis se blanquillo. ¹³Pampín, mas que amhuanten aunca amo cuajcuali huan ma yoje anquimati anquinmaca anmoxolomes len unca cuali, cuaquinon anmoTajtzin pin cielo quimati niman cuali quinmaca in Espíritu Santo yehuanten hual quimotemachililo.

Quijtulo Jesús quipía Satanás ichicahualisli

(Mt. 12:22-30; Mr. 3:20-27)

¹⁴Cataya se tonali quiquixtiliaya Jesús se ijyecal amo cuali se lalcal. In ijyecal amo cuali quichihuilini pa camo huil lajtusquiaya in lalcal. Huan quisac pa yihual in ijyecal amo cuali, yoje pehuac lajtuc in lalcal. Mocahuajque moizticate huan moilijticate in míac lalalera. ¹⁵Ma yoje, sequin quilijque: —Yihual quinquixtilía in ijyecames hual amo cuajcuali pan ipampa ilahueliltilisli Beelzebú hual unca

Satanás. Yihual huelitía ca moxtin in ijyecames hual amo cuajcuali.

¹⁶Oc sequin quimahuililoaya huan quijtuloaya pampa cuajnesi amo unca neli yihual Jesús yes in Cristo hual Dios quitlanic. Pampín quiyantiloaya pa yihual quinnextilisquiaya len pin cielo (ilhuicac) calica momahuisultilosquiaya ca lamajtilisli. ¹⁷Huan quimatic Jesús len quijtuloaya lajtic capa inminyolo, pampín quinmilic:

—Sinda amo cate ca se lajtulisli yehuanten hual huelitilo pa se lali, cuaquín amo huejcahuas inminlahueliltilisli, yajmo cayas. Huan sinda amo cate ca se lajtulisli yehuanten pa se cali huan mocualantitalo yehuanten, cuaquín yajmo huil huejcahuasi pa chantisi pa in se cali, yajmo cayas inminchan.

¹⁸Huan sinda Satanás huan yehuanten hual huelitilo ca yihual amo cate ca se lajtulisli, cuaquín amo huejcahuas Satanás pa huelitis. Inon anquimati.

¹⁹Ma yoje, sinda anquijutuca pampa nehual niquinquixtilíla ijyecames amo cuajcuali ca ilahueliltilisli Beelzebú, cuaquinon ¿ca aquí ilahueliltilisli quinquixtililo yehuanten anmolacames hual quimatilo quinquixtililo? ¿Anquijutuca pampa yehuanten quinquixtililo noje ca ilahueliltilisli Beelzebú? Sinda yoje anquijutuca, cuaquinon yehuanten anmitzmotexpahuilisi ilaixpan Dios. ²⁰Axan annimitzilá pampa niquinquixtilíla ca Dios ilahueliltilisli. Pampín, axan ajsic Dios huelitijtica capa amhuanten. ²¹Unca quinami se local chicahuac hual quiztica ca teposli pa moanalisli ilajcotiyan capa quinpiá mochi hual iyaxca, huan amo unca nindeno hual quimacas tequil.

²²Ma yoje, sinda hualas se niman chicahuac huan quisulahuas, cuaquín quiquixtilis mochi calica monapatiaya, huan cuaquín in local niman chicahuac

laxiluilis mochi len quinpiaya in local hual amo yoje chicahuac. Huan yoje cayas ca Satanás sinda ajsic capa yihual ilahueliltilisli Dios. ²³Aquí hual amo nechtoca unca nolacocolini. Huan aquí hual amo nechpalehuía nehual, yoje yihual quipalejtica Satanás.

In ijyecal hual mocuepac

(Mt. 12:43-45)

²⁴Quisa in ijyecal amo cuali pa se local, panujtía pa cajcapa amo unca al, mochi unca huaqui. Nepa panujtía pa quitas capa huil mosehuis. Sinda amo quita capa huil, cuaquín quijtúa: “Nimocuepas pa nochan hual cataya lajtic capa in local capa niquisac.” ²⁵Cuaquinon huala, huan quita quinami unca lajtic capa in local. Unca quinami se cali laxpanali huan lachijchihuali cualtichin, amo chantitica nepa se ijyecal amo cuali. ²⁶Cuaquín yahui quinmana oc sequin chicome ijyecames niman amo cuajcuali, yihual amo quiman cataya yojque amo cuali. Calaquilo yehuanten moxtin lajtic capa in local pa nepa chantisi. Yoje mococúa in local niman míac axan. Quema, amo yoje míac mococuni quiman quipiani jan in se ijyecal amo cuali lajtic capa yihual.

¿Aquí quipía míac paquilisli?

²⁷Huan quijtutataya Jesús innojen lajtomes, cataya se sihual ca in míac lacames huan sihuames, quinotzac ca lajtol chicahuac, quilic:

—iNiman míac paquilisli quipía in sihual hual mitzlacatiltic huan mijchichiltic!

²⁸Huan Jesús quilic:

—Ma yoje, niqijtúa in paquilisli amo unca yoje hué quinami inon hual quipialo yehuanten hual quicaquilo ilajtol Dios huan quichihualo len quinmilíla, yehuanten hual quipixticate ilajtol pa inminyolo.

Quiyantilo Jesús pa quinnextilis len lanextilisli pa in cielo (ilhuicac)

(Mt. 12:38-42; Mr. 8:12)

²⁹Se tonali ajsitihualaloaya m'fac m'fac lacames inahuac Jesús, huan yihual pehuaya quinmili:

—Amhuanten hual anyultica axan anuncia lacames anquipixtica anmoyolo amo cuajcuali. Mojmosta annechyantitica pa annimitznextilis pa in cielo len hual ayamo quiman anquitaya. Anquinequi anquita pa yoje anquineltocasquiaya pampa Dios nechtilanic nican pa in lalticpan. Ma yoje, amo annimitznextilis nindeno hual anquinectica anquita. Jan annimitznextilis inon san hual Jonás ilajtuni Dios quinnextilic yehuanten hual chantinijme pa yina pin ciltalan hué motocani Nínive. ³⁰Jonás quinnextilic yehuanten pa Nínive pampa Dios quitlanic yihual. Huan nehual ilacal in cielo annimitznextilis amhuanten pampa Dios neli nechtilanic nehual pin lalticpan. ³¹Cayas in tonali hual Dios quintojtocas ilaixpan yihual yehuanten pa in lalticpan hual amo quineltocalo, quintojtocas pa panusi lacocoltilisli hual amo quiman lamis. Cuaquín in hué sihual hual huelitini pin lali huejca pa in sur nesis ilaixpan Dios ca amhuanten. Huan in sihual noje quijtus quinami Dios, pampa yihual hualac niman huejca pa quicaquisquiaya ilajmatilisli in hué Salomón hual yulini pa yina. Huan xiquitacan. Unca se hué nican hual yoje hué amo cataya Salomón. ³²Yehuanten hual yulinijme pa Nínive nesis ilaixpan Dios ca amhuanten huan quijtusi quinami Dios. Yehuanten quipalaje inminyolo pa pehualosquiaya laijnamiquilo quinami Dios quiman Jonás quinnotzac quinmilijtataya ilajtol Dios. Huan xiquitacan. Unca se hué nican hual Jonás amo cataya yoje hué.

In lahuilisli hual unca laijtc se iyolo

(Mt. 5:15; 6:22-23)

³³Jesús laqueztiahuiaya, quinmilic: —Amaqui quilalaltía se tapalquita hual lahuía huan cuaquín quilalía capa amaqui unca o quilalía itzindan se chiquihuil. No, quilalía pa pani capa nestías pa quinlahuis yehuanten hual calacticate. ³⁴Iixtololon se unca quinami se tapalquita hual quilahuilía, yoje huil lachía se. Sinda amo unca len hual quitzacuilía iixtololon se, cuaquinon quita in lahuilisli. Huan sinda unca len amo cuali hual quitzacuilía se iixtololon, cuaquinon amo lachía, jan unca laticumac san. Unca yoje ca iyolo se. Sinda unca amo cuali iyolo se, cuaquín in se unca laticumac. ³⁵Pampín xictemujtiacan quinami anquimatis da anmoyolo quipía lahuilisli o laticumactitica. ³⁶Yojque, sinda quimacahuiltía se pa calaquis pa iyolo ilajtol Dios pa huelitis ca yihual pa yulis quinami Dios quinequi, cuaquinon yajmo laticumactis pa iyolo. Huan yihual yes quinami se ca iixtololon cuali. Cayas quinami icalijtc se capa lajtica cuali se tapalquita hual lahuía. Yihual yulis quimaztica len quinequi quijtúa ilajtol Dios hual quilahuilijtica pa iyolo.

Jesús quinmotexpahuilía in fariseos huan in lamaxtinijmes

(Mt. 23:1-36; Mr. 12:38-40; Lc. 20:45-47)

³⁷Mocahuac Jesús pa quinlaquetziliz, quihuicac se lacal fariseo pa lacuasquiaya Jesús pa ichan. Yoje calaquic Jesús, molalic pa lacuas. ³⁸Huan mocahuac quiztica in fariseo pampa quitac Jesús amo pehuac ca in lapacalisli imajmajuan pa lacuasquiaya, quinami quijtúa in lajtol hual quimaxtilo in judíos. ³⁹In Tata Jesús quilic: —Axan, quema, amhuanten in fariseos anquijtúa pampa da

anmopaquilía, cuaquín yoje anmitzita chipahuac Dios. Ma yoje, pa laijtíc amhuanten capa anmoyolo anunca niman amo cuali ca mochi hual anquijtúa huan anquichía. Anunca quinami se hual quipaquilía pa quiahuac se tapalcal o se tapalquita xalapa, huan pa laijtíc quicahua tetzcuinuc. Yoje anunca tetzcuinuc laijtíc anmoyolo. ⁴⁰ ¡Amo anlajnamiquía! Dios quichíac ilajtíc se iyolo, amo quichíac jan iquiahuac se. ⁴¹ Huan amo xicpiacan len laijnamiqilislí inahuac len yes anmolajtol quijtúa inahuac quinami anmopaquilí. Ximacahuiltican pa ilajtol Dios anmijchipahuilís anmoyolo, cuaquinon xiquinmijnamiquican yehuanten hual amo quipialo míac pa yoje anquinmacas sequin ilajlajco in hual anquipías. Yoje anquitas pampa mochi unca chipahuac pa amhuanten sinda unca chipahuac anmoyolo. ⁴² Amhuanten fariseos, iquichi lacocoltilislí anyahui anpanu! Anquimaca Dios se ilajco in majlaclí inminlajlajco mochi anmocominos huan anmoyerbabuena huan in oc sequin anmoajuíac, quinami quijtúa ilajtol Dios. Ma yoje, ilajtol Dios noje quijtúa pampa anquipía pa anquilasojla oc sequin, huan amo anquinlasojla. Noje quijtúa in lajtol pampa anquipía pa anquintemus inon hual cuali pa anquinchihuilís oc sequin hual panulo lacocoltilislí hual oc sequin quinchihuililo. Huan amo anquinchihuilía, amo anquinmotexpahuililo yehuanten hual quinchihuililo in amo cuali. Monequiaya pa anquichihuasquiaya innojen hual quijtúa in lajtol. Quema, monequiaya pa como anquicahuas pa anquimacas in se ilajco inminmajlaclí innojen hualajuíac. Ma yoje, monequi pa anpehuas anquijnamiquís anquichías in hual monotza in

niman míac pa ilajtol Dios. ⁴³ ¡Quichi lacocoltilislí anyahui anpanúa amhuanten fariseos! Anquixtoca anmolalía pin tiopajmes capa moxtin anmitzitati. Anquixtoca pa moxtin anmitzpialtisi ca míac momajtilislí pa ilajcotiyan in caltilan. Quema, anyahui anpanúa lacocoltilislí pampa inon. ⁴⁴ Huan iquichi lacocoltilislí anyahui anpanúa! Anunca quinami cajcapa quinlalpachuje mijquimes, capa yajmo quitalo lacames capa cate. Amo quimatilo sinda nejnentialo inminpan, huan in lajtol quijtúa pampa lacames yajmo cate chipahuac sinda nejnemilo inminpan. Jan yoje unca ca lacames hual quineltocalo len anquimaxtía. Amo quimatilo pampa anmolamaxtilislí amo unca quinami quijtúa ilajtol Dios. Yoje inminyolo amo unca chipahuac, unca jan quinami anmoyolo amhuanten.

⁴⁵ Quinanquílíc se ilamaxtini inminlajtol in judíos, quilic:

—Lamaxtini, tiquijtúa innojen lajtomes, yoje titechuejuecaltitica tehuanten noje.

⁴⁶ Huan Jesús quilic:

—Amhuanten noje ilamaxtinijmes in lajtol, iquichi lacocoltilislí anyahui anpanúa! Unca pampa anquinchía niman míac lajtomes hual cate niman ej'etic pa quinneltocasi lacames. Cate lajtomes quinami se lamamalislí niman etic, huan amhuanten amo je nadita anquinneltoca in lajtomes hual anquinmilía oc sequin pampa quipialo pa quinneltocasi. ⁴⁷ ¡Quichi lacocoltilislí anyahui anpanúa! Unca pampa amhuanten anquinchíac in calitos hual anquinlafa pa pani capa quinlalpachuje Dios ilajtunijmes. Huan cataloaya anmotajtzitzían hual quinmictije ilajtunijmes Dios. ⁴⁸ Yoje anquimati cuali len quichihuaje anmotajtzitzían, huan anquixtoca len quichihuaje, pampa

yehuanten quinmictije huan amhuanten anquinchía in caltzindis hual anquinlalá pa pani capa quinlalpachuje Dios ilajtunijmes. ⁴⁹Pampín noje Dios ca ilajmatilisli hué quijtuc: “Annimitztilanilis nolajtunijmes huan nolanahuatinijmes. Sequin anquinmictis, oc sequin anquintojtocas.” ⁵⁰Yoje, Dios anmitzmotexpahuilis pampa cataloaya lamictili moxtin ilanahuatinijmes, yehuanten hual yulinijme quiman pehuac in lalticpan huan yehuanten hual yultihualalo pa axan. ⁵¹Jo quema, anmitzmotexpahuilis pa yoje anmitztojtocas ilaixpan yihual pampa cataya lamictili Abel inminxól Adán huan Eva. Huan anmitztojtocas ilaixpan yihual pampa cataloaya lamictili moxtin in oc sequin ilajtunijmes hual yultihualaloaya quiman miqic Abel, pa quiman cataya lamictili Dios ilajtuni Zacarías. Yihual quimictije lajco pin ilasojli calijtic in tiopan hué huan inon capa quichichinulo in huendis, nepa quimictije. Jo quema —quinmilic Jesús—, annimzilía inon, anmitzmotexpahuilis Dios pa anmitztojtocas ilaixpan yihual pampa quichihuajque mochi in lamictilisli. ⁵²iQuichi lacocoltilisli amhuanten ilamaxtinijmes in lajtol anyahui anpanúa! Unca pampa amo anquinmaxtic lacames in hual quinequi quijtrúa ilajtol Dios. Amhuanten amo anquinequic anquimatic len quinequi quijtrúa, huan anquintzacuilic pa camo quimatilosquiaya yehuanten hual motoliniloaya pa quimatilosquiaya len quinequi quijtrúa. ⁵³Cuaquinon, quisac Jesús nepa. Huan in lamaxtinijmes huan in fariseos pehualoaya moanaló chicahuac ca lajtomes ca Jesús. Motoliniloaya pa quilaquetzaltilosquiaya Jesús niman míac. ⁵⁴Yojque quinapachiloaya Jesús,

quinequiloaya quicaquilo pa yihual quijtus len calica huil quimotexpahuili losquiaya.

Quimaxtía Jesús quinami lacuajcuamanalo in huejueyenten

12 Jan pan tonali hual panuloaya innojen, monechiculoaya míac lacames huan sihuames, niman míac míac hualaloaya huan pampín motelicsilijtihualaloaya. Huan Jesús pehuac quinlaquetzilic imonextilinijmes, quinmilic: —Xiquiztiacan amhuanten pa camo anquimacahuilitis pa anmitztechcunilis pa anmoyolo in lacuajcuamanalisli quinami quintechcunilía inminyolo in fariseos. Unca quinami itexli in harina quitechcunía in laxocoyajquil. ²Amo unca nindeno hual unca latzacuali hual amo yes lalapuli. Huan amo unca nindeno laltili hual amo yes lamatili. ³Yoje, len yes hual anquilic capa cataya laticumac hual amo anquinequic pa oc sequin quicaquilosquiaya, jan yoje inon quicaquisi capa amo huil quimolatilis nindeno, quinami capa lajtica. Huan len yes hual anquilis pa se calijtic pa camo quicaquilosquiaya oc sequin, jan yoje in quinahuatisi moxtin.

Monequi pa timomajtisqui ilaixpan Dios

(Mt. 10:26-31)

⁴Huan annimzilía inon, nocnían lajlasojli. Amo ximomajtican pampa lachames huil quimictilo icuerpo se huan cuaquinon yajmo huil quichihuilisi nindeno. ⁵Ma yoje, annim�nextilía aqui monequi pa anmomajtis. Ximomajtican pampa Dios quipía lahuelilitilisli pa quilasas se pin capa lalatica huan milintica quiman quimictía. Quema, annim�zilía, ximomajtican pampa yihual huil quichía. ⁶Quinnamacalo macuili tutotzindis pa macuili tomin tijtipichin. Ma yoje, Dios

amo quilcahua se tutol hual moitíla ca yehuanten. ⁷Jo quema, huan mochi seje itzondi anmotzontecon unca lapuhuali. Yoje, amo ximomajtican. Amhuanten anmonotza niman míac, amo yoje míac monotzalo míac tutotzindis.

Yehuanten hual quislacúa Jesús inminlaixpan moxtin

(Mt. 10:32-33; 12:32; 10:19-20)

⁸Huan annimitzilía inon. Aqui yes hual nechnehtoca huan quijtus pampa nehual niunca iCristo Dios, huan quijtus inon inminlaixpan moxtin, cuaquín nehual ilacal in cielo niquislacus inminyampa Dios ilanahuatinijmes pin cielo. ⁹Aqui yes hual quijtus pampa nehual amo niunca iCristo Dios, cuaquín yihual amo niquislacus inminyampa Dios ilanahuatinijmes pin cielo.

¹⁰Huan aqui yes hual nechuejuecaltis nehual ilacal in cielo, yihual Dios quipujpuhuas ilaijlaculisi. Ma yoje, sinda se quihuejuecaltis in Espíritu Santo, inon Dios amo quipujpuhuas.

¹¹Huan cuajnesi anmitzhuicalo inminlaixpan yehuanten hual huelitilo o yehuanten hual quipialo lahuelilitilisi. In tonali anmijchihuililo inon, amo ximotolinican pa anquijnamiquis lajtol calica anyahui anmonapatía o calica anyahui anquinmilía.

¹²Anmitznextilis in Espíritu Santo len anquipías pa anquinmilis jan axcan quiman yes anlajtus.

Jesús laquetza de aquinojen quipialo míac tomin

¹³Se lacal hual cataya nepa ca in míac lacames quilic:

—Lamaxtini, xiquili nocni pa yihual nejxiluilis nehual len techcahuilic totajtzin in tonali polehuic.

¹⁴Jesús quilic:

—Lacal, ¿aqui nechlajtultic pa nyesquiaya ilaxiluni in hual iyaxca motajtzin?

¹⁵Cuaquín Jesús quinmilic in lacalera:

—Xiquitacan. Ximotzacuilican pa camo anquinctías míac huan míac. Niquilía inon pampa mas que quipía se míac hual iyaxca, ma yoje in míac hual quipía amo quiyuliltía.

¹⁶Cuaquinon quinquhuilic len pa quinmijnamiqultisquiaya in hual quinmaxtiaya. Quinmilic:

—Cataya se lacal hual quipiaya míac tomin huan pa icuajmilimes lapixcaya niman cuali. ¹⁷Cuaquinon pehuaya moili: “¿Len nicchías pampa yajmo nicpías calijtic capa nicajcoquis nolapixcalisi?” ¹⁸Cuaquinon quilic: “Inon nicchías. Niquinxitinis nocalijtic capa nicajcoquis huan niquinmiscaltis nocalimes pa yesi niman huejué. Cuaquinon nicnechicus mochi hual len nicpixcas, nolayoli huan mochi oc sequin innojen hual noyaxca huan niquintemiltis nocalimes. ¹⁹Cuaquinon nimoilis: Axcan nehual nicpía míac la'ajcoquili hual nechuejcahualtis míac xixíl. Nimosejtías, huan mojmosta nía nilacua huan nía nilauni huan nía nipaqui.” Yoje quilic in lacal. ²⁰Ma yoje, Dios quilic: “iAmo ticmati tilajnamiquía! Axan layúa tía timiqui. Cuaquín ¿aqui moyaxcajtis ca mochi inon hual timoajcoquilic?” Yoje quilic Dios.

²¹Cuaquinon, Jesús quinmilic:

—Yoje yes ca se hual yuli moajcoquijlitica míac pa yihual nican pan lalticpan huan ma yoje amo moajcoquílía míac in hual Dios quipía pa quimacas.

Dios quinmiztía ixolomes

(Mt. 6:25-34)

²²Huan Jesús quinmilic imonextilinijmes:

—Pampín annimitzilía amo xicpiacan lamajtilisi inahuac quinami amhuanten anyulis huan len anquicuas.

Huan amo xicpiacan lamajtilisli inahuac quinami anmolaquentis. ²³No, amo xilajnamiquican ca lamajtilisli pampa inon. Dios anmitzmacac anmoyulilisi, huan anmoyulilisi monotza míac. Amo yoje míac monotza in hual anmitzmaca pa anquicuas. Huan Dios quichíac anmocuerpo, huan anmocuerpo monotza míac, amo yoje míac monotza inon hual anmitzmaca pa anmolaquentis. ²⁴Xiquinmitacan in cuervos (cacalomes). Amo latocalo, amo lapixcalo, amo quipialo capa huil moajcoquililo nindeno. Ma yoje, Dios quinlacualtía. Huan amhuanten anmonotza míac. In tutomes amo yoje míac monotzalo. ²⁵Huan cuajnesi anquinequi pa huejcahuas anmoyulilisi nican pan lalticpan. Ma yoje amo huil anquihuejcahualtis se nadita, mas que míac anmomajtía anlajtutica pa anmoyolo pa anhuejcahuas anyulis. ²⁶Pampín, sinda amo huil anquichía jan in nadita san, cuaquinon ñleca anlajnamiquía ca momajtilisli pa anquimatis quinami ancanas mochi inon hual monequi pa anquipías? ²⁷Xiquinmitacan in xuchimes quinami moscaltilo. Amo tequipanulo, amo latzahualo, amo lajquetilo. Ma yoje, annimitzilía pampa Salomón ca mochi itomin huan innojen oc sequin hual quipiani amo quiman molaquentini cualtichin quinami se xuchil quinami innojen. ²⁸Huan sinda Dios quichijchía se xuchil quinami tzotzomajli cualtichin, se xuchil hual unca axan pin cuajlan huan mosta quichichinulo inmincujlan in cuajmilunijmes, cuaquín neli unca pampa Dios yahui anmitzlaquentía amhuanten hual amo míac anquilalilía Dios anmolanelocalisli. Pampín, xicpiacan míac laneltocalisli ca Dios. Huan mas que amo anquipía míac laneltocalisli ca Dios, ma yoje anmijchihuilis innojen. ²⁹Huan amhuanten, amo

xictemujtinemican len anquicuas huan len ancunis, amo xiclajnamiquican ca lamajtilisli inminahuac innojen. ³⁰Moxtin pin lalticpan quintemulo innojen, quijnamiccticate ca lamajtilisli quinami quinmanas. Huan anmoTajtzin pin cielo quimati pampa monequi pa anquipías innojen. ³¹No, xictemucan mojmosta pa anquipías Dios huelitijtica pa anmoyolo, huan yihual anmitzmacas mochi in hual monequi pa anquipías.

**Ma caya pin cielo (ilhuica)
anmoyaxca hual neli monotza**

(Mt. 6:19-21)

³²'Amo ximomajtican, amhuanten niman miactzindi hual annechneltoca, pampa Dios huelitía pa anmoyolo axcan huan amhuanten anhuelitis pan mochi in lalticpan. Jo quema, Dios quipía paquilisli pa anmitzmacas pa yes anmoyaxca inon pa anhuelitis. ³³Xiquinamacacan len anquipía huan xiquinmacacan yehuanten hual amo quipialo nindeno. Sinda anquinchihuilía cuali ca anmotomin, cuaquín amo anquipolúa, pampa Dios quita len anquinchihuilía huan anmitzajcoquilis míac hual cuali pin cielo. Yes quinami anmochihuiliiaya xotopas hual amo quiman mochihualoaya dangochita ca cojcoyunquimes capa quisasquiaya anmotomin huan yoje mopulusquiaya. Pin cielo amaqui huil anmitzixtequilía in hual Dios anmitzajcoquilía, huan in laxinaxli amo anmitzcualilo. ³⁴Sinda anquixtoca in hual Dios huil anmitzajcoquilía pin cielo, cuaquín mojmosta anquijnamicctías inon. Huan sinda anquixtoca in míac hual cate pin lalticpan, cuaquín mojmosta anquijnamicctías inon.

**Monequi pa se mochías
tequipanujquil cuali**

³⁵'Yoje, xiyén quinami lacames tequipanujquimes hual cate lacuejtili

pa latequipanuilisi. Quimpiasi lalalaltili mochi in tapalquitos pa lahuilisi pin cali. ³⁶Quichixtiasi inminteco hual yahui mocuepa pa ichan pampa uyac pa se lanamictilisi. Huan quiman ajsis in teco huan lanotzas pa in lapupjuil, yehuanten hual quichixticate quilapulisi jan ajnaxcan. ³⁷Quichi paquilisi quipiasi in lacames pa in tonali ajsis inminteco huan quinmita quichixticate yihual. Jo quema, annimitzilía, mochijchías inminteco, quinmilis pa molalisi pa lacuasi huan yihual quinlacualtis. ³⁸Huan sinda hualas inminteco pa chicnahui, diez, once, o lajco layía o lajco yihuali o pa cualcan o cualquita o laxpoyahua huan yoje quinmitas quichixticate, cuaquin iquinami amo paquisi innojen lacames itequipanujquimes! ³⁹Huan xicmatican inon. Sinda quimatiaya iteco se cali quiman yahuiaya huala in laxtequini, cuaquinon amo quimacahuilatiya pa quixitinisquiaya icali pa quixtequilisquiaya. ⁴⁰Huan amhuanten ximochijchijtiacan pampa nehual ilacal in cielo jan niajsitiquisas, amo anquimatis quiman niajsis.

In ome tequipanujquimes

(Mt. 24:45-51)

⁴¹Cuaquinon Pedro quilic:
—Tata, ¿titechilijtica in laijnamiquiltilisi pa titechmaxtis tehuanten san o pa moxtin?

⁴²Huan in Tata Jesús quilic:
—Niquilijtica aqui yes hual nechtequipanuilía. Unca quinami inon: Sinda unca se hué hual quipía se tequipanujquil hual quimati, yoje in hué quimati yihual in tequipanujquil quimati quichía mochi quinami quinequi iteco. Pampín quilalis pa quinmiztías oc sequin itequipanujquimes. Cuaquinon yihual in tequipanujquil quinxiluilis in oc sequin tequipanujquimes len quilis

iteco pa quinxiluilis. ⁴³iQuinami amo paquis in tequipanujquil pa in tonali hual hualas iteco huan quitas itequipanujquil quichijtica yoje! ⁴⁴Neli annimitzilía, quimacas lahuiltilisi niman hué pa quiztías mochi hual unca iyaxca iteco. ⁴⁵Ma yoje, cuajnesi in teco quilalía se itequipanujquil pa quinmiztías in oc sequin tequipanujquimes. Cuaquín cuajnesi in tequipanujquil quijtus laijtic yihual, quil: “Huejcahua pa hualas noteco”, huan pehuas lacuas mojmosta huan launis huan mojmosta lahuantinemis. ⁴⁶Cuaquinon hualas iteco in tequipanujquil pan se tonali hual amo quichixtica, amo momati quiman. Huan latilani iteco pa yes lamictili itequipanujquil. Yihual yes lacocoltili ca in lacocoltilisi hual panusi yehuanten hual amo laneltocalo. ⁴⁷In tequipanujquil hual quimati in hual iteco quinequi pa quichías huan ma yoje amo mochijchías pa quichías len quinequi, yojque yihual yes lahuitequili mías. ⁴⁸Huan yihual in tequipanujquil hual amo quimati len quinequi iteco pa quichías, huan quichía in hual cahuilía pa quimacasi lacocoltilisi, ma yoje, yihual amo mías yes lahuitequili. Aquí yes hual quipía mías hual iteco quimacac, yoje yihual iteco quichías pa quicuepilis mías. Huan aquí yes hual iteco quimacas mías pa quiztías, yoje yihual quipías pa quicuepilis mías.

Jesús quitilani tixuxli pan lalticpan

(Mt. 10:34-36)

⁴⁹Nihualac pa nicualicasquiaya ilahueltilisi Dios pan lalticpan, yes quinami niclasasquiaya tixuxli pan lalticpan. Huan iquichi nicnequi pa axan yesquiaya la'anilti in lalticpan ca in tixuxli! ⁵⁰Ma yoje, monequi pa nipanus lacocoltilisi, in yahui ye quinami se lacuayatequilisi hual nechcocus. iQuichi nicnequi pa

lamis mochías! ⁵¹ ¿Anquijtúa pampa nihualaya pa nicchihuilisquiaya pa cayalosquiaya ca mosehuilisi yehuanten pan lalticpan? No, annimitzilía, nihualaya pa yajmo cayalosquiaya ca se laijnamiqulisi yehuanten. ⁵² Ma annimitznextili len nicnequi niqijtúa: Axan huan pa quiman lamis in lalticpan hual axan anquiximati, cayasi macuili pin se cali hual amo cayasi ca se laijnamiqulisi. Yeyenten amo quixtocasi quinami laijnamiquilo omenten, huan omenten amo quixtocasi quinami laijnamiquilo yeyenten. ⁵³ Itajtzin amo mocahuas ca se laijnamiqulisi ca ixól, huan ixól amo mocahuas ca se laijnamiqulisi ca itajtzin. Inantzin amo mocahuas ca se laijnamiqulisi ca ixól sihual huan ixól sihual amo cayas ca se laijnamiqulisi ca inantzin. Inantzin amo cayas ca se laijnamiqulisi ca isihua ixól lacal huan isihua se lacal amo cayas ca se laijnamiqulisi ca inantzin ilahuical.

Cayasi lanextilisi pin cielo hual amo quimatilo len quinequilo quijtulo

(Mt. 16:1-4; Mr. 8:11-13)

⁵⁴ Cuaquinon Jesús quinmilic yehuanten in mías lacalera:

—Anquita se mextemil pani pin laiztijcal, jan ajnaxcan anquijtúa: “Yahui quiahui”, huan yoje panúa.

⁵⁵ Huan lanesi lapuhuitica, anquijtúa: “Yahui tona”, huan yoje panúa.

⁵⁶ ¡Lacuajcuamananjmes hual anunca! Anmochía quinami lacames cuali huan amo anunca yoje. Anquimati len quinequilo quijtulo in lanextilisi hual anquinmita pan in lalticpan huan pin cielo. Huan amo anquimati len quinequilo anmitznextilo innojen hual panujticate axan capa amhuanten, innojen lachihualisi hual niqinchijtica. Yoje annimitznextilijtica pampa Dios nechtilanic. ⁵⁷ ¿Leca amo anquimati inon ca anmolajmatilisi?

Xicsehuilti pa camo cualanis ca tehual se hual mitzmotexpahuilía

(Mt. 5:25-26)

⁵⁸ ‘Cuajnesi mitzmotexpahuilía se hual molalía mopan, huan yihual mitzhuica pan lajco. Cuaquín ximotolini pa ticayas jan sejpa ca yihual capa ayamo anajsis pan lajco. Sinda amo ticchías yoje, yihual mitzhuicas ilaixpan in la'ajuani huan in la'ajuani mitztemacas in policía huan in policía mijtzacuas pa calijtic. ⁵⁹ Nimitzilía tehual, amo quiman tiquisas nepa sinda ayamo ticlaxlahuic mochi tomin tipichin hual titehuiquilía.

Monequi pa ticpalasqui toyolo

13 Pa in tonalijmes hualajque yehuanten hual quimachiltijque Jesús quinami Pilato quinmictic sequin lacames pin lalticpan Galilea huan quinipanuc inminesli ca iesli inminhuendis hual yeje borregos. ² Jesús quinnanquilic:

—¿Anquijtutica innojen lacames pa Galilea catanjime niman laijlaculi huan moxtin in oc sequin galiletecos amo yoje laijlaculi? ¿Anquijtutica pampa inon panuje lacocoltilisi yoje pampa quichihuaje mías hual amo cuali?

³ Annimitzilía pampa no. Huan sinda amo anquipalas anmoyolo pa anpehuas anlaijnamiqis quinami Dios quinequi, amhuanten anmoxtin quinami yehuanten anpolehuis huan yoje amo cayas quinami huil anmoquixtis pin polehuilisi. ⁴ Huan nepa pin Jerusalén, innojen dieciocho (caxtulihuanye) lacames hual quinmictic in cali cuajtic Siloé in tonali hual huetzic inminpan, ¿anquijtutica pampa yehuanten cataloaya niman laijlaculi huan moxtin in oc sequin hual chantilo pa Jerusalén amo yoje laijlaculi? ⁵ No, annimitzilía, huan sinda amo anquipalas anmoyolo pa anpehuas anlaijnamiqis quinami

Dios quinequi, amoxtin amhuanten anpolehuis quinami yehuanten, huan amo cayas quinami huil annoquixtis pin miqUILisli.

Se amacuál tipichin hual amo laqui

⁶Cuaquinon quinmiliaya in laijnamiqUILtilisli pa quinmaxtisqueiaya, quinmilic:

—Cataya se lalac quiapiaya se amacuál tipichin hual ilaquilyo quicualo. Cataya latocali pa se cuajmili capa quintocac uvas. Hualac quintemujtataya laquilyo, huan amo quitac nindeno. ⁷Quilic itequipanujquil hual quiztataya in cuajmili latocali ca uvas, quil quilic: “Quita. Axcan quipía ye xixíl nihualaya nictemujtica laquilyo pan in amacuál tipichin huan amo niqUILifá nindeno. Xictzontequi pa huetzis huan pa yajmo mocahuas nepa, neli amo unca cuali pa laquis. ¿Leca mocahua pin lali sinda amo laquis?” ⁸Huan yihual hual quiztíac quinanquilic: “Tata, xijcahua noje pa oc se xíl, amo xicmayahui huan niclalmolunis itenco huan niclalis cuilal capa niclalmolunis. ⁹Cuajnesi ca inon laquis. Huan sinda amo laquis, cuaquinon ticmayahuis pa huetzis, pa yajmo mocahuas nepa.”

Jesús quipajtía se pan tonali hual mosehuilo in judíos

¹⁰Cataya pan se tonali hual motequihuilo mosehuilo in judíos, huan Jesús lamaxtiaya pin se tiopan.

¹¹Nepa cataya se sihual, quiapiaya se ijyecal amo cuali hual quiquixtiliaya ichicahualisli pa dieciocho xixíl. Yoje quiapiaya pa nejnemisquiaya tepotzita, amo huil nadita momelahuaya. ¹²Jesús quitac, quinotzac pa hualasquiaya, quilic:

—Nito, yahui mitzmacahua in ijyecal hual mitzquixtilfá mochicahualisli.

¹³Huan quinlalic imajmajuan ipan. Jan ajnaxcan yec lamelahuali, huan

pehuac quijtuc lajtomes huejué pa Dios. ¹⁴Huan ihué in tiopan cualanic pampa Jesús quipajtic pan in tonali hual mosehuilo in judíos. Pehuac quinmilic yehuanten hual nepa cataloaya pin tiopan, quinmiliaya:

—Cate chucuase tonalijmes, pan innojen monequi pa tequipanus se. Pan in tonalijmes xihualacan huan xicayacan lapajtili, amo xihualacan pan in tonali hual timosehuilo.

¹⁵Huan in Tata Jesús quinanquilic: —Lacuajcuamananjmes amhuanten hual anquijtúa anunca niman cuajcuali. Mochi sejse ca amhuanten pan mochi tonalijmes hual anmosehuía quitoma ibuey o iburro capa ilpitate huan quihuica pa cunis al. ¹⁶Huan in sihual unca se imiahuil Abraham. Satanás quiapiaya quinami lailpili pa dieciocho xixíl. Quichihuilic ca in ijyecal hual quiquixtilic ichicahualisli. Huan ¿amo monequiaya pa yihual yesquiaya latomali pan se tonali quiman timosehuilo?

¹⁷Quinmilic Jesús in lajtomes, yoje inminlaixpan moxtin quinpinahualtic yehuanten hual yeje ilacocolinijmes yihual. Huan in oc sequin pehualoaya quiपालo mífac paquilisli pampa Jesús quichihuaya mífac hual pampa inon mocahualoaya moiztataloaya yehuanten ca lamajtilisli.

IlaijnamiqUILtilisli in latocli tipichin

(Mt. 13:31-32; Mr. 4:30-32)

¹⁸Jesús laquetzíac, quinmilic: —¿Quinami len annimitzmaxtis pa anquimatis quinami huelitía Dios? ¿Ca len lamaxtilisli annimitzilic? ¹⁹Unca quinami se latocli cuixtito hual canac se lalac huan quilasac pa icuajmili. Ixuae, moscaltic huan mochíac se cuahuil huan in tutomes pehualoaya chantilo nepa.

Jesús quinlaquetzilfá quinami laxocoyajquil quichihuilfá pan

(Mt. 13:33)

²⁰Oc sejpa quilic:

—¿Ca len lajtomes annimitznexilis quinami huelitía Dios? ²¹Unca quinami laxocoyajquil hual canac se sihual huan quiyamanic pa ye lamachihualonijmes itexli harina, cuaquín quiteposahualtic mochi itexli in harina.

In lalapujquil pitzahuac

(Mt. 7:13-14, 21-23)

²²Huan panujtiahuiaya Jesús pa mochi in cajcaltilan huan in cajcaltilan tijtipichin. Lamaxtitinemiaya, huan mojmosta cantiyahuiaya iojli pa Jerusalén. ²³Huan se lacal quilic Jesús:

—Tata, ¿cate jan nadita lacames san hual yahuiilo yelo laquixtili pin ipolehuilisl inminlajlaculisl?

²⁴Huan Jesús quinmilic:

—Capa Dios huelitía unca quinami se cali hué hual quipía se lalapujquil san hual unca pitzahuac. Ximotolinican pa ancalaquis ca in lalapujquil pitzahuac, pampa annimitzilía cayasi mías hual quitemujticate quinami calaquisi capa Dios huelitía, huan amo quipiasi in lahuellitilisl pa calaquisi nepa. ²⁵Quiman moquetzac iTeco in cali huan quitzacuac in lalapujquil, cuaquinon amhuanten hual anunca pa quiahuac anpehuas anquinotzas pa in lalapujquil, anquilis: “iTata, xitechlapuli!” Huan yihual anmitznanquilis: “Amo annimitziximati, ¿capa anquisac pa anhualasquiaya nican?” ²⁶Cuaquinon anpehuas anquilis: “Tilacuanijme huan tilaunijme capa tehual ticatani. Huan tehual tilamaxtini pa to'ojlimes huejué pa mochi innojen tocaltilan.” ²⁷Huan in Teco anmitzilis: “Amo nicmati capa anquisac pa anhualasquiaya nican. Xiquisacan nican huejca ca capic amo niunca nehual, amhuanten anmoxtin hual anyuli anquichijtica in hual amo cuali.” ²⁸Nepa cayasi chocalisl huan anquinchoctis anmolames quiman anquinmitas Abraham huan Isaac

huan Jacob huan moxtin ilajtunijmes Dios hual cayasi capa Dios huelitijtica, huan amhuanten ancayas laquixtili pa quiahuac. ²⁹Quema, hualasi lacames hual quisaje capa quisa in tonali huan capa calaquía in tonali huan hual quisaje pin norte huan pin sur. Huan molalisl inahuac pa capa Dios huelitía. ³⁰Huan xiquitacan. Cate yehuanten hual ma yoje amo cayasi capa Dios huelitía, pampa amo quinequije quineltocaje, mas que quimatije ilajtol Dios pin xixihuimes quiman ayamo quimatiloaya moxtin oc sequin. Huan cate yehuanten noje hual mas que ayamo quimatiloaya ilajtol Dios, ma yoje, pin tonali hual quimatije, cuaquín quineltocaje. Yehuanten cayasi capa huelitía Dios.

Jesús quita Jerusalén huan chocha

(Mt. 23:37-39)

³¹Cuaquinon noje ajstitihualajque sequin fariseos capa cataya Jesús, quilijque:

—Xiquisa, ximohuica ca yoje, pampa quinequi mitzmictía Herodes.

³²Jesús quinmilic:

—Ximohuicacan huan quiman anquita in se hual quimati lacuajcuamana quinami se zorra, xiquilican: “Xiquita. Axan huan mosta nican ninicaya niquinquixtilijta ijyecames amo cuajcuali huan nilapajtitías. Huan pa in ye tonali niajsis capa niajta.”

³³Ma yoje monequi pa nicanas ojli axan huan mosta huan huipla, pampa amo momacahuiltía pa miquis se ilajtuni Dios pa quiahuac Jerusalén.

³⁴iJerusalén, amhuanten pa Jerusalén, anquinmictía ilajtunijmes Dios, anquinlaxilía ca tixcalimes yehuanten hual Dios anmitztilanilía! Huan iquichi mías nicnequic annimitznechicuc pa annechneltocasquiaya! Nicnequic annimitznechicuc quinami se lapachuanl iquinnechicúa iparachitos

itzindan inastacapajmes, huan amo anquinequic. ³⁵Xiquitacan. Dios yajmo unca nepa pa anmitziztías anmolacames. Axan anmitzcahuac pa anmoiztías amhuanten anmohuían, jan yoje anquinequi. Huan annimitzilía inon, lacames pa Jerusalén: Yajmo annechitas. San annechitas oc sejpa pan tonali quiman anquijtus: “Ma lajtucan moxtin, ma lajtucan ca lajtomes huejué pa yihual hual huala pampa Dios quitilanic ca ilahuelilitlisli.”

Jesús quipajtía se hual quipía posahualisli

14 Cataya pan se tonali hual calaquic Jesús pa icali se hué fariseo pa lacuasquiaya, cataya in tonali hual mosehuilo in judíos. Huan yehuanten amo mocahualoaya pa quinapachilosquiaya. ²Cataya nepa ilaixpan Jesús se lalacal, quipiaya se cocolisli hual quiposahualtitataya. ³Huan Jesús quinmilic in fariseos huan ilamaxtinijmes inminlajtol in judíos, quinmilic:

—¿Quimacahuiltía tolajtol pa titepajtisi pan tonali hual timosehuilo, o amo quimacahuiltía?

⁴Yehuanten amo nahuatije. Cuaquinon Jesús quiquitzquic in lalacal huan quipajtic huan quilic pa mohuicasquiaya. ⁵Cuaquinon quinmilic:

—Amo unca se ca amhuanten hual amo quiquixtisquiaya jan ajnaxcan ixól o ibuey sinda huetzisquiaya lajitic se coyunquil pan tonali hual timosehuilo.

⁶Huan momajtiloaya pa quinanquililosquiaya Jesús.

Jesús quinmilía len quichihuasqui pin tonali hual quinnotzasqui pa lacuasqui

⁷Huan quitaya Jesús quinami yehuanten hual cataloaya lanotzali pa

lacualosquiaya itequi molajtultilijque pa yehuanten in icpalimes pa capa molalilosquiaya in huejueyenten pa lacualosquiaya. Pampín quinmilic in laijnamiquiltisli pa quinmaxtisquiaya, quinmilic:

⁸—Sinda mitznotza se pa tihualas pa se monamictilisli, amo ximoyaxajtili se icpali hual unca pa in huejueyenten.

⁹Cuajnesi yihual hual mitznotzac noje quinotzac se hual tehual amo tiunca yoje hué quinami yihual. Cuaquín quihualicas huan mitzilis: “Xicmacahuilti pa molalis in lalacal capa timolalijtica.” Cuaquinon tipehuas tipinahuas huan tías timolalis pan se icpali hual cayas pa yehuanten hual cate tijtipichin. ¹⁰No, xicchía inon sinda tiunca lanotzali: Quiman tiajsis nepa, ximolali pan se icpali hual cayas pa yehuanten hual tijtipichinchito. Yoje, quiman hualas yihual hual mitznotzac pa in monamictilisli cuajnesi mitzilis:

“Nito, ximolali pa in icpali hual unca pa se hué.” Cuaquinon, ticanas lasojlalisli inminlaxpan moxtin hual cayasi ca tehual pa lacuasi. ¹¹Mochi seje hual mochías hué inminlaxpan oc sequin, yihual quichihuasi tipichinchito. Huan aqui yes hual mochías tipichinchito, yihual quichihuasi hué.

¹²Noje Jesús quiliaya yihual hual quinotzac, quilic:

—Sinda tía ticchía se fiesta hué capa tilalacualtía, amo xiquinnoztinemi itequi jan mocnían hual chantilo pa oc sequin calimes huan mocnían huan mochantinijmes san hual quipialo mfac tomin. Sinda ticchijtías yoje, cuaquinon yehuanten mitznotzasi tehual huan yoje mitzcuepilisli in lachihualisli cuali. ¹³No, sinda tiquinnotzas lacames pa lacuasi pa mochan, xiquinmana yehuanten hual amo quipialo nindeno huan hual tungo huan hual amo huil nejnentialo huan hual pachacal.

¹⁴Yoje tipactías pampa yehuanten

amo quipialo quinami mitzcuepilisi in lachihualisli cuali. Ma yoje, Dios mitzcuepilisi niman míac lachihualisli cuali pan in tonali tiyulis oc sejpa. In panus pan in tonali hual yulisi oc sejpa yehuanten hual iyaxca Dios hual ca yehuanten yihual amo quita nindeno amo cuali.

Jesús laquetza de se lacualisli hué

(Mt. 22:1-10)

¹⁵Quicaquic in lajtomes se ca yehuanten hual cataloaya lacuajtataya ca yihual, quilic:

—Míac paquilisli cayas pa yihual hual quicuas ilacualisli capa Dios huelitía.

¹⁶Jesús quilic:

—Cataya se lalac yahuiaya quiyucxilti se lacualisli hué. Latilanic pa hualalosquiaya míac. ¹⁷In tonali hual mochi cataya layucxiltili, quitilanic itequipanujquil pa quinnahuatisquiaya yehuanten hual quinnotzac, quinmilic: “Xihualacan pampa axcan unca layucxiltili.” ¹⁸Cuaquín ca se laijnamiquilisli moxtin pehuaje quilije pampa amo yahuiloaya yalo. In se hual in tequipanujquil pehuac quinotzac pa hualas quilic: “Nilamic nimocuhuilic se cuajmili huan nicpía pa nías niquitas. Nimitzilía xichpujpuhua, amo huil nía.” ¹⁹Oc se quil quilic: “Nilamic nimocuhuilic macuili omenten bueyes huan niajtía pa niquinlaxahualtis pa nicmatis sinda cate cuali. Nimitzilía xichpujpuhua, amo huil nía.” ²⁰Huan oc se quilic: “Nilamic nimonamictic, pampín amo huil nía.” ²¹Yoje mocuepac in tequipanujquil, quilamachiltic iteco innojen lajtomes. Cuaquinon cualanic yihual hual quinnotzac pa hualalosquiaya, quilic itequipanujquil: “Xiejehui xiquisa pa in ojlimes huejué pin caltilan huan in ojlimes tipichitos, huan xiquinmana xiquinhualica ca níc hual amo quipialo huan in tungos huan in pachacames huan

yehuanten hual amo huil nejnemilo cuali.” ²²Huan itequipanujquil quichíac hual quilic iteco. Cuaquín mocuepac quilic: “Tata, nilamic nicchíac len tichilic huan jan yoje unca capa huil cayasi míac lacames.” ²³Huan in Tata quilic itequipanujquil: “Xiquisa pa quiahuac in caltilan, xiquintemu yehuanten hual nejnentinemilo pan ojlimes, huan yehuanten hual mocahualo pin cuajlan pampa amo quipialo inminchan. Xiquinmana pa hualasi pa nochan pa yoje temis ca lacames nocali. ²⁴Nimitzilía, amo jan se ca yehuanten in lacames hual niquinnotzac pa hualalosquiaya yahui quicua nolacualisli.”

¿Quichi monequi pa laxlahuis se sinda quinequi quitoca Cristo?

(Mt. 10:37-38)

²⁵Ca Jesús yajtiahuiloaya míac míac lacames. Cuaquín momalinac Jesús, quinmilic:

²⁶—Sinda se quinequi ye nomonextilini, quipías pa nechlasojlas niman míac, amo yoje quinami quinlasojla oc sequin. Quema, quipías pa nechlasojlas míac huan yoje nesis quinami yihual amo quinlasojla itajtzin huan inantzin huan isihua huan ixolomes huan icnían lacames huan sihuames. Quema, quipías pa nechlasojlas yoje míac, huan yoje nesis quinami yihual ihuían amo moxtoca. Sinda amo yoje, cuaquín amo huil yes nomonextilini. ²⁷Monequi pa nehual nimiquis. Yoje, aqui yes hual amo quinequi nechtoca huan amo quinequi miqui pa nehual, sinda cuajnesi monequi pa miquis pa nehual, cuaquín yihual amo huil ye nomonextilini. ²⁸Amo xipehuacan xiyén nomonextiliniyimes sinda ayamo anquijnamiquic cuali in míac hual nía nicnequi pa anquichías pa nehual. Mochi sejse ca amhuanten hual yahui quichía se cali hué, quipehuatía molalijtica pa ajsis quimatis quichi quijtía pampa yahui quipía pa quilaxlahuis. Yoje

quitas da cajsis itomin pa laxlahuis in cali hual yahui quichía. ²⁹Sinda amo ajsi quimati se yoje, cuajnesi in tonali pehua quichía in cali hué, quita pampa itomin amo cajsis pa laxlahuis, amo huil lamis quichías. Cuaquinon moxtin hual quitalo pehuasi quihuitzquilisi in lalcal. ³⁰Quilisi: “In lalcal pehuac quichíac huan axan amo huil lamis quichías.” ³¹Huan sinda se hué quinequi quichía moanalisi ca oc se hué, quipehualtía molalijtica pa ajsis quimatis sinda huil quisulahua in hué ca diez mil guaches hual quinpía, sinda in oc se hué quinpía veinte mil guaches hual hualalo pa quinamiquisi pa moanasi. ³²Huan sinda quijtúa pampa amo huil quisulahua, cuaquín quiman ayamo ajsiaya huan unca huéjca in hué ca veinte mil guaches, in hué ca san diez mil guaches quinahuatía in oc se hué pampa amo quinequi moana ca yihual. ³³Yoje, amaqui huil ye nomonextilini sinda amo nechmacahuiltía pa nicchías ca yihual len yes hual nicnequis nicchías ca yihual, quema, huan ca mochi hual unca iyaxca.

Jesús laquetza inahuac istal hual yajmo latechcunía

(Mt. 5:13; Mr. 9:50)

³⁴Unca cuali in istal. Ma yoje, sinda in istal yajmo latechcunía quinami istal, cuaquín amaqui yahui quilalilía pan len yes quiyucxiltitica pa quicuas. ³⁵No, in istal hual yajmo latechcunía quinami istal yajmo unca cuali pa nindenno, yajmo unca cuali pa in lali huan pa in cuilal hual quimontulo. Jan quilasalo pa quiahuc san. Huan sinda se nomonextilini yajmo yuli quinami nehual, cuaquín noje yajmo unca cuali pa nehual. Ma lacaqui yihual hual quipía inacas pa lacaquis.

Jesús quinpuhuilía len panus se iborrego hual mopoluc

(Mt. 18:10-14)

15 Huan ajsitihualaloaya moxtin in la'ananiymes hual

quipixcaloaya tomin pa in romanos hual hueltiloaya. Noje ajsiloaya yehuanten hual yuliloaya amo cuali, hualaloaya pa quicaquilosquiaya Jesús. ²Pampa inon quimotexpahuililoaya in fariseos huan ilamaxtinijmes inminlajtol hual quineltocalo in judíos, quilije:

—In se quinnamiquía quinami icnían in lacames hual amo yulilo cuali, quema, lacualo huan yehuanten.

³Cuaquinon Jesús quinmilic in laijnamiquiltitilisi pa quinmactisquiaya, quinmilic:

⁴—Sinda se lalcal ca amhuanten quinpía cien borregos capa amaqui chanti, huan se iborrego mopolúa, cuaquín ¿amo quincahuas in noventa y nueve (nahuipuhualicaxtulihuanahui) borregos capa cataloaya huan yas latemus pa quitas in se hual mopoluc? Quema, yoje quichías. ⁵Huan quiman quitas in borrego, quilalis ca paquilisi pa ihuajcol. ⁶Huan quiman ajsis quimantica pa ichan, quinnotzas pa monechicusi yehuanten hual icnían pa oc sequin calimes huan yehuanten hual chantilo itenco, quinmilis: “Xicpiacan paquilisi ca nehual, pampa axan niquitac in borrego hual mopoluc.”

⁷Annimitzilía pampa cayasi niman míac paquilisi pin cielo quiman se lalcal o se sihual hual amo yuli cuali quipalasi iyolo pa pehuas laijnamiquis quinami Dios quinequi. Quema, cayas míac paquilisi pin cielo inahuac in se, amo cayas yoje míac paquilisi inminahuac noventainueve hual amo monequi pa quipalasi inminyolo pa pehuasi laijnamiquisi quinami Dios quinequi.

Jesús quinpuhuilía inahuac in tomin lapoluli

⁸O, sinda se sihual quinpía diez tomimes, mochi sejse ipati míac, huan sinda quipolúa se ca innojen tomimes,

cuaquinon çamo quilalaltía se tapalcal pa lahuilislí huan quixpana in cali, huan ca melahualislí quitemúa pa quitas in tomin? ⁹Quema, yoje quichía. Huan quiman quita in tomin, quinnotza pa monechicusi icnían sihuames pa oc sequin calimes huan yehuanten hual chantilo itenco, quinmilía: “Xicpiacan paquilislí ca nehual, pampa axan niquitac in tomin hual nicpolujtataya.” ¹⁰Yoje annimitzilía, unca paquilislí ca Dios ilanahuatinijmes pin cielo sinda se hual unca laijlaculí quipala iyolo pa pehuas laijnamiquis quinami Dios quinequi.

In xolol hual quilamic itomin itajtzin

¹¹Huan quinmilic:

—Cataya se lalcal quinpiaya ome ixolomes lacames. ¹²Huan in xól xocuyol quilic itajtzin: “Tata, xijxiluilí axan ilajco motomin hual cayas pa nehual.” Cuaquinon itajtzin quinxiluilic itomin ca in omenten ixolomes. ¹³Huan amo panuje míac tonalijmes, huan ixól xocuyol monechiculic mochi itomin hual quixiluilic itajtzin, cuaquinon quisac pa quiahuac ilalí. Uyac pa se lalí huejca, huan nepa quilantinemiaya mochi itomin. Amo cajcoquiaya tomin nindeno, yultataya yoje amo cualí. ¹⁴Quiman quilamic mochi hual quipiaya, hualac se mayandi chicahuac pin lalí capa cataya, huan yihual pehuac panuc mayanalislí. ¹⁵Uyac, quiyantíc se lalcal pin lalí pa quimacasquiaya tequipanulislí. Yihual in lalcal quitilanic pa icuajmilí pa quilachilíscuaya icoyamimes (icuchis). ¹⁶Huan quinequiaya pachihuí ca len quicuajtataloaya in coyamimes. Ma yoje, amaqui quimacaya nindeno pa quicuasquiaya. ¹⁷Pampín, quijnamiquic in amo cualí hual quichíac, quipalac iyolo pa laijnamiquisquiaya cualí, moilic: “Quichi tequipanujquimes quinpía notajtzin huan yehuanten

quipialo míac pa quicuasi, amo quicualo mochi. Huan nehual nican niunca huan nimiqui pampa nimayantinemi. ¹⁸Nimochijchías axan huan nías ca notajtzin huan niquilís: Tata, nicchíac len unca amo cualí ilaixpan Dios huan molaixpan tehual. ¹⁹Yajmo nimonotza pa niquijtus pampa niunca moxól. Xijchihuilí axan pa nicayas se ca motequipanujquimes.” ²⁰Yoje in xól mochijchíac, uyac ca itajtzin.

’Huan ayamo ajsic, quema, cataya huejca huan itajtzin pa ichan quitac ajsitihualac. Huan ca paquilislí niman hué molalujtíac ca ixól, quinapaluc quitenamictataya. ²¹Pehuac in xól quilic: “Tata, nicchíac len amo cualí ilaixpan Dios huan molaixpan tehual. Yoje amo nimonotza pa niquijtus pampa niunca moxól.” ²²Ma yoje, itajtzin quinmilic itequipanujquimes: “Xiejsehuican xijquixtican se nahuas niman cualtichin huan xiclaquentican noxól, xicualicacan se anillo pa ixerixa huan lacsames pa icxihuajmes. ²³Huan xicualicacan in becerro tomahuac hual ticajcoctataloaya pa se fiesta. iXicmictican, ma tilacuacan, ma tipaquican! ²⁴Pampa in noxól cataya quinami miquic huan yulic oc sejpa, cataya lapolulí huan axan tiquitaje.” Huan pehualoaya mijtotilo ca paquilislí.

²⁵In xól hué cataya pin cuajmilí. Huan ajsic pa in cali, quincaquic latzotzontataloaya huan mijtotijtataloaya. ²⁶Quinotzac pa hualasquiaya se ca in tequipanujquimes tipichinchitos, quilajlanic len panujtataya calijtic. ²⁷Huan in tequipanujquil quilic: “Axan hualac mocni huan latilanic motajtzin pa quimictisi in becerro tomahuac hual ticajcoctataloaya pa fiesta, pampa mocni hualac. Yajmo unca quinami miquiaya, axan yultica.” ²⁸Quicaquic inon, cualanic icni hué,

amo quinequic calaquic. Huan quisac itajtzin, quiyantic ca lasojlalisli pa calaquisquiaya. ²⁹Ma yoje, yihual quinanquilic itajtzin: “Xiquita. Quichi xixíl nimitztequipanuifá huan amo quiman nimocahuac pa nimitzneltocas. Huan amo quiman tichmacac se chivito calica ticchihualosquiaya se fiesta nehual huan yehuanten hual niquinlasojla. ³⁰Huan in tonali in se moxól hualac, in se hual quilamic motomin ca sihuames amo cuajcuali. Huan iticmictilic yihual in becerro tomahuac!” ³¹Itajtzin quilic: “Noxól, mojmosta tehual tiunca ca nehual huan mochi hual nicpía unca moyaxca. ³²Huan amo cataya yoje ca mocni. Pampín, monequiaya pa ticpialosquiaya in fiesta huan pa ticpialosquiaya niman mías paquilisli. Unca pampa in mocni tehual cataya quinami miquic huan yulic oc sejpa. Quema, unca pampa cataya lapoluli huan axan tiquitaje.”

Jesús laquetza inahuac ilaicanani se teco hual quilantataya itomin iteco

16 Cuaquinon Jesús quinlaquetzilic noje imonextilinjmes, quinmilic:
—Cataya se lalac quiapiaya niman mías calica yuliaya huan quiapiaya se laicanani. Huan sequin quilije in lalac quinami ilaicanani quilantinemiaya len iyaxca in lalac. ²Pampín in lalac latilanic pa hualasquiaya ca yihual in laicanani huan quilic: “¿Leca nechililo pampa tehual itequi tichlaxtequilijtica? Axan, xilami xiquijcuilu mochi hual nechiquilijtcate moxtin, pampa yajmo tiyes laicanani.” ³Cuaquín moilic in laicanani: “Axcan, ¿len nía nicchá pampa yajmo niyes ilaicanani noteco? Amo nicpía chicahualisli pa nitequipanus quinami se hual quimati cuajmilúa, huan nipinahuas pa niquinlajlanilis tomin oc sequin. ⁴¡Ah! Axan nicmati len nicchías”, quil

quilic, “pa nechajxiltisi oc sequin pa inminchan in tonali hual yajmo niyes laicanani.” ⁵Cuaquinon quinnahuatic pa hualalosquiaya ca yihual moxtin yehuanten hual quihuiquilijtataloaya len in lalac iteco. Ajsije sejse huan sejse huan in laicanani quipehualtic ilajlanilisli ca se hual hualac, quilajlanic: “¿Quichi tiquihuiquilía noteco?” Quinanquilic: “Tres cientos sesenta lamachihualoni ichahuac olivos”, quilic. ⁶Quilic in laicanani: “Xiquixtili moamal, xicana oc se amal, ximolali huan xiejsehui xiquijcuilu pampa tiquihuiquilía ciento ochenta san”, quilic. ⁷Cuaquinon in laicanani quilajlanic oc se, quil quilic: “Huan tehual, ¿quichi titehuiuquilijtica?”, quilic. Huan quinanquilic: “Cien hanegas trigo”, quil quilic. In laicanani quilic: “Xicana in oc se amal huan xiquijcuilu ochenta.” ⁸Quimatic iteco in hual quichías ilaicanani, huan yihual lajtuc ca lajtomos huejué pa in laicanani, mas que quicajcayahuilic in lalac itomin. Lajtuc hué pa yihual pampa in laicanani lanextilic quinami quimatiaya quinami molachilisquiaya mas que quichías ca lacajcayahuilisli. Yajmo yahuiaya ye ilaicanani in lalac iteco. Ma yoje, yehuanten hual quihuiquililoaya iteco axan yahuiyoaya quimacalo iyulilisli in laicanani. Yoje —quilic Jesús—, lacames pin lalticpan hual amo quineltocalo Dios, yehuanten quimatilo lachihualo ca oc sequin lacames hual amo quineltocalo Dios. Quema, lachihualo ca mías lajmatilisli, amo yoje mías lajmatilisli quipialo yehuanten hual quineltocalo Dios. ⁹Huan annimitzilfa inon: Mas que lacames laijlaculi pin mochi in lalticpan lacuhualo huan lanamacalo ca mías tomin pa quichihuasi in hual amo unca cuali, ma yoje, amhuanten xilachihuacan ca in tomin pa amochías lajlasojli ca lacames pa

yoje pan tonali quiman lamis in tomin, cuaquín ancayas la'ajxiltili pin calimes hual amo quiman lamisi.

¹⁰Noje Jesús quinmilic:

—Aqui yes hual quilachilía cuali len tipichin hual quililo pa quilachilis, yoje quilachilis cuali len hué hual quililo pa quilachilis. Huan aqui yes hual amo quilachilía cuali len tipichin hual quililo pa quilachilis, yoje yíal amo quilachilis cuali len hué hual quililo pa quilachilis. ¹¹Yoje cayas sinda amo anquilachilía cuali innojen hual monetzalo pin lalticpan hual Dios anmitzilfa pa anquinlachilis. Dios amo anmitzilic pa anquinlachilis innojen hual yihual iyaxca. Innojen amo quiman lamisi huan monetzalo niman míac hual amo yoje monetzalo innojen pin lalticpan. ¹²Huan sinda amo anquilachilía cuali in hual unca iyaxca oc se, nicnequi niqijtúa, in hual iyaxca Dios, cuaquinon Dios amo anmitzmacas len iyaxca pa yes anmoyaxca pa anquilachilis.

¹³Amaqui huil quinquipanuilfa ome itecojuan, pampa amo quixtocas in se huan quixtocas in oc se, o quineltochas in se huan amo quineltochas in oc se. Huan noje amo huil anquiquipanuilfa Dios sinda itequi antequipanúa san pa anquinmanas innojen hual iyaxca in lalticpan hual anquijtúa monetzalo.

¹⁴Quincaquiloaya mochi innojen lajtomes in fariseos, huan yehuanten quilasojlaloaya tomin míac. Pampín quilaxocuyililoaya Jesús pa quixijxiculosquiaya. ¹⁵Pampín Jesús quinmilic:

—Amhuanten amo anmocahua pa anmonextilis inminlaixpan moxtin pampa anunca lacames niman cuajcuali. Ma yoje, Dios quimati len anquijtúa pa anmoyolo. Cate innojen, quema, hual lacames quijtulo pampa monetzalo míac, huan Dios amo quijtúa

monetzalo míac. Innojen quicualantilo Dios, niman amo quinmixtoca.

Dios ilajtol huan quinami huelitía

¹⁶'Dios quimacac Moisés ilajtol huan Moisés quijcuiluc. Huan Dios quinmilic ilajtunijmes ilajtol huan yehuanten quijcuiluje. Huan mochi hual quijcuiluje Moisés huan ilajtunijmes Dios, inon anmitzmaxtic mochi hual Dios quinequiaya pa anquimatisquiaya quinami yihual unca. Cuaquinon hualac Juan Lacuayatequini, huan Dios pehuac quimaxtic lajtol yancuic. Axan moxtin quicacticate ilamachilitilisli cuali Dios huan quinami huelitía. Huan motolinilo ca chicahualisli pa quipiasi Dios huelitijtica pa inminyolo. Ma yoje, amo quinequilo quipialo quinami Dios quilalic pa quipialosquiaya. ¹⁷Monequiaya pa cayasquiaya len ca míac chicahualisli pa quinlamis in cielo huan in lalticpan. Ma yoje, ca in míac chicahualisli, amo quiman huil quitzacuiliaya pa camo mochías jan se lajtol niman tipichin hual quijtúa Dios ilajtol.

Aquinojen hual quincajcahualo inminsihuahuan

(Mt. 19:1-12; Mr. 10:1-12)

¹⁸'Se lalac hual yajmo quinequi isihua huan quicajcahua, huan cuaquinon monamictía ca oc se sihual yoje cantica se sihual hual amo iyaxca. Huan jan yoje se lalac cana se sihual hual amo iyaxca sinda monamictía ca se sihual lacajcahuali hual ilahuical yajmo quinequiaya.

In lalac hual quipiaya niman míac calica yuliaya huan Lázaro hual amo quipiaya len

¹⁹'Cataya, quil, se lalac hual quipiani niman míac. Molaquentini ca tzotzomajli cualtichin huan mojmosta quichihuani fiesta, quilamini míac

tomin mojmosta. ²⁰Huan cataya se hual amo quipiani nindeno, yihual itocani Lázaro, lastataya cocoxqui pa ilalapujquil icali in lalac hual quipiani míac. Huan in Lázaro quipiaya sahuatera pa mochi icuerpo. ²¹Huan mojmosta quinequiaya míac pa pachihuisquiaya ca in lacualisli hual quimayahuiloya itzindan capa lacuani in lalac hual quipiani míac. Ma yoje hualaloaya in pelojmes huan quipaluililoaya isahuames Lázaro. ²²Cuaquinon se tonali polehuic in lalac Lázaro huan Dios ilanahuatinijmes pin cielo quihuicaje pin cielo (ilhuicac) capa unca Abraham, yihual hual quinpehualtic yehuanten in judíos. Huan polehuic in lalac hual quipiani míac huan quilalpachuje. ²³Huan cuaquín moitac capa yalo yehuanten hual miqulilo amo quineltocaticate Dios, huan nepa panuaya míac lacocoltilisli. Cuaquín lachíac huan quitac huejca Abrahám, huan yihual cataloaya Lázaro. ²⁴Huan in lalac hual quipiani míac quitzajtzilic, quilic: “Tata Abrahám, xichicnili, huan xictilani Lázaro pa quipaltisli pa al ilamili ixerixa pa nechiztialtilis nonejnepil, pampa nipanujtica míac lacocoltilisli pa in milinilisli.” ²⁵Huan Abraham quilic: “Nito, xiquijnamiqui quinami tiquinpiani len niman cuajcuali nepa capa tiyulini pin lalticpan, huan Lázaro quipiani len amo cuali. Huan axan nican yihual quipía len cuali pin cielo huan tehual tipanujtica lacocoltilisli. ²⁶Huan ca mochi inon, unca se huejcalan niman palahuac lajco capa tehuanten huan amhuanten. Pampín yehuanten nican hual cuajnesi quinequiloaya panulo pa amhuanten amo huil. Noje nepa amo huil panulo pa tehuanten nican.” ²⁷Cuaquín in lalac hual quipiani míac quilic: “Nimitztemachía cuaquín, Tata Abraham, xictilani Lázaro pa

quinnahuatis yehuanten pa ichan notajtzin, ²⁸pampa niquinpía macuili nocnían. Ma quinnahuati pa yehuanten noje amo hualasi ca niqulic capa panusi in lacocoltilisli.” ²⁹Abraham quilic: “Yehuanten quipialo ilajto Dios hual Moisés quijcuiluc, huan quipialo in hual quijcuiluje Dios ilajtunijmes. Ma momaxtican len unca lajcuiluli huan ma quineltocacan.” ³⁰Huan in lalac hual quipiani míac tomin quilic: “Nocnían amo quineltocasi Moisés huan Dios ilajtunijmes, Tata Abrahám. Ma yoje, sinda yahuiaya pa nocnían se hual miqulic, cuaquinon, quema, quipalalosquiaya inmínyolo pa pehualosquiaya laijnamiqulilo quinami Dios quinequi.” ³¹Abraham quilic: “Sinda mocnían amo quineltocalo in hual quijcuiluje Moisés huan Dios ilajtunijmes, cuaquinon amo huil quinlaneltocaltía se hual miqulic huan yulic oc sejpa, mas que mocuepac capa yehuanten pa quinmilisquiaya.”

Jesús quinmotexpahuilía aquinojen quinmaxtilo oc sequin pa camo quineltocasi

(Mt. 18:6-7, 21-22; Mr. 9:42)

17 Cuaquinon quinmilic Jesús imonextilinijmes:
—Amo mocahuas pa cayasi lacames hual quichihuasi len pa quitilanilis inmínyolo oc sequin lacames pa yehuanten quichihuasi laijlaculisli. Pampín, iquichi yahui panúa lacocoltilisli in se hual quichías len quinami inon! ²Yesquiaya cuali pa quipililosquiaya se melapili etic pa iquixlan in se huan quilasalosquiaya pa in al huejcalan. Jo quema, cuali in quipanusquiaya, amo san gá yihual cuajnesi quitilanilis iyolo pa quichías laijlaculisli se ca yehuanten hual amo quipialo míac tonalijmes pehuaje nechneeltocaje, yehuanten hual nechneeltocalo quinami xolomes.

³Ximolachilican pa camo panus inon. Sinda mocni quichía se laijlaculisli, cuaquín xicajua. Sinda quipala iyolo pa pehuas laijnamiquis quinami Dios quinequi, xicpujpuhua huan yajmo xiquijnamiqui len quichíac. ⁴Huan cuajnesi mijchihuilis laijlaculisli tehual ca chicome lachihualisli pa se tonali huan pa in tonali hualas ca tehual quiman mijchihuilic seje se ca in chicome lachihualisli, huan mitzilic ca mochi iyolo: “Nehcocúa noyolo pampa nimijchihuic in huan axcan yajmo quiman nimijchihuís.” Cuaquín sinda yoje mitzís, xicpujpuhua huan amo xiquijnamictía in laijlaculisli hual mijchihuic.

Laneltocalisli quimaca chicahualisli se

⁵Ilanahuatinijmes quilije in Tata Jesús, quilije:

—Xitechmaca míac lahuelilitlisli pa tilaneltocasi niman cuali.

⁶In Tata Jesús quinmilic:

—Se ilatocli mostaza ixua huan moscaltía huan mochías se cuahuil. Sinda anquipía laneltocalisli hual moscaltía quinami se ilatocli mostaza, cuaquín huil anquilisquiaya in xocol cuahuil nican, quil: “Ximocapuna huan ximoatoca lajco pin al huejcalan.” Cuaquín anmitzneltocasquiaya, quichiasquiaya jan quinami tiquilic.

Jesús quinmilía len quipía pa quichías se hual latequipanuilía

⁷Huan sinda se ca amhuanten ticpiasquiaya se latequipanujquil laxajtica o je lalac quinlachilijtica borregos, huan quisas pin cuajmili pa hualas pa in cali, amo tiquilis: “Xihuala ximolali pa tilacuas.” ⁸No, tiquilisquiaya: “Xiclali pan tixuxli pa yucsis pa tichmacas pa nilacuas, ximochijchía pa tichtequipanuilis. Quiman nilamis nilacuas huan

nilaunis, cuaquín huil tilacuas huan tilaunis tehual.” ⁹Cuaquinon, ¿ticsehuisquiaya in tequipanujquil pampa quichíac len tiquilic? No, amo ticsehuisquiaya. ¹⁰Yoje amhuanten, quiman yes anquichíac mochi in hual Dios anmitzilic, cuaquín xiquijtucan: “Tehuanten titequipanujquimes hual amo timonotzalo, jan ticchihuaje inon hual ticpiaje pa ticchihuasi.”

Jesús quinpajtía majlacli cocoquimes hual quipialo lepra

¹¹Huan cataya in Tata Jesús yajtiahuiaya pa Jerusalén, panujtiahuiaya lajco pa in ome lalimes Samaria huan Galilea pa inmintenco. ¹²Huan nican ajstitihualaya pa se caltilan tipichin capa quinnamiqic majlacli (diez) lacames quipialoaya in cocolisli itoca lepra. Yehuanten mocahuajque huejquita capa yihual cataya huan quintozajque chicahuac, quilijque:

¹³—¡Jesús, Lamaxtini, xitechicnili!

¹⁴Jesús quinmitac huan quinmilic:

—Ximohuicacan huan ximonextican ca in tiopistas.

Huan cuaquinon quinpanuc quiman mohuicatihuiuloaya, yehuanten pajtijque. ¹⁵Se ca yehuanten quiztataya pampa pajtic, mocuepac quinmijjtutica lajtomes huejué huan cuajcuali pa Dios ca lajtol chicahuac. ¹⁶Hualac huan huetzic pa icxihuajmes Jesús huan quisehuic. In se yec lalac samariteco huan in judíos amo quinmixtocalo in samaritecos. ¹⁷Yehuanten hual cataloaya ca Jesús quicaquijque Jesús quijjutuc:

—¿Amo cataloaya diez lacames hual ninquinpajtic? Huan in chicnahui lacames, ¿capa cate? ¹⁸¿Unca jan in se san hual mocuepasquiaya pa quinmijjtusquiaya lajtomes huejué huan cuajcuali pa Dios, in se lalac hual amo lacatic pa tolali tehuanten?

¹⁹Cuaquinon Jesús quilic in lalac samariteco:

—Ximoquetza huan ximohuica. Tichneltozac, pampín tipajtic, tiunca laquixtili pin amo cuali.

Jesús quinmilía quinami ajsis inon quiman Dios huelitía

(Mt. 24:23-28, 36-41)

²⁰Quilajlanijque Jesús in fariseos, quilijque:

—¿Quiman ajsis in tonali hual huelitía Dios pan lalticpan?

Quinnanquilic Jesús:

—Mas que quitas se mochi in lanexstilisli hual nesisi nican pin lalticpan, ma yoje amo huil quimatis calía cayas ilanexstilisli calica quimatis quinami ajsis inon quiman Dios huelitía pan lalticpan. Amo ajsis ca len lanexstilisli hual quita se. ²¹Amo yalo quijtulo: “¡Quita, nican unca!”, o “¡Quita, nepa unca!” No, amo yalo quijtulo yoje. Xiquitacan. Inon quinami Dios huelitía axan unca capa amhuanten.

²²Cuaquinon Jesús quinmilic imonextilinjmes, quilic:

—Ajsisi tonalijmes huan anquinctías pa ajsis jan ajnaxcan jan se tonali ca in tonalijmes capa nehual ilacal in cielo nihuelitis pan lalticpan.

Anquinctías inon quiman ayamo nicpías pa nipehuas nihuelitis. Huan mas que anquinctías, ayamo ajsis.

²³Anmitzilisi: “¡Quita, unca nepa! ¡Quita, unca nican!”, quil quilisi. Amo xijcahuacan anmotequipanulisli pa anquintocas in lacames, yehuanten islacatilo. ²⁴Quinami in lapelanilisli lapelanía pa se ilajco pa in oc se ilajco in cielo, yoje yes in tonali hual nihualas nehual ilacal in cielo. Moxtin quimatis quiman inon panúa. ²⁵Ma yoje, amo ajsis in tonali quiman ayamo nipanuc in lacocoltilisli hual monequi pa nipanus huan pa nechilisi: “Amo

ticnequilo pa ticayas nican.” Yoje nechilisi yehuanten hual yulticate axan. ²⁶Huan jan quinami catani innojen tonalijmes hual yulini Noé pan lalticpan, yoje cayas pa innojen tonalijmes quiman nehual ilacal in cielo nimocuepas pan lalticpan. ²⁷Nepa capa yulini Noé, lacames jan lacuanijme, launijme, monamictinjime huan quinmacanjime inminxolomes pa monamictilosquiaya. Jan quijnamiquinjime innojen san. Yoje lachihuanijme, huan cuaquín ajsic in tonali hual calaquic Noé calijtic in arca. Cuaquinon hualac mochi in al huan quinmatocitic moxtin in oc sequin. ²⁸Jan yoje catani quinami inon pa innojen tonalijmes hual yulini in lalac itocaya Lot. Moxtin lacuanijme, launijme, lacuhuanijme, lanamacanjime, latocanjime, quinchihuanijme calimes. ²⁹Huan in tonali hual quisac Lot pa quiahuac in caltilan Sodoma, huetzije tixuxli huan azufre, quisac pin cielo, huan moxtin in oc sequin polehuije. ³⁰Quinami cataya ca yehuanten, yoje cayas pan in tonali nehual ilacal in cielo nimonextis ca moxtin in lacames pin lalticpan. ³¹Pan in tonali, ma camo quijnamiqui amaqui len iyaxca hual quipías, ma camo laijnamiqui quinami yahui quinquixtía pa camo xitinis in hual quipía. Sinda unca pa quiahuac icali, ma camo calaquic. Huan noje sinda unca pin cuajmili, ma camo momalina pa canas len cayas pa itepotzcon. ³²Xiquijnamiquican len quipanuc isihua Lot. ³³Aqui yes hual jan quitemus san quinami huil quipías mochi hual quinequis pa iyulilisli nican pan lalticpan, yoje yihual quipolus iyulilisli. Dios quitilanis pa polehuilisli hual amo quiman lamis. Huan aqui yes hual amo quitemujtías jan quinami quipías mochi in hual quinequis pa iyulilisli, yoje yihual quipías iyulilisli.

Quema, quipías iyulilislí aquí yes hual momacahuiltis pa miquis pampa yihual quilasojla Dios huan ilahuelilitlislí.

³⁴ Annimitzilí pa in layúa, cayasi ome lacames pan se lapexli. Se cayas laquixtili pin polehuilislí, huan in oc se yes lacahuali. ³⁵ Cayasi ome sihuames testicate, in se cayas laquixtili huan in oc se yes lacahuali. ³⁶ Cayasi ome pin cuajmili. Se yes laquixtili huan in oc se yes lacahuali.

³⁷ Huan yehuanten quilajlanijque, quilijque:

—¿Ca capic, Tata?

Jesús quinmilic:

—Jan quinami capa unca se mijquil, nepa monechicusi in tzopilojmes.

Se laijnamiquiltlislí inahuac se sihual ihuían huan in la'ajuani

18 Cuaquinon quinmilic Jesús se laijnamiquiltlislí pa quinmaxtisqueiaya quinami monequi pa moxtin amo mocahuasqui pa quilajlanisqui Dios huan amo siahuisqui, ²quinmilic:

—Cataya se la'ajuani pa se caltilan amo momajtiaya ilaixpan Dios, huan amo quimacajsiaya hual quijtuloaya lacames.

³ Huan cataya se sihual ihuían pin caltilan amo mocahuaya pa hualas capa yihual, quilijtataya: “Xichnapati pa camo nechcaycayahuas in nolacocolini.” Huan pa míc tonalijmes amo quinequiaya quinapati in la'ajuani. ⁴ Ma yoje, panuje tonalijmes, quijtuc lajtic yihual, quil:

“Amo nimomajtía ilaixpan Dios, huan amo nicmacajsí hual quijtulo lacames.

⁵ Ma yoje, nía nicnapatía in sihual ihuían jan pampa nechmacatica tequil. Sinda amo nicnapatis, yihual amo mocahuas pa hualas capa nehual huan nejsiahuiltis huan ca nadita amo huil nipanujtías in tequil.”

⁶ Cuaquinon in Tata Jesús quilic:

—Xijcaquican len quijtúa in la'ajuani amo cuali. ⁷ Huan Dios, ¿len quichías?

¿Amo quinnapatis yehuanten hual yihual quinlajultic pa yelosquiaya iyaxca? Huan ¿huejcahuas pa quinnapatis? ⁸ Neli annimitzilí, Dios quinnapatijtiquisas. Ma yoje, nehual ilacal in cielo, pa in tonali hual nihualas oc sejpa, ¿nía niquinmita míc lacames pan lalticpan hual quineltocalo Dios ilamachiltlislí cuali?

Se laijnamiquiltlislí inminahuac in fariseo huan in la'anani hual quipixcaya tomin

⁹ Cuaquinon quinmilic Jesús se laijnamiquiltlislí pa yehuanten hual quijtuloaya lajtic yehuanten pampa cataloaya lacames cuajcuali huan quinxiqxiculoaya moxtin oc sequin. Quinmilic:

¹⁰ —Cataloaya ome lacames panquisaje pa in tiopan hué pa quilajlanilosquiaya Dios. Se yec fariseo, in oc se yec se la'anani hual quipixcaya tomin pa in lahuelilitlislí romano.

¹¹ Moquetzac in fariseo, quilic Dios in lajtomes pa lanextilisqueiaya quinami yihual in fariseo cataya cuali, quilic: “Dios, nimijsehúa pampa amo niunca quinami moxtin in oc sequin lacames. Yehuanten laxtequinijmes, lacames hual amo quiman quineltocalo mochi in lajtol, lacames hual quinmanalo oc sequin sihuames. Quema, yehuanten quinami in la'anani hual quipixca tomin pa in romanos. ¹² Nel nimosahua ome lasahualislí mochi chicué tonalijmes, nimitzmaca se hual unca ca mochi diez tomin hual nechlaxlahuilo huan se hual moita ca mochi diez hual nicpixca.” Yoje quilic in fariseo. ¹³ Huan in se hual quipixcaya tomin mocahuac huejca, amo quinequiaya lachía pa in cielo. Motecuaya pa itzindan iquixlan pampa icnotiaya pampa quinchíac laijlaculislí, quilijtataya: “O Dios, xichicnili, xichquixtili nolajlaculislí pampa nel in se hual nicchía

lajlajlaculisli molaixpan tehual.” Yoje quilic in lalac hual quipixcaya tomin.

¹⁴Cuaquinon Jesús quinmilic yehuanten hual quicactataloaya:

—Annimitzilíá inon. Temuc pa ichan in se hual quipixcaya tomin, Dios quiztataya quinami yajmo quipixtataya ilajlajlaculisli, pampa Dios quicaquic ilatemachilisli. Huan in fariseo temuc pa ichan quipixtataya ilajlajlaculisli. Cataya yoje pampa aqui yes hual mochías hué ilaixpan Dios, yihual Dios quichías tipichin. Huan aqui yes hual mochías tipichin ilaixpan Dios, yihual Dios quichías hué.

Jesús quintuchía in xolomes

(Mt. 19:13-15; Mr. 10:13-16)

¹⁵Huan quinhuilicquiloaya Jesús in xolotzitzindis noje pa yihual quinmatocasquiaya. Quitajque inon imonextilinjmes, pehuajque quinmajuajque yehuanten hual quinhuilicquiloaya. ¹⁶Ma yoje, quinnotzac Jesús in xolotzitzindis pa hualalocquiaya capa yihual, quinmilic imonextilinjmes:

—Xiquinmacahuiltican pa hualasi capa nehual in xolotzitzindis. Amo xiquintzacuicican, pampa capa huelitía Dios jan moitasi yehuanten san hual quineltocalo ilajtol Dios quinami quineltocalo xolotzitzindis. ¹⁷Quema, annimitzilíá neli, aqui yes hual amo quimacahuiltía pa Dios huelitis lajitic yihual quinami se xolotzindi quimacahuiltía huelitía, yihual amo quiman quipías Dios huelitijtica lajitic yihual. Unca pampa se xolotzindi quineltoca mochi ilajtol Dios huan quineltoca ca mochi iyolo.

Se lalac yancuic hual quipiaya míac tomin laquetza ca Jesús

(Mt. 19:16-30; Mr. 10:17-31)

¹⁸Huan se hué hual yec lalac yancuic quilajlanic Jesús, quilic:

—Lamaxtini ticuali, ¿len nicchías pa nicanas in hual iyaxca Dios pa techmacas, iyulilisli hual amo quiman lamis?

¹⁹Jesús quilic:

—¿Leca tichilic pampa nicuali? Jan se san unca cuali, in unca Dios. ²⁰Tiquinmati Dios ilajtomes hual ticpías pa tiquinneltocas: Amo xicana sihual hual amo mosihua, amo xilamicti, amo xilaxtequi, amo xiquili islacatilisli inahuac amaqui, xiquinlasojla ca momajtilisli motajtzin huan monantzin.

²¹In lalac yancuic quilic:

—Mochi innojen niquinneltocaya quiman niyec xolol huan quiman nimochíac lalac.

²²Quicaquic Jesús inon, yihual quilic:

—Unca se lachihualisli hual ayamo ticchíac. Mochi hual ticpía xicnamaca huan xiquinxiluilili yehuanten hual amo quipialo. Yoje ticpías nepa pa in cielo len hual monotza niman míac. Huan xihuala, xichtoca pa tiyes nomonextilini.

²³Quincaquic innojen lajtomes in lalac yancuic, pehuac quicocuc iyolo míac, pampa quipiaya míac tomin.

²⁴Quitac Jesús quinami in lalac yancuic icnotijtiahuiaya, huan quijituc:

—iNeli unca etic pa yehuanten hual quipialo míac pa quimacahuiltisi pa Dios huelitis pa inminyolo! ²⁵Quema, unca niman etic pa se hual quipía míac pa quipías Dios huelitijtica pa iyolo. Amo unca yoje etic pa se camello calaquis huan quipanahuis pa iixtololon se lajtzomaloni.

²⁶Yoje yehuanten hual quicaquijque inon quilijque:

—Cuaquín amo unca amaqui hual huil yes laquixtili pin ipolehuilisli ilajlajlaculisli.

²⁷Jesús quinnanquilic:

—Dios huil quichía len yes hual amo huil quichihualo lacames.

28 Cuaquinon Pedro quilic:

—Xiquita. Tijcajcahuaje mochi hual toyaxca pa timitztocalosquiaya pa tiyelosquiaya momonextiliniymes.

29 Jesús quinmilic:

—Neli annimitzilíá inon: Cuajnesi quincajcahuas se icali o isihua o icnían o itajtzn huan inantzin o ixolomes. Quincajcahuas pa quipías Dios huelitijtica pa iyolo. **30** Se hual quichías yoje canas niman míc, huan quitas quinami amo cate míc innojen hual quincajcahuac. Quema, huan panus yoje ca moxtin, pampa quinpías innojen axan capa yultica pin lalticpan. Huan pin lalticpan yancuic hual yahui caya, quipías yulilislí hual amo quiman lamis.

Jesús laquetza oc sejpa pa quinmilis pampa yahui miqui

(Mt. 20:17-19; Mr. 10:32-34)

31 Cuaquinon Jesús quinhuicac in doce ilanahuatinijmes capa cataloaya inminhuían, quinmilic:

—Xiquitacan. Tipanquisticate pa Jerusalén huan lamis mochías mochi hual quijcuiluje Dios ilajtunijmes hual nehual ilacal in cielo nicpías pa nipanus. **32** Quijcuiluje pampa nehual nechtemacasi ca yehuanten hual amo judíos. Yehuanten nechuitzilicis, nechuejuecaltisi, nejchijchasi.

33 Cuaquinon nechuitequisi huan nechmictisi. Huan quiman nechpanus inon, panusi ye tonalijmes huan niyulis oc sejpa.

34 Yehuanten amo quimatiloaya nindeno len quinequiaya quijtu in lajtol hual Jesús quinmilic. Cataya quinami laticumac inminyolo.

Jesús quipajtía se pachacal

(Mt. 20:29-34; Mr. 10:46-52)

35 Ajsitihualaya Jesús pa Jericó, huan cataya se lalac pachacal molalijtataya pa itenco in ojli, motemachilijtataya tomin. **36** Huan quicaquic in míc

lalacera panujtataloaya, quilajlanic pa quimatisquiaya len panujtataya.

37 Quimachiltijque pampa Jesús in nazareteco panujtataya. **38** Pampín tzajtzc, quilic:

—iJesús, tehual ixól David, xichicnili nehual!

39 Yehuanten hual nejnemiloaya quilaicantataloaya Jesús cajuajque pa mocahuasquiaya. Ma yoje, yihual jan yoje amo mocahuaya pa tzajtzcisquiaya chicahuac, quilic:

—iTehual ixól David, xichicnili nehual!

40 Moquetzac Jesús, latilanic pa quihuicalosquiaya in pachacal capa yihual. **41** Ajsic yihual capa Jesús cataya, Jesús quilic:

—¿Len ticnequi pa nimijchihuilis tehual?

Huan yihual quilic:

—Tata, nicnequi nilachía.

42 Huan Jesús quilic:

—iXilachía, cuaquín! Pampa ticneltoac, yoje tipajtic.

43 Jan ajnaxcan lachiaya huan pehuaya quitoca Jesús pa in ojli, quinmijtutataya lajtomes huejué huan cuajcuali pa Dios. Huan moxtin in oc sequin quijtuloaya lajtomes huejué pa Dios pampa quitajque len panuc.

Jesús huan Zaqueo

19 Cuaquín Jesús calaquic in caltilan Jericó, **2** huan pejtiahuiaya quipanahui in caltilan. Huan cataya se lalac motocaya Zaqueo, yihual yec in hué ca in la'ananijmes hual quipixcaloaya tomin pa in romanos hual huelitiloaya. Yec lalac hual quipiaya míc tomin. **3** Yihual quitemuaya quinami quitasquiaya Jesús pa quimatisquiaya aquí cataya. Huan amo huil quitaya pampa in lalacera quitzacuilijtataloaya. Yoique amo huil quitasquiaya pampa yihual yec lalac cuixtic huan amo huil lachiaya pa pani

yehuanten. ⁴Pampín molalujtíac ca capic yahuiyoaya panulo moxtin. Lejcuc pan se cuahuil hual itoca sicómoro, lejcuc pa huil quitasquiaya Jesús, pampa yahuiaya panu pa in ojli nepa. ⁵Huan panuc Jesús ca ompic, lachíac pa pani huan quilic:

—Zaqueo, xitemujtiquisa, pampa monequi pa nimitzpaxaluilis axan pa mochan. ⁶Yoje temujtiquisac Zaqueo, huan paquiaya niman míac pa yoje quinamiquisquiaya Jesús. ⁷Quitajque inon in lacalera, moxtin pehualoaya cualanilo pampa Jesús quichíac inon, quijtuloaya:

—Yihual uyac pa paxalus pa ichan se lacal laijlaculi.

⁸Cuaquinon moquetzac Zaqueo, quilic in Tata Jesús:

—Xiquita, Tata. Nía nicmaca yehuanten hual amo quipialo nindeno ilajco mochi in hual nicpía. Huan mochi sejse hual nijquixtilic tomin ca lacajcayahualisli, axan nía niclaxlahuía nahui tomin pa sejse tomin hual nijquixtilic yihual.

⁹Huan Jesús quilic:

—Axan in tonali moxtin pa icali Zaqueo cate laquixtili pin ipolehuilislis inminlajlaculislis, pampa yihual neli unca se imiahuil Abrahám. Axan quineltoca Dios quinami Abraham quineltocani. ¹⁰Unca laquixtili pin polehuilislis pampa nehual ilacal in cielo nihualaya pa nictemus huan pa nijquixtis pin polehuilislis aqui hual polejtataya.

Jesús quinmilía se laijnamiquiltislis inahuac in majlacli (diez) tomin

(Mt. 25:14-30)

¹¹Quincaquiloaya yehuanten innojen lajtomes, cuaquinon Jesús quinmilic oc se laijnamiquiltislis pa quinmaxtisqueiaya. Quinmilic inon pampa amo cataloaya huejca pa quiahuac Jerusalén, huan quijtuloaya

yehuanten pampa jan ajnaxcan yahuiaya ajsi pan lalticpan in tonali hual Dios pehuaya hueliti. ¹²Huan Jesús quinmilic:

—Cataya se lacal lacatic pan huejueyenten, itajtzin yec se hué. Yahuiaya yahui in lacal pa se lali huejca, nepa yahuiyoaya quichihuililo pa yesquiaya inminhué, cuaquinon yahuiaya mocuepa pa ilali. ¹³Ayamo uyac, huan latilanic pa hualalosquiaya capa yihual majlacli (diez) itequipanujquimes hual quitequipanuilloaya yihual ihuán. Quimacac tomin mochi sejse, quinmilic:

“Xilacuhuacan huan xilanamacacan ca in tomin pa quiman nimocuepas.” Cuaquinon uyac. ¹⁴Ma yoje, yehuanten pa ilali amo quixtocaloaya, huan quinahuatije pa quililosquiaya:

“Amo ticnequilo in se pa huelitis ca tehuanten.” ¹⁵Panuje tonalijmes, mochíac inminhué yehuanten nepa pin lali huejca. Cuaquinon, mocuepac pa ilali, quinnotzac pa hualalosquiaya capa yihual in diez tequipanujquimes hual quinmacac in tomin. Quinnotzac pa quimatisquiaya quinami lacuhuaje huan lanamacaje huan quichi canaje ca in tomin. ¹⁶Hualac capa yihual in se calica pehuaya quilajlani quinami quichíac ca itomin, quilic: “Tata, motomin momiactic huan axan cate diez tomin pa mochi sejse tomin hual tichmacac.” ¹⁷Huan in Tata quilic:

“Ticchíac cuali, tehual titequipanujquil cuali. Ticchíac cuali ca in nadita hual nimitzilic pa ticchihuasquiaya. Pampín, nicmati pampa tehual ticmati ticchá cuali ca mochi hual ticchías. Xihueliti pa innojen diez cajcaltilan.” ¹⁸Hualac oc se tequipanujquil, quilic: “Tata, motomin momiactic huan axan cate macuili tomin pa sejse tomin hual tichmacac.” ¹⁹Huan in hué quilic noje in se, quil: “Xihueliti tehual pa innojen macuili cajcaltilan.” ²⁰Hualac

oc se, quilic: “Tata, nican unca motomin, nicajcoquiaya pa se dango. ²¹Nicchíac yoje pampa nimomajtiaya molaixpan tehual pampa tehual tiunca se lalac chicahuac quinami se hual amo quipía pachihuilisli. Tiquihuica len amo ticlalic, ticpixca len hual amo tictocac.” ²²In hué quilic: “Nimitzmotexpahuilía tehual pampa in hual tiquijtuc, titequipanujquil elehuis. Ticmatiaya pampa niunca se lalac chicahuac hual nicuica len amo niclalic. Huan ticmatiaya nel se lalac hual nicpixca len amo nictocac. ²³¿Leca, nuso, amo ticlalic notomin ca yehuanten hual quilanehuilo? Cuaquinon nehual nijquixtiaya ca míac quiman nihualaya.” ²⁴Cuaquín quinmilic yehuanten hual nepa moquezataloaya, quil: “Xijquixtilican in tomin huan xicmacacan in se hual canac diez tomin pa mochi seje tomin hual nicmacac.” ²⁵Huan quilije: “Tata, quipía diez tomin pa mochi seje tomin hual ticmacac.” ²⁶In hué quilic: “Annimitzilía inon. Aqui yes hual quipía, yihual quimacasi oc sequin míac. Huan aquí yes hual amo quipía, yihual quiquixtilisi in nadita hual quipía. ²⁷Huan innojen nolacocolinjmes hual amo quinequiloaya pa niyesquiaya inminhué, xiquinhualicacan nican, xiquinmictican nolaixpan.”

Jesús calaqui pin Jerusalén

(Mt. 21:1-11; Mr. 11:1-11; Jn. 12:12-19)

²⁸Lamic Jesús quinmilic innojen lajtomes, uyac laicantiahuiaya huan ja umpa quitocatiahuiiloaya yehuanten moxtin, panquistiahuiiloaya pa Jerusalén. ²⁹Ajsijque ilaixpan in lomita (tepetzindi) itoca Olivos, amo cataloaya huejca Betfagé huan Betania. Nepa Jesús quintilanic ome imonextilinjmes, ³⁰quinmilic:

—Xicalaquican in caltilan tipichin hual unca anmolaixpan. Nepa capa

ancalaquís, anquitas se burra ixól ilpitica, ayamo quiman leycuaya amaqui. Xictomacan huan xicualicacan.

³¹Huan sinda se anmitztlajlanis: “Huan ¿leca anquitontica?” cuaquín yoje anquilis: “Monequi pa in Tata quipías yihual pa leycus.”

³²Yoje uyaje yehuanten hual Jesús quintilanic, quitajque in burrito jan quinami Jesús quinmilic. ³³Huan quitontataloaya in burrito, itecojuan quinmilijque:

—¿Leca anquitontica in burrito?

³⁴Quinmilijque:

—Monequi pa in Tata quipías yihual pa leycus.

³⁵Quihualicajque in burrito capa cataya Jesús. Cuaquinon quinlasajque inminlaquemes pani in burrito, quilejcultijque Jesús ipan. ³⁶Cuaquinon yajtiahuiaya in burrito, imonextilinjmes Jesús quilaicantiahuiiloaya lapixtitataloaya ca inminlaquemes pa ojli pa yoje in burro nejnemisquiaya inminpan in laquemes. ³⁷Yojque ajsitiahuiaya Jesús ca capic pehualosquiaya temulo pin lomita (tepetzindi) itoca Olivos pa Jerusalén. Huan moxtin in míac monextilinjmes pehualoaya quijtulo lajtomes huejué huan cuajcuali pa Dios ca míac paquilisli huan ca lajtol chicahuac. In quichihualoaya pampa quinmitajque in míac hual Jesús quinchíac, yojque quinnextililoaya pampa yihual quiapiaya ilahuelilitlisli Dios. ³⁸Quililoaya:

—iDios quituchía huan quichihuilijtía cuali in hué hual quitilanic pan lalticpan! iDios quijituni pampa yahuiaya huala ca ilahuelilitlisli Dios! iPani cielo Dios mocahua ca mosehuilisli ca in lacames! iHuan nepa capa niman pa pani moxtin quijtulo lajtol hué huan cuali pa Dios pampa inon!

³⁹Sequin fariseos hual cataloaya ca in míac lalalera quilijque Jesús:

—Lamaxtini, xiquinmili momonextilinjimes pa mocahuasi.

⁴⁰Quinnanquilic Jesús, quil:

—Annimitzilía amhuanten pampa sinda amo nahuatilosquiaya yehuanten, cuaquinon tzajtzilosquiaya in tixcalimes.

⁴¹Huan quiman ajstitiajque pa Jerusalén, chocac Jesús quiman quitac in caltilan hué, quilic:

⁴²—iSinda amhuanten pa Jerusalén anquimatiaya inon hual Dios anmitzmacasquiaya amhuanten pa yoje anquipiasquiaya yihual imosehuilisi pan anmoyolo! Huan axan Dios anmijtzacuilic pa camo anquimatisquiaya. ⁴³Ajsitihualasi tonalijmes huan yehuanten hual moanasi ca amhuanten quimontusi lali huan teles pa itenco anmocaltilan Jerusalem pa anmijtzacuilisi pa mochi laijtic, huan amo huil anmoquixtis.

⁴⁴Cuaquinon yehuanten hual anmitzcocolisi anmitzlahuitequisi pan lali, amhuanten huan anmoxolomes, huan amo quicahuasi se tixcali pa icalimes anmocaltilan, pampa yalo quinmayahuilo mochi. Yoje anmitzcuepilis Dios. Unca pampa amo anquimatiaya Dios hualac ca amhuanten pa innojen tonalijmes. Hualac pa anmitzquixtis pin polehuilisi.

Jesús quichipahua in tiopan hué

(Mt. 21:12-17; Mr. 11:15-19; Jn. 2:13-22)

⁴⁵Cuaquín calaquic Jesús calijtic in tiopan hué, pehuac quinquixtic pa quiahuac yehuanten hual lanamacaloaya nepa. ⁴⁶Quinmilic: —Yoje unca lajcuiluli pa iamal ilajtol Dios, quijttúa: “Nocali yes se cali capa lacames quilajlanilo Dios.” Yoje quijttúa. Huan amhuanten anquichíac in tiopan hué quinami inminchan laixtequinijmes.

⁴⁷Lamaxtiaya mojmosta Jesús pin tiopan hué. Huan in tiopistas huejué

huan ilamaxtinijmes inminlajtol in judíos quitemuloaya quinami quimictilosquiaya. Noje quinequiloaya quimictilo inminhuejueyenten in judíos. ⁴⁸Ma yoje, amo huil quitaloaya quinami huil quichihualosquiaya, pampa mojmosta moxtin quinequiloaya quicaquilo, huan amo quiman quicahualoaya Jesús ihuán.

Ilahuelilitilisi Jesús

(Mt. 21:23-27; Mr. 11:27-33)

20 Cataya pan se ca innojen tonalijmes lamaxtitataya Jesús pin tiopan hué, quinlaquetzilijtataya in lacames in lamachilitilisi cuali. Hualajque capa yihual in tiopistas huejué huan ilamaxtinijmes inminlajtol in judíos, huan noje hualajque oc sequin hueyenten. ²Quilijque:

—Xitechili ca aqui ilahuelilitilisi anquichijtica innojen hual anquinchía. O ¿aqui unca in hual mitzmacac in lahuelilitilisi?

³Huan Jesús quinnanquilic:

—Nehual noje annimitzljajlanis len huan amhuanten xichnanquilian.

⁴Juan Lacuayatequini quincuyatequini lacames pa yehuanten lanextilosquiaya pampa quipalaje inminyolo pa pehualosquiaya laijnamiquilo quinami Dios quinequi. ¿Ca aqui ilahuelilitilisi quinchihuilini Juan inon? ¿Cataya ilahuelilitilisi Dios o lacames?

⁵Yehuanten molaquetzilijque ca yehuanten inminhuán, moilijque:

—Sinda tiquilisi pampa cataya ilahuelilitilisi Dios, cuaquinon techlajlanis: “¿Leca amo anquineltoac?” ⁶Sinda tiquilisi pampa cataya inminlahuelilitilisi lacames, cuaquinon moxtin techlaxilisi tixcalimes, pampa yehuanten neli quijttulo pampa Juan yec ilajtuni Dios.

⁷Pampín quinnanquilijque Jesús:

—Amo ticmatilo aqui ilahuelilitilisi quiapiaya Juan.

⁸Cuaquinon Jesús quinmilic:
—Huan nehual noje amo annimitzilisi
ca aqui ilahueliltilisli niquinchá
innojen.

Sequin tequipanujquimes ej'elehuis

(Mt. 21:33-44; Mr. 12:1-11)

⁹Cuaquinon pehuaya quinmili
in lacames in lajnamiqutilisli pa
quinmaxtisquiaya, quinmilic:
—Cataya se lalac quilaltocac pan se
cuajmili ipacholimes uva huan temacac
lajlajco iuvatilan ca oc sequin lacames
pa quitequipanuulisi. Cuaquín in lalac
quisac pa ichan huan uyac huejca huan
nepa mocahuac míac tonalijmes, huan
in oc sequin lacames quilachililoaya
iuvatilan. ¹⁰Yucsije in uvas, huan
in lalac quitilanic se tequipanujquil
pa yasquiaya pa in lacames hual
quilachililoaya iuvatilan. Quintilanic
pa yehuanten quimacalosquiaya se
ilajco in uvas hual quitequije. Huan
in lacames quihuitequije chicahuac,
huan quicholultije huejca, amo
quimacaje uvas nindeno. ¹¹Oc sejpa
in lalac quitilanic oc se itequipanujquil.
Huan yihual noje quihuitequije
chicahuac huan quihuejuecaltije,
cuaquín quicholultije, amo quimacaje
nindeno. ¹²Oc sejpa quitilanic oc se
tequipanujquil, huan in se quitecuaje
huan quisaya esli, cuaquín quilasaje
pa quiahuac. ¹³Cuaquinon quijituc
iteco in uvatilan, quil: “¿Len nicchías?
Axcan nictilanic noxól, yihual hual
nicnequi míac. Cuajnesi ca yihual
quimatisi momajtisi.” ¹⁴Ma yoje, in
tonali in tequipanujquimes ej'elehuis
quitaje ixól, molaquetzilije, moilije:
“In se yahui quiá in uvatilan pampa
unca iyaxca itajtzin. Ma ticmictican pa
timoyaxcajtisi tehuanten in uvatilan pa
yes toyaxca.” ¹⁵Cuaquinon quilasaje pa
quiahuac in uvatilan, nepa quimictije.
¿Len, axan, quinchihuilis in lacames
iteco in uvatilan? ¹⁶Yihual hualas

huan quinmictis in lacames ej'elehuis.
Cuaquinon temacas ca lajlajco
iuvatilan ca oc sequin lacames pa
quitequipanuulisi. Ja in san.

Yehuanten hual quicaquijque in
lajnamiquitilisi quilijque:

—Ma como quimacahuiltili Dios pa
panus inon.

¹⁷Huan Jesús lachíac capa yehuanten
huan quinmilic:

—Cuaquinon, ¿len quinejquijtu in
hual unca lajcuiluli pa Dios ilajto? Yoje
quijtúa:

Cataya se tixcali hual amo
quinequiloaya quilalilo
yehuanten hual quichihualoaya
in cali.

Ma yoje iteco in cali quilalic
in tixcali capa yehuanten
hual quichihualoaya in cali
yahuiloaya quipehualtilo in cali.

Pampín quipialoaya pa
quinlalilosquiaya in oc sequin
tixcalimes pejticate capa quilalic
in tixcali iteco in cali.

Yoje quijtúa ilajto Dios huan
quinejquijtu inon: ¹⁸Sinda se mochías
nolacololini cuaquinon yes quinami
momañajtisi huan huetzis pan in
tixcali. Cayas quinami latecuali
chicahuac. Huan sinda se mocahua
amo quinectica nechneletoya, yes
quinami in tixcali huetzisquiaya
pani yihual huan quitesisquiaya pa
mochihuasquiaya lalmoluncal hual
in ijyecal quihuicasquiaya. Quinami
yoje cayas pan tonali Dios quitojtocas
ilaixpan yihual se lalac. Yoje mocahuas
lajcuanili, yajmo huil ajsi capa Dios.

Ilapixcalisli tomin, ¿ticlaxlahuisi?

(Mt. 22:15-22; Mr. 12:13-17)

¹⁹Cuaquinon ca nadita quitemujque
quinami huil quiquitzililosquiaya
Jesús in tiopistas huejué huan
ilamaxtinijmes inminlajto in
judíos. Ma yoje momajtiloaya

pampa in lacames quicaquiloaya. Quimatiloaya in huejueyenten pampa Jesús quinequiaya quiytu pampa yehuanten cataloaya quinami innojen lacames ej'elehuis quiman quinmiliaya in laijnamiquiltisli.

²⁰Ma yoje, mocahualoaya laijcuanili nadita, quichialoaya pa quiman huil ajsilosquiaya ca yihual. Cuaquinon quinlaquehuajque lanapachinijmes, mochihuaje quinami cataloaya lacames cuali mas que lacuajcuamanaloaya. Yoje quinequiloaya quichihuililo pa quiytusquiaya Jesús len lajtol calica huil quimotexpahuililosquiaya. Yoje quitemacalosquiaya pa in gobernador romano. Cataya jan yihual san hual quiipiaya lahueliltisli pa latilanisquiaya pa quimictilsquiaya Jesús. ²¹Huan in lanapachinijmes quilajlanijque Jesús, quilijque:

—Lamaxtini, ticmatilo pampa tehual tiquijtúa len unca cuali huan ticmaxtía len unca cuali. Ticmatilo noje pampa amo tiquita se quinami yihual cuali huan oc se amo yoje cuali. Huan ticmaxtía iojli Dios hual yihual quilalic pa canasi moxtin. Ticmaxtía melahuac, amo quiman ticmaxtía len hual amo unca quinami Dios quijtúa. ²²Axan, xitechili, ¿quimacahuiltía tolajtol pa ticlaxlahuisi in hué César in tomin pa ilahueliltisli, o amo quimacahuiltía?

²³Jesús quimatiaya quinami yehuanten quichihualoaya pa quimoixpolultilosquiaya ca ilajtomes. Cuaquinon huil quimotexpahuililoaya inminlaixpan in hueyenten ihuelitinijmes in hué César. Yoje Jesús quinmilic:

—Xichnextili se tomin.

²⁴Quinextilijque. Cuaquinon quinmilic:

—¿Aqui unca in itzontecon huan itocapan in tomin?

Yehuanten quilijque:

—Unca iyaxca in hué César.

²⁵Cuaquinon Jesús quinmilic:

—Pampín, anquipía pa anquilaxlahuisi in tomin pa in hué César ilahueliltisli, huan anquipía pa anquimacas César mochi hual unca iyaxca César. Huan jan yoje anquipía pa anquimacas Dios mochi hual unca iyaxca Dios.

²⁶Yojque amo huil quiytuloaya nindeno amo cuali ca quinami quinnanquilic Jesús, pampa moxtin yehuanten hual nepa moquezataloaya quicaquiloaya Jesús huan quimatiloaya pampa amo moixpoluc ca innojen lajtomes hual quinnanquilic. Huan mocahualoaya moizticate lapolultili in lacames hual quilajlanijque inon. Mocahualoaya yoje pampa quinnanquilic Jesús ca ilajmatilisli hué.

Quilajlanilo Jesús sinda yulisqui oc sejpa

(Mt. 22:23-33; Mr. 12:18-27)

²⁷Cuaquinon hualajque capa Jesús sequin saduceos, yehuanten quimaxtilo pampa amo yulisqui oc sejpa yehuanten hual miquilo. Huan quilajlanijque Jesús, quilijque:

²⁸—Lamaxtini, Moisés hual yulini pa yina techijcuiluilic inon: Sinda se lacal miqui, quipía isihua huan amo quinpialo xolomes, cuaquinon icni in lacal hual miquic canas isihua icni hual miquic. Cuaquinon yehuanten quinpiasi xolomes huan quintocayaltisi quinami motocaya icni hual miquic.

²⁹Axan, cataloaya chicome icñan. Canac se sihual se inmicni, amo quinpiaje xolomes, cuaquín miquic in lacal. ³⁰Canac isihua ihuñan oc se icni, cuaquinon miquic, amo quinpiaje xolomes. ³¹Huan umpa canac in sihual ihuñan oc se icni, miquic. Yojque panuc ca moxtin in chicome, amo quinpialoaya xolomes ca in sihual, moxtin miquije. ³²Huan cuaquín miquic in sihual noje. ³³Axcan, sinda yulisi oc sejpa yehuanten hual miquilo,

¿pa calía innojen chicome yes in sihual?
Pampa moxtin in chicome lacames
quipialoaya in sihual.

³⁴ Jesús quinnanquilic:

—Jan yehuanten hual yulilo pin
lalticpan monamictilo. ³⁵Ma yoje,
quiman lamis in lalticpan hual axan
unca, amo monamictilo yehuanten hual
Dios quinlajtultic pa yulisi oc sejpa
capa yihual unca pin cielo. ³⁶Noje
yajmo huil miquilo, cayasi quinami in
lanahuatinijmes pin cielo. Yehuanten
amo monamictilo huan amo miquilo.
Quema, cate ixolomes Dios yehuanten
hual yulisi capa yihual quiman
miquisi. ³⁷Huan neli unca pampa
yehuanten hual miquilo yulisi oc sejpa.
Moisés anmitzmachiltía inon, pampa
quijcuiluc len in Tata Dios quilic nepa
quilaquetzilijtataya ca ilajtol quistataya
pin huitzcuaajtzindi. Quilic: “Nehual
iDios Abraham huan iDios Isaac
huan iDios Jacob”, quilic. ³⁸Dios amo
unca inminDios in mijquimes, yihual
inminDios yehuanten hual yulticate,
pampa Dios quinmita moxtin quinami
yulticate.

³⁹Cuaquinon sequin ca
ilamaxtinijmes inminlajtol in judíos
quilijque:

—Lamaxtini, tilajtuc cuali.

⁴⁰Inon quilijque pampa axan
momajtiloaya pa quilajlanilosquiaya oc
se lajtol.

¿Aquí ixolol in Cristo?

(Mt. 22:41-46; Mr. 12:35-37)

⁴¹Cuaquinon Jesús quinmilic:

—¿Quinami huil quijtulo pampa in
Cristo ja unca san imiahuil David?

⁴²Yihual David quijtúa pa iamal in
Salmos yoje:

In Tata Dios quilic noTata, quilic:

“Xihueliti ca nehual timolalijtica pa
noma cuali.

⁴³Huan ajsis in tonali hual
niquinchihuilis moxtin

molacocolinjmes pa
mitzneltocasqui.”

⁴⁴Yoje, David quitocayaltic “noTata.”
Pampín, in Cristo unca niman hué huan
David amo unca hué quinami yihual.
Cuaquín, ¿quinami unca in Cristo
imiahuil?

Jesús quinmotexpahuilía ilamaxtinijmes inminlajtol in judíos

(Mt. 23:1-36; Mr. 12:38-40; Lc. 11:37-54)

⁴⁵Cuaquinon Jesús quinlaquetzilic
imonextilinijmes huan moxtin in
oc sequin noje quicaquiloaya len
quinmilijtataya, quinmilic:

⁴⁶—Ximijmaztiacan inminpampa
ilamaxtinijmes in lajtol. Yehuanten
quinequilo molaquentitinemilo ca
nahuajmes cuajcualtichin. Quixtocalo
pa moxtin quinpialtico ca mochi
momajtilisli pin lajcotiyan. Quixtocalo
molalilo pin tiopajmes capa cate in
icpalimes pa in huejueyenten. Huan
quiman molalilo pa lacuasi, quixtocalo
molalilo pan icpalimes hual cate pa
in huejueyenten. ⁴⁷Quinequilo pa
moxtin quinmomajtilisli míac, huan ma
yoje, quincajcayahualo sihuames hual
cate inminhuían, quinmoyaxcajttililo
inmincalimes. Huan pa nesisi quinami
cate lacames cuajcuali, mas que
quinmixtequililo, huejcahualo míac
mochijticate quinami quilajlanticate
Dios, quijtuticate míac lajtomes.
Yehuanten Dios quincocoltis niman
míac, amo yoje míac quincocoltis oc
sequin.

Itomin in sihual ihuían hual san quipiaya nadita pa molacualtis

(Mr. 12:41-44)

21 Cuaquinon lachíac Jesús,
quinmitac yehuanten in
lacames hual quipialoaya míac tomin
quilalijtataloaya inmintomin pin capa
quilasaloaya tomin nepa pin tiopan
hué. ²Huan quitac se sihual ihuían

amo quipiaya ca len yulis. Yihual quilalic nepa ome tomin hual cataloaya tijtipichin, amo cataloaya oc sequin tomin yoje tipichin. ³Cuaquín Jesús quinmilic in lacames:

—Neli annimitzilía, Dios quita quinami in sihual ihuían quilalic nepa míac tomin. Amo yoje míac inon hual in oc sequin quilalije, mas que yehuanten quilasaje nepa míac tomin.

⁴Unca pampa yehuanten quimacaje nadita inmintomin hual quipialoaya míac. Huan mas que in sihual ihuían amo quipiaya calica molacualtis, quilalic mochi in tomin hual quipiaya.

Jesús quinmili pampa cayas laxitinili in tiopan hué

(Mt. 24:1-2; Mr. 13:1-2)

⁵Sequin laquetzaloaya quinami in tiopan hué cataya lachihuali ca teles cuajcualtichin, noje cataloaya cajcapa míac hual ij'ipati hual lacames hual quipialoaya míac tomin quimacajque Dios. Huan Jesús quinmilic:

⁶—Xitinisi innojen hual anquinmiztica. Ajsisi in tonalijmes huan amo mocahuas se tel ipan oc se tel, mochi yesi lamayahuilí.

Jesús quinmilía len panus pan tonalijmes quiman yahui lami in lalticpan hual axan unca

(Mt. 24:3-28; Mr. 13:3-23)

⁷Quilajlanijque Jesús, quilijque:

—Lamaxtiní, ¿quiman yahui panúa inon? Huan ¿quinami ticmatisi quiman mochi inon yahui pehua panúa?

⁸Jesús quinanquilic:

—Ximolachilijtiacan pa camo anmocahuas pa anquineltochas nolajtomes, pampa hualasi míac hual motocasi ca notoca pa yoje quipías lahuelilitlisli inon hual anmitzilisi. Anmitzilisi: “Nehual niCristo.” Huan quilisi: “Axcan ajsic in tonali hual Dios anmitzilic.” Amo xiquintocatiacan.

⁹Huan quiman yes anmitzmachiltisi pampa cate moanalisi huan quinami lacames cualantinemisi pa quichihuasi moanalisi, amo ximomajtitiacan pampa mochi innojen quipialo pa panusi pa quinpehualtis itonalijmes in lacocoltilisli. Ma yoje, ayamo lamis in lalticpan.

¹⁰Cuaquinon quinmilic Jesús:

—Moanasi yehuanten pa se lali ca yehuanten pa oc se lali, huan amo mosehuisi pa moanasi. Quema, cajcapa yes moantiasi, huan in huejueyenten pa se lali quichihuilitjiasi pa inminguaches pa inminlali moanasi ca oc se lali iguaches. Yoje panus ca míac lalimes. ¹¹Cayasi míac laulinilisi chijchicahuac cajcapa pa mochi in lalticpan. Huan cayasi cajcapa pin lalticpan mayandi huan míac cocolisli hual mosemanas ca míac lacames cajcapa cayasi. Cayasi lanextilisli hual quinmajmajtisi moxtin. Huan nesisi pin cielo oc sequin lanextilisli hual quinmahuisultisi lacames ca lamajtilisli hué.

¹²Ma yoje, mochi innojen panusi quiman panuje tonalijmes capa anmitzquitzquisi pa anmijtzacuasi pa calijtic. Anmitztojtocasi, anmitztemacasi inminlaixpan inminhuejueyenten in tiopajmes pa anmitzljajlanisi amhuanten. Anmijtzacuasi pa calijtic quinami anyesquiaya lacames niman amo cuajcuali. Anmitzhuicasi inminlaixpan in huejueyenten huan huelitinijmes pampa annechneltoca. ¹³Pa innojen tonalijmes quiman anmitzpanus innojen, yoje anmitzmacas quinami huil anquinlaquetzilis quinami nehual huil niquinixtía pin polehuilisli. ¹⁴Yoje, xiclalican in pa anmoyolo: Amo xilajtucan pa anmoyolo quinami anyahui anquinnanquilía quiman yes ayamo ancayas inminlaixpan yehuanten pa anmonapatis, ¹⁵pampa

nehual annimitzpalehuis. Nehual annimitzhueliltis pa anlajtus huan annimitzmacas noje lajmatilisi ca lajtomes huan annimitznextilis jan yoje quinami anquinmilis in lajtomes. Yoje moxtin anmolacocolinjimes amo quimatisi quinami monanquilisi in lajmatilisi hual annimitzmacas, huan yehuanten amo huil anmitznanquilisi len pa monapatisi pampa annimitzmacas in lajtomes. ¹⁶Huan anmitztemacasi anmotajtzitzián huan anmocnián huan anmocnián pa oc sequin calimes, anmitztemacasi ca in huejueyenten huan sequin ca amhuanten anmitzmictisi in huejueyenten. ¹⁷Quema, moxtin amo anmitzixtocasi, anmitzcocolisi pampa annechneltoca nehual. ¹⁸Ma yoje, mas que anpanus in lacocoltilisi, Dios amo quiman quinmacahuilts pa anmitzquixtisi capa yihual unca, no, amo jan se anmotzondi. ¹⁹Ximopepenialtican mochi inon ca chichahualisi, pampa yoje anquipías anmoyulilisi, mas que cuajnesi anmitzmictisi. ²⁰Huan in tonali hual anquitas in caltilan hué Jerusalén ca mfac mfac guachaje itenco, cuaquinon xicmatican pampa in guachaje amo huejcahuasi pa quixitinisi. ²¹Cuaquinon yehuanten hual cate pin mochi in lalticpan Judea ma cholucan pa in lomas huejca. Huan yehuanten hual cayasi pa Jerusalén ma quistiquisacan. Huan yehuanten hual cayasi pa quiahuac Jerusalén, yehuanten hual chantilo pa caltilan tijtipichin huan pin cuajlan itenco Jerusalén, ma como calaquican pa Jerusalén. ²²No —quilic Jesús—, ma como calaquican, pampa in tonaljmes cayasi tonaljmes hual Dios quincocoltis in judíos pampa amo quineltoalo. Quincocoltis pampa quichihuaje mfac pa quintzacuilisi lacames pa como quineltoasi ilamachiltilisi

cuali. Mochías mochi hual unca lajcuiluli inminahuac in lacocoltilisi hual yalo panulo. ²³Huan iquichi panusi lacocoltilisi in sihuames hual yalo quilacatitilo xolomes, huan yehuanten hual lachichiltitiasi innojen tonaljmes! Quema, pampa moxtin in lacames hual mocahualo pin lali panusi lacocoltilisi. Dios icualanilisi cayas pan yehuanten. ²⁴In guaches quinmictisi ca inminteplimes calica moanalo, huan quinhuicasi laipili pa yesi tequipanujquimes hual amo quinlaxlahuilo pa mochi inminlalimes yehuanten hual amo judíos, amo mocuepasi ca caniquic. Huan mocahuas Jerusalén se caltilan capa lacames hual amo judíos huelitisi. Nican huelitisi pa mfac xixihuil. Cuaquín ajsis in tonali quiman lamisi in xixihuimes hual Dios quinlalic pa huelitisi.

Jesús quinmilía quinami yihual yahui huala oc sejpa pan lalticpan

(Mt. 24:29-35, 42-44; Mr. 13:24-37)

²⁵Cayasi quinami lanextilisi pa in tonali huan in mesli huan in luceros (silalimes), pampín momajtisi lacames. Huan nican pan in lalticpan comontías huan majcoctías chichahuac in al huejcalan, huan pampín momajtitiasi in lacames pampa amo quimatisi leca yoje quichías. ²⁶Quema, lacames miquisi ca momajtilisi pampa quiztiasi innojen hual yahui quipanúa in lalticpan capa yulilo. Momajtisi pampa motzejtzelusichichahualisi mochi in cielo huan in lalticpan. ²⁷Cuaquinon, moxtin nechitiasi nehual ilacal in cielo. Nechitiasi nihualas pan se mextemil, nihualas ca chichahualisi hué huan laixpelalisi niman cualtichin. ²⁸Pampín, in tonali quiman pehuasi panusi innojen, ximochijchijtiacan huan xilachixtiacan. Xicayacan quinami anyahui anquita in hual anquenequiaya anquita pa quiman,

pampa quema, ajsitihualas in tonali hual annimitzquixtis pin mochi lacocoltilisli hual anpanujtías.

²⁹Cuaquinon Jesús quinmilic se laijnamiqutilisli pa quinnextilisquiaya inon hual quinmilijtataya, quinmilic:

—Xiquitacan in amacuál tipichin huan mochi in cuahuimes. ³⁰Xuchujtiasi huan selistitiasi, cuaquinon anquimatis axan ajsitihuala in xupanda. ³¹Yoje, amhuanten, quiman anquitas innojen panujtiasi, cuaquín xicmatican pampa ajsitihualas Dios pa huelitis pan lalticpan.

³²Neli annimitzilía inon: Panus inon hual annimitzilijtica quiman ayamo miqusi moxtin hual yulticate pa innojen tonalijmes. ³³Lamisi in cielo huan in lalticpan. Ma yoje, nolajtomes amo quiman lamisi, amo quiman moca huasi pa mocaquisi.

³⁴Ximolachilican pa como amhuanten cuajnesi anquimacahuiltis pa mochihuasi chicahuac anmoyolo ca lahuanalisli huan oc sequin laijlaculisli. Ximolachilican pa como ancayas quinami yehuanten hual mojmosta motolinilo san pa canasi len quinequilo. San quijnamiquilo in hual panúa pan in lalticpan hual axan unca. Sinda anunca yoje, cuaquinon in tonali hual nimocuepas pan lalticpan anmitzajsis jan ajnaxcan huan amo ancayas anquichixtica. ³⁵Quema, pampa quinmajsis moxtin yehuanten hual chanticate pan mochi in lalticpan.

³⁶Xiyén, cuaquín, quinami yehuanten hual ejsaticate, xiclajlanican Dios pa amhuanten huil ancayas laquixtili pin mochi innojen hual yalo panulo. Yoje anmoquetzas amo anmomajtitica noyampa nehual ilacal in cielo, huan amo annimitztilanis pa lacocoltilisli hual amo quiman lamis.

Yoje quinmilic Jesús.

³⁷Huan mojmosta cataya Jesús pin tiopan hué lamaxtitataya. Pa

layúa quisaya pa Jerusalén, panuaya lajlayúa pin lomita (tepetzindi) itoca Olivos. ³⁸Huan hualaloaya moxtin pa laxpoyahua pa in tiopan hué pa quicaquilosquiaya.

Molalilo pa quiqitzquisqui Jesús

(Mt. 26:1-5, 14-16; Mr. 14:1-2, 10-11; Jn. 11:45-53)

22 Cuaquinon ajsitihualaya itonali in fiesta (ilhuil) capa quicualo in judíos in pan hual amo quipía laxocoyajquil, in ilhuil itoca Pascua. ²Quitemuloaya in tiopistas huejué huan innojen ilamaxtinijmes inminlajtol in judíos quinami quiqitzquilosquiaya Jesús pa quimictilosquiaya. Huan amo huil quiqitzquiloaya pampa momajtiloaya laixpan in lacames hual quitocaloaya. ³Cuaquinon Satanás moyaxcajtlic iyolo Judás, in se hual quitocayaltijque Iscariote. Yihual yec se ca in doce lanahuatinijmes. Satanás moyaxcajtlic yihual pa quinextilisquiaya quinami yihual Judás huil quitemacasquiaya Jesús ca yehuanten hual quinequiloaya quimictilo. ⁴Cuaquinon uyac Judás pa laquetzasquiaya ca in tiopistas huejué huan in piscales, quinmilic quinami yahuiaya quintemaquili Jesús. ⁵Yoje yehuanten paquiloaya niman míac huan quichihuajque se laquetzalislí ca Judás pa quilaxlahuisqui ca tomin huan quimacajque. ⁶Cuaquinon yihual quinmilic neli pampa quintemaquilisquiaya Jesús, huan pehuac quitemuc quinami huil quitemaquilisquiaya Jesús ca yehuanten. Quinequiaya quichía capa amo cayasquiaya míac lacames ca Jesús hual quinapatilosquiaya.

Ilacualisli toTata

(Mt. 26:17-29; Mr. 14:12-25; Jn. 13:21-30; 1 Co. 11:23-26)

⁷Ajsic in tonali quiman quicualo judíos in pan hual amo quipía

laxocoyajquil. Pa in tonali quipialoaya pa quimictilosquiaya in borreguito pa in fiesta (ilhuil) itoca Pascua. ⁸Jesús quintilanic Pedro huan Juan, quinmilic:

—Xiacan xitechyucxiltilican in borreguito pa tijcuasi pa in fiesta.

⁹Huan quilijque:

—¿Capa ticnequi pa ticyucxiltisi?

¹⁰Quinmilic:

—Xiquitacan. Ancalaquis pa in caltilan, anmitznamiquis se lacal quimantihuala se tapalcal ca al. Xictocacan pa in cali capa calaquis.

¹¹Cuaquín xiquilican iteco in cali: “In Lamaxtini mitzilá: ¿Capa unca in calijtic capa nehual nijcuas iborreguito Pascua ca nomonextiliniymes?”, quil.

Yoje anquilis —quinmilic Jesús—, ¹²huan yihual anmitznextilis se calijtic hué pa pani calijtic in cali capa moitasi mochi hual monequi pa ticpiasi. Nepa xicyucxiltican.

¹³Uyaje Pedro huan Juan, quitajque jan quinami Jesús quinmilic, huan quiyucxiltijque in borreguito. ¹⁴Ajsic in layúa pa lacualosquiaya, molalijque pa lacuasqui Jesús huan imonextiliniymes ca yihual. ¹⁵Cuaquinon Jesús quinmilic:

—iNehual nicnequiaya míac nijcua in borreguito pa pascua ca amhuanten! Cuaquín nías pa nipanus nolacocoltilisi.

¹⁶Inon annimitzilá pampa yajmo nijcuas in lacualisli pan lalticpan. Ma yoje, quiman ajsis in tonali quiman moitas Dios huelitijtica, nepa nijcuas, pampa nepa lamis mochías mochi lachihualisli hual ayamo panuc hual pampa innojen ticpialo in fiesta Pascua.

¹⁷Quimacajque Jesús se tapalcatzindi huan yihual quisehuic Dios, cuaquinon quinmilic:

—Xicanacan inon huan ximoxiluilican ca amhuanten pa ancunis.

¹⁸Annimitzilá inon pampa yajmo quiman nicunis len lachihuali ca ilaquilyo uvas. Ma yoje, quiman ajsis in

tonali hual Dios huelitis pan lalticpan, cuaquín nicunis.

¹⁹Cuaquinon canac pan huan quisehuic Dios, quilapanac huan quinmacac, quinmilic:

—In nonacal, mochi nehual nimotemacas pa nimiquis pa amhuanten. Xijcuacan in, yoje pa annehijnamiquis.

²⁰Huan quiman lamijque lacuajque, canac Jesús in tapalcatzindi yoje quinami canac in pan, quinmilic:

—In hual ancunis pa in tapalcatzindi unca in lajtulisli yancuic ca nehual huan amhuanten. Nicchijtica in lajtulisli ca noesli hual toyahuis pa amhuanten. ²¹Ma yoje, xiquitacan. Yihual hual nechtemaca ca yehuanten hual nechcocolilo unca nican lacuajtica ca nehual. ²²Yalo nechmictilo nehual ilacal in cielo jan quinami Dios quilalic. Ma yoje iquchi yahui panu lacocoltilisi in lacal hual nechtemaca!

²³Cuaquinon pehualoaya molajlanilo huan molaxililo lajtomes yehuanten pa lajmatisi aqui yesquiaya hual yahuiaya quitemaca Jesús.

Laquetzalo pa lajmatisi aqui yes in hué ca yehuanten hual quinlaicanas

²⁴Pehualoaya molaxililo lajtomes in monextiliniymes, laquezataloaya pa lajmatisqui aqui ca yehuanten cataya in hué hual quinlaicanasquiaya moxtin. ²⁵Huan Jesús quinmilic:

—In huejueyenten ca yehuanten hual amo cate judíos huelitilo ca yehuanten ca chichualisli quinami tecojuan. Huelitilo pa yoje quinnextilisli yehuanten inminlahuelitilisli huan pa yoje quinnextilisli pampa cate niman huejué, huan pa yoje quinnextilisli yehuanten hual quinneltocaltisi pampa amo cate huejué yehuanten. Yehuanten in laicananiymes, quema, motocayaltilo ca tocajmes hual quinequilo quijtulo pampa yehuanten cate lacames

hual yulilo quinchihuilitjicate cuali yehuanten hual quinneltocaltilo.

²⁶Amhuanten amo anyes yoje. Monequi pa yes quinami in tipichin yihual hual unca in hué capa amhuanten. Huan yihual hual quinlaicana oc sequin ma ye se hual quinquipanuilfa in oc sequin. ²⁷Ma annimitzili len nicnequi niqijtúa. ¿Aqui in hué? ¿Unca yihual hual molalía pa lacuas, o yihual hual quitequipanuiljtica? ¿Amo unca in hué yihual hual molalijtica pa lacuas? Quema, unca yihual. Ma yoje, nehual niunca ca amhuanten quinami in se hual latequipanuiljtica.

²⁸Huan amhuanten anunca aquinojen hual anmocahuaya ca nehual quiman quitilanoaya noyolo pa nicchiasquiaya in hual amo cuali, quiman niqitaya mfac icnotilisi.

²⁹Huan nehual annimitzmaca lahuelilitilisi pa anhuelitis. Yoje noTajtzin nechmacac lahuelilitilisi pa nihuelitis. ³⁰Pampín yes anmoyaxca pa anmolalis pa anlacuas huan anlaunis ca nehual pan tonali hual nihuelitis. Yoje anquípías paquilisi ca nehual. Huan yes anmoyaxca pa anyes la'ajuanijmes pa anquinmotexpahuilis huan pa anquinmacahuas yehuanten hual cate iyaxca in lali Israel, yehuanten inminmiahuimes mochi sejse ca in doce ixolomes Israel.

Jesús quilfa pampa Pedro yahui quijtúa yihual amo quiximati Jesús
(Mt. 26:31-35; Mr. 14:27-31; Jn. 13:36-38)

³¹Jesús quilic Pedro:

—Simón, Simón, xiquita. Satanás latemachic pa anmitzanas amhuanten. Quinequi pa yajmo annehneltocas. Pampín quitemachic pa quimacahuiltisquiaya pa anmitzpanultisquiaya lacocoltilisi. Yoje Satanás quijtúa pampa inon yajmo annehneltocas. ³²Ma yoje, nehual nictemachic Dios pa tehual, Pedro,

pa camo mitzmacahuiltisquiaya pa timocahuas pa tichneltocas. Huan tehual, in tonali hual mocuepa moyolo ca Dios, xiquinpalehui mocnfan innojen oc sequin monextiliniymes pa nechneltocasi ca mfac chicahualisi.

³³Pedro quilic:

—Tata, sinda monequis, huan tehual tiasi pa ticayasi latzacuali ca calijtic, pa tehual nimiquis. Niunca nimochijchijtica pa nipanus inon.

³⁴Huan Jesús quilic:

—Pedro, nimitzilfa inon: Axan in layúa, ayamo xahuanis se gallo huan tiquijtus sejpa huan oc sejpa ca ye lajtulisli pampa amo tichiximati.

Ajsi in hora capa Jesús panúa lacocoltilisi

³⁵Cuaquinon Jesús quinmilic:

—In tonali hual annimitztilanic huan amo anquipiaya xotopa huan len pa tomin, huan san in ome lacsames, ¿monequiaya pa anquipiasquiaya len?

Quinanquilijque:

—Nindeno.

³⁶Cuaquín quinmilic:

—Axan, aqui hual quipfa xotopa, ma quihuica, huan ma quihuica len pa tomin noje. Huan aqui hual amo quipfa teposli pa moanalisi, ma quinamaca inahuas huan ma mocuhuili se. ³⁷Quema, ma quichfa yoje pampa annimitzilfa monequi pa nejchihuilitisi inon hual unca lajcuiluli nonahuac nehual pa iamal Dios ilajtuni. Huan yoje quijtúa hual unca lajcuiluli: “Quijtuque pampa yihual yec se lalac elehuis.” Quema, pampa ajsitihuala ilajco in tonali capa lamis mochfas in lajtol hual quijtúa in hual yahui nechpanúa nehual.

³⁸Huan in lanahuatinijmes quilijque:

—Tata, nican cate ome teposlimes pa moanalisi.

Jesús quinnanquilic:

—Yajmo tilaquetzasi inahuac inon.

**Jesús panúa lacocoltilisli
quilajlantica Dios pa Getsemani**

(Mt. 26:36-46; Mr. 14:32-42)

³⁹Cuaquinon quisac Jesús pa Jerusalén, mohuicac pa in loma itoca Olivos, quinami quichihuaya lajlayúa. Huan quitocaloaya yihual imonextiliniymes. ⁴⁰Ajsijque ca umpic, Jesús quinmilic:

—Xiclañlanican Dios pa camo anmitztilanilis anmoyolo Satanás. Yihual quinequi pa yajmo annechneltocas.

⁴¹Mijcuanic Jesús capa yehuanten pa cayas huejqita quinami se tixcali lalasalí. ⁴²Nepa molancuacuetzac, quilajlaniaya Dios, quilic:

—Tata, sinda ticnequi, xichquixti pa camo nipanus inon hual nía nipanu. Ma yoje, ma camo mochía quinami niqijtúa nel, jan ma mochía quinami tiqijtúa tehual.

⁴³Nesic ca yihual se ilanahuatini in cielo pa quichicahualtisquiaya.

⁴⁴Huan cataya panujtataya lacocoltilisli niman mía. Yojque quilajlaniaya Dios ca mía chicahualisli, huan ixicaya imijtonil chicuena esli ixicatataya pan in lali. ⁴⁵Cuaquinon moquetzac capa quilajlaniaya Dios, hualac capa cataloaya imonextiliniymes, quinmitac coxtataloaya pampa quincocujtataya inminyolo. ⁴⁶Huan quinmilic:

—¿Leca ancoxtica? Ximoquetzacan huan xiclañlanican Dios pa camo anmitztilanilis anmoyolo Satanás.

Quiquitzquilo Jesús

(Mt. 26:47-56; Mr. 14:43-50; Jn. 18:2-11)

⁴⁷Ayamo lamic quinmilic inon, ajsiloaya lalacera huan in se imonextilini motocaya Judas, yihual se ca in doce, quinlaicanaya. Yihual ajsiaya pa quitenamiquisquiaya. ⁴⁸Huan Jesús quilic:

—Judas, ¿tichtenamiquic nehual ilacal in cielo, pa yoje

tiquinnextilisquiaya nolacocoliniymes capa nel?

⁴⁹Quitajque imonextiliniymes len yahuiaya panu, quilijque:

—Tata, ¿amo timoanasi ca in teposli pa moanalisi?

⁵⁰Huan se ca yehuanten quitecuac ca iteposli itequipanujquil in tiopista hué, yojque quicotonilic se inacas pa ima cuali. ⁵¹Jesús calactiquisac capa moantataya, quilic:

—Xijcahua, yajmo xicchá inon.

Huan quisaluc inacas oc seña pa itzontecon, quipajtic.

⁵²Cuaquín Jesús quinmilic yehuanten hual hualajque pa quiquitzquilosquiaya, cataloaya tiopistas huejué huan in piscales huan in oc sequin hueyente, quinmilic:

—¿Anhualaya pa

annechquitzquisquiaya ca teposlimes pa moanalisi huan cuahuimes yoje quinami nicataya se laxtequini? ⁵³Mojmosta nicataya ca amhuanten pin tiopan hué, huan amo annechquitzquic. Ma yoje, in unca quiman Dios anmitzmacahuiltitica pa anquichías hual len anquequi. Noje Dios quimacac Satanás in lahuelilitisli pa axan in layúa, yihual Satanás huelitía capa laticumac.

**Pedro quilía pampa amo quiximati
Jesús**

(Mt. 26:57-58, 69-75; Mr. 14:53-54, 66-72; Jn. 18:12-18, 25-27)

⁵⁴Yoje quiquitzquijque Jesús, quihuicatiajque, quihuicajque pa ichan in tiopista hué. Huan quintocaya Pedro huejca inmintepotzcon. ⁵⁵Nepa pa ilajcotiyan ichan in tiopista hué quipitajque se tixuxli. Molalijque pa itenco in tixuxli, huan Pedro moqueztataya ca yehuanten. ⁵⁶Nepa cataya se tequipanujquil sihual, quitac Pedro moqueztataya, quilahuia in tixuxli. Huan yihual mocahuac quiztica jan seña, quinmilic:

—In se noje cataya ca Jesús.

⁵⁷ Pedro quiytuc pampa no, quilic:

—Sihual, amo niquiximati aquí yihual.

⁵⁸ Panuc nadita huan oc se lacal quitac Pedro, quilic:

—Tehual noje tiunca se ca yehuanten.

Huan Pedro quinanquilic:

—Lacal, amo niunca se ca yihual ilacames.

⁵⁹ Panuc quinami se hora quiman quiytuc inon, huan oc se lacal pehuac quiytuc pampa neli, quilic:

—Neli in se noje cataya ca yihual, pampa yihual noje unca se galileteco.

⁶⁰ Huan Pedro quinanquilic:

—Lacal, amo nicmati len tiqijtutica.

Huan jan ajnaxcan, ayamo laquisac lajtutataya Pedro, xahuanic se gallo.

⁶¹ Huan momalinac in Tata Jesús, quitac Pedro. Cuaquinon Pedro quiynamiquic len quilic in Tata Jesús, quinami yihual quilic: “Axan layúa ayamo xahuans se gallo huan tiqijtus ca ye lajtulisli pampa amo tichiximati nehual.” ⁶² Pampín quisac Pedro pa quiahuac, pehuac chocac chicahuac.

Quihuitzquililo Jesús

(Mt. 26:67-68; Mr. 14:65)

⁶³ Huan in lacames hual quiquitziqijque Jesús quihuitzquilijtinemiloaya, quihuitectinemiloaya. ⁶⁴ Quilpijque se dango pa iixtololjmes huan quilajlantinemiloaya, quililoaya: —iXilajtu ca Dios ilahuelilitlisli, xitechili aquí mitztecual!

⁶⁵ Huan ca míac oc sequin lajtomes quihuejuecaltitinemiloaya.

Jesús inminlaixpan in Lanechiculisli Hué

(Mt. 26:59-66; Mr. 14:55-64; Jn. 18:19-24)

⁶⁶ Quiman lanesic, monechicujque inminhueyente in judíos. Yehuanten cataloaya in tiopistas huejué huan ilamaxtinijmes inminlajtol in

judíos. Quihuicajque Jesús capa cataloaya lanechiculi yehuanten inminLanechiculisli Hué in tiopistas huan in lamaxtinijmes. ⁶⁷ Nepa quilijque:

—Sinda tehual tiunca in Cristo hual Dios mitztilanic, cuaquín xitechili.

⁶⁸ Huan Jesús quinmilic:

—Sinda annimitzilfa, neli amo anquineltocas. Huan sinda annimitztlajlanis len anquinequi anquijtúa quiman annehlanjlanía sinda niunca in Cristo, neli unca da amo annehnanquilis. ⁶⁹ Ma yoje, axan huan pa mosta nehual ilacal in cielo nicayas nihuelitijtica ca Dios ilahuelilitlisli, nepa nimolalis pa ima cuali Dios.

⁷⁰ Cuaquín moxtin quilajlanijque:

—Tehual nuso, ¿tiunca ixolol Dios?

Jesús quinnanquilic:

—Jo quema, nehual niunca quinami anquijtúa.

⁷¹ Yehuanten quiytujque:

—iYajmo monequi pa tilajlantinemisi, pampa tehuanten nojen tijcaquije quinami quiytuc ca icamac!

Jesús ilaixpan Pilato

(Mt. 27:1-2, 11-14; Mr. 15:1-5; Jn. 18:28-38)

23 Cuaquinon moquetzajque moxtin hual cataloaya nepa pin Lanechiculisli Hué, quihuicajque Jesús capa cataya in gobernador romano itocaya Pilato. ² Nepa pehualoaya quipitzililo tixuxli, quimotexpahuililoaya, quilijque: —Tilajlanije huan ticmatije pampa in se quinequiaya quipehualti moanalisi ca in lacames pa tolali. Quinequiaya quitzacuili pa camo quilaxlahuilosquiaya ilapixcalisi in tomin pa in hué César. Noje quijtúa pampa yihual ihuán unca se hué hual itoca Cristo.

³ Cuaquín Pilato quilajlanic Jesús, quilic:

—¿Tehual tiunca inminhué in judíos?
Jesús quinanquilic:

—Jo quema, unca tehual hual
tiquijtúa.

⁴Huan quinmilic Pilato in tiopistas
huejué huan in lalalera, quinmilic:

—Amo niquitilía nindeno amo cuali
ca in lalal.

⁵Ma yoje, yehuanten quijtuloaya
pampa neli cataya yojque,
quipitzililoaya tixuxli, quilijque:

—Techmocualantilía tehuanten in
judíos pa cuajnesi timoanasi. Yihual
lamaxitinemi pa mochi in lalticpan
Judea, pehuaya pin lalticpan Galilea,
lamaxtitihualaya ca niquic.

Jesús ilaixpan Herodes

⁶Quicaquic inon Pilato, quilajlanic
sinda Jesús yec galiletco. ⁷Huan
quimatic pampa quema, yuliaya
Jesús pa Galilea capa in hué Herodes
huelitiaya. Cuaquín quitilanic Jesús
capa Herodes, yihual quiplaya
lahueliltilisli ca galiletecos. Huan pa
innojen tonalijmes, Herodes cataya pa
Jerusalén pa in fiesta (ilhuil). ⁸Yoje,
quiman Herodes quitac Jesús, quiplaya
míac paquilisli, pampa quiplaya míac
tonalijmes quinequiaya quita. Cataya
pampa yihual quinquaiaya moxtin
laquetzaloaya inahuac mochi hual
quichihuaya yihual. Huan quichiaya
pa quitasquiaya len hual Jesús
quichiasquiaya, quinequiaya quita len
lanextilisli hual quimahuisultisquiaya
Herodes ca lamajtilisli. ⁹Pampín
Herodes quilajlaniaya Jesús ca
míac lajtomes. Ma yoje, Jesús amo
quinanquilic nindeno. ¹⁰Moquetzaloaya
in tiopistas huejué huan ilamaxtinijmes
inminlajtol hual quinnextililo in judíos
quinami quimolancuacuetzililo Dios,
huan quimotexpahuililoaya Jesús
chicahuac. ¹¹Jan yojque, quixijxicujque
Herodes huan moxtin yehuanten hual
cataloaya ca yihual, quihuitzililoaya.

Cuaquinon Herodes quilaquentic
Jesús ca se nahuas cahuanquil calica
molaquentilo huejueyenten. Cuaquín
quitilanic oc sejsa capa cataya Pilato.

¹²Huan pampín pa in tonali pehualoaya
moixtocalo Herodes huan Pilato, mas
que amo moixtocanijme quiman ayamo
panuc inon.

Quijtulo pampa Jesús quipías pa miquis

(Mt. 27:15-26; Mr. 15:6-15; Jn. 18:39-19:16)

¹³Cuaquinon quinquatic Pilato pa
monechiculosquiaya in tiopistas huejué
huan yehuanten hual quipialoaya
lahueliltilisli huan in lalalera.

¹⁴Quinmilic:

—Annechualiquilic in lalal,
annechilijtataya pampa yihual
quinmocualantiliaya in judíos pa
quipehualtilosquiaya moanalisli ca in
romanos. Huan xiquitacan, niclajlanic
anmolaixpan huan amo niquitilic
nindeno amo cuali ca in lalal quinami
inon hual anquimotexpahuilijtica.

¹⁵Huan Herodes noje amo quitilic
nindeno ca yihual pampa nechtilanic
oc sejsa. Huan xiquitacan, yihual amo
quichíac nindeno. Pampín, quinami
quijtúa in lajtol, amo huil tilatilanilo
pa yes lamictili. ¹⁶Yoje, nilatilanis
pa quihuitequisi noguaches ca in
lahuitequiloni ca teposli, cuaquín
nicmacahuas.

¹⁷Inon quinmilic Pilato pampa
mochi xihuil cataya ilachihualisli
in huelitinijmes romanos pa
quinmacahuilosquiaya in lalalera pa
nepa in fiesta (ilhuil) se hual cataya
latzacuali ca in lacames lailpili. ¹⁸Huan
tzajtzijque yehuanten moxtin, quilijque:

—iXicmicti in se, huan
xitechmacahuili Barrabás!

¹⁹In Barrabás yec se hual
quincualantic in judíos pin caltilan
hué. Quinequiaya quipehualti se
moanalisli. Yihual noje quimictic

se local, pampín quitzacuajque pa calijtic. ²⁰Oc sejpa quinnotzac Pilato yehuanten, quinmilic pampa quinequiaya quimacahua Jesús. ²¹Ma yoje, yehuanten quitzajtzilijtinemiloaya yihual, quililoaya:

—iXicpilu pan se cuahuil, xicpilu pan se cuahuil!

²²Axan, huan ca inon cataya ye lanotzalisli, Pilato quinmilic:

—¿Leca? ¿Len amo cuali quichfác in local? Amo niquitilic nindeno yihual hual monotza pa yes lamictili, huan amo huil nilatilanía pa quimictisi. Pampín, nilatilanía pa quihuitequisi, cuaquinon nicmacahuas.

²³Ma yoje, yehuanten amo mocahualoaya pa quililosquiaya ca lajtomes chijchicahuac pa quipilulosquiaya pan se cuahuil, huan ca in mífac tzajtzilisi, yojque quisulahuajque Pilato. ²⁴Pampín yihual latilanic pa Jesús yesquiaya lamictili quinami quitemachiloaya yehuanten.

²⁵Cuaquinon, Pilato latilanic pa quimacahualosquiaya yihual hual quitzacuajque pin calijtic, yihual hual quinequiaya quipehualti moanalisi huan hual quimictic se local. Quema, yihual quimacahuajque quinami in judíos quitemachiloaya. Huan Jesús, yihual Pilato temacac ca yehuanten pa quichihuililosquiaya quinami quinequiloaya.

Quipilulo Jesús pan se cuahuil

(Mt. 27:32-44; Mr. 15:21-32; Jn. 19:17-27)

²⁶Huan nepa capa quihuicatiahuiloaya Jesús, quiquitzquijque Simón, yihual se local hual lacatic pin lali itoca Cirene. Cataya in Simón pa icuajmili huan axan mocuectataya pa Jerusalén. Quimamiltijque in Simón ca icuahuil Jesús pa quihuicatasquiaya itepotzcon Jesús. ²⁷Huan quitocaloaya lalalera, cataloaya yehuanten hual chantiloaya

pa Jerusalén. Ca yehuanten cataloaya sihuames hual motecuilijtiahuiloaya itzindan inminquixlan huan quichoquilijtiahuiloaya Jesús.

²⁸Momalinac Jesús ca yehuanten, quinmilic:

—Amhuanten sihuames hual anchantican Jerusalén, ximocahuacan pa annejchoquilis. Monequi pa anmochoquilis amhuanten. Huan xiquinchoquilian anmoxolomes, pampa xiquitacan: ²⁹Ajsitihualasi in tonalijmes hual moxtin quilisi: “Cate ca niman mífac paquilisi yehuanten hual amo yalo quinpialo xolomes, huan hual amo quiman quilacatilije xolomes, yehuanten hual amo quiman quinchichiltije xolomes”, quilisi. ³⁰Cuaquín pehuasi quijtsi: “iMa huetzican topan in lomas! iMa techpachucan in lomas pa timiquisi!”, quijtsi. ³¹Quema, pampa sinda nejchihuililo yoje in romanos nehual hual amo nicpía laijlaculisli, cuaquín iquinami amo yalo anmitzpitzililo tixuxli amhuanten hual anquinpía mífac laijlaculisli! In cuahuil huaquic chichinahuía ca mífac milinilisi, amo yoje chichinahuía in cuahuil xuxuhuic.

³²Quinhuicaloaya noje oc sequin ome lacames pa quinpilulosquiaya ca Jesús, in omenten yeje laixtequinijmes huan lamictinijmes. ³³Huan ajsijque pa capa itoca Tzontecomal, nepa quipilujque Jesús pan in cuahuil huan noje quinpilujque in oc sequin omenten pan inmincuahuimes, se pa ima cuali Jesús huan in oc se pa ima amo cuali.

³⁴Huan Jesús quilic:

—Tata, xiquinpujpuhua yehuanten hual nechmictiticate, pampa amo quimatilo len quichijticate.

In guaches moxiluilijque itzotzomajli Jesús huan pa quichihualosquiaya inon, quicuixtijque cuajtzindis, huan quinlasajque in cuajtzindis quinami yoje pa quimatilosquiaya aqui

yahuiaya cana in tzotzomajli hual nepa quilalijque pa quipiasquiaya.

³⁵Huan mocahuajque lachixtataloaya in lacalera. In huejueyenten quihuitzquililoaya Jesús, quilijque:

—Oc sequin yihual quinquixtic pin miqilislí. Axcán, ma moquixti yihual pin imiqilislí sinda in se unca iCristo Dios hual Dios quitilanic.

³⁶Huan quihuitzquilijque in guaches noje, ajsijque, quichihuajque quinami quinequiloaya quicuniltilo iayo uva xocuc. ³⁷Quilijque:

—Sinda tiunca inminhué in judíos, cuaquín ximoquixti pin momiqilislí tehual.

³⁸Huan cataya se amal ca lajcuilulislí pani pin cuahuil, quijtuc: “IN UNCA INMINHUÉ IN JUDÍOS.” Huan cataya lajcuilulí ca lajtol latín huan ca lajtol griego huan ca lajtol hebreo.

³⁹Cuaquinon, se laxtequini hual pilujtataya ca Jesús, quihuejuecaltic Jesús, quilic:

—¿Amo tiunca in Cristo? Ximoquixti pin momiqilislí huan xitechquixti pin tomiqilislí tehuanten.

⁴⁰Quinanquilic in oc se laxtequini, cajuac, quilic:

—¿Amo timomajtía je nadita ilaixpan Dios, mas que ticmati tía timiqui tehual noje? ⁴¹Tehuanten tialo timiquilo pampa techahuilúa, ticchihuaje len amo cuajcuali huan tipanulo in lacocoltilislí. Huan in se amo quiman quichíac len amo cuali.

⁴²Cuaquinon quilic:

—Jesús, xichijnamiqui pan in tonali tihualas oc sejpa pa tihuelitis.

⁴³Huan Jesús quilic:

—Neli nimitzilíá, axan ticayas ca nehual pa iparaiso Dios.

Jesús miqiqui

(Mt. 27:45-56; Mr. 15:33-41; Jn. 19:28-30)

⁴⁴Cataya quinami lacualispan huan laticumactic pa mochi in lalticpan,

mocahuac laticumac pa ye pa tiolac, ⁴⁵amo lahuiaya in tonali. Huan in tzotzomajli telahuazo hual pilujtataya lajco pa in lasojli calijtic huan in niman lasojli calijtic pin tiopan hué, tzayanic pa lajco, mochíac ome. ⁴⁶Huan tzajtzic Jesús ca lajtol chicahuac, quilic:

—Tata, nimotemaca ca noyulilislí pa tichlachilis.

Quiman quijtuc Jesús inon, jan yoje miqic. ⁴⁷Nepa cataya in laicanani romano hual yec inminteco cien guaches. Quitac yihual len panuc, quijtuc lajtomes huejué huan cuajcuali pa Dios, quilic:

—Neli in lacal yec se lacal cuali, amo quichíac len amo cuali.

⁴⁸Huan moxtin in lacalera hual hualajque pa quitalosquiaya in lamictilislí, quitajque len panuc, pehualoaya motecuililo pa itzindan inminquixlan huan pehualoaya mocuepalo pa Jerusalén. ⁴⁹Ma yoje, mocahuajque nepa moquezataloaya huejqita yehuanten hual quiximatiloaya Jesús. Innojen sihuames noje hual quitocaloaya Jesús quiman quisaya pin lalticpan Galilea cataloaya quizataloaya mochi inon hual panuc.

Quilalpachulo Jesús

(Mt. 27:57-61; Mr. 15:42-47; Jn. 19:38-42)

⁵⁰Huan nepa cataya se lacal itoca José. Yihual yec se hué ca in Lanechiculislí Hué, yec se lacal cuali. Dios quitilic cuali iyolo José, pampa José yuliaya quinami Dios quinequi pa moxtin yulisi. ⁵¹Yihual amo cataya ca in lajtulislí hual quichihuajque in oc sequin hual yeje in Lanechiculislí Hué hual quimotexpahuililoaya Jesús pa quimictilosquiaya. Yihual yuliaya pa se caltilan itoca Arimatea, unca pa Judea inminlalticpan in judíos. In José quichiaya in tonali quiman huelitisquiaya Dios. ⁵²Yihual uyac ilaixpan Pilato, quitemachic pa yihual

quimacahuiltisquiaya quihuica imijquil Jesús. ⁵³Cuaquinon uyac quitemuhuilic, quiquixtic pin cuahuil, quiliaruc ca se tzotzomajli yancuic, huan quilalac pan se coyunquil lahuajuaneli pin tel, nepa ayamo quilalijque se mijquil.

⁵⁴In tonali cataya se hué tonali pa in inminilhuil (fiesta), itocac in tonali pa lachijchihualisli pampa mostatica yahuiaya ye itonali niman hué inminfiesta in judíos. Axcan pejtihualaya ajsi in itonali in ilhuil. ⁵⁵Huan quitocatiahuiloaya José in sihuames huejquta, yehuanten hual quisajque pa Galilea ca Jesús. Quitajque in coyunquil (ostul) huan quitajque quinami quilalijque ca laijtic imijquil Jesús. ⁵⁶Cuaquinon mocuepajque pa inminchan huan quichijchihuajque len ca chahuac hual ajufac calica quixahuillosquiaya in mijquil. Cuaquín ajsic in tonali hual mosehuilo in judíos huan mosehuiloaya in sihuames quinami quijtúa inminlajtol in judíos.

Jesús yuli oc sejpa

(Mt. 28:1-10; Mr. 16:1-8; Jn. 20:1-10)

24 Huan mostatica, cataya pa laxpoyahuita pa in tonali hual quipehualtía in chicome, hualajque in sihuames pa in coyunquil (ostul) capa quilalijque imijquil Jesús. Quihualicaloaya inon hual ajufac hual quichijchihuajque. ²Ajsijque, huan quitajque in tixcali hual cataya chicuenta se layahualujquil, quitajque lajicuanili in tixcali capa quitzactataya in coyunquil (ostul). ³Calaquijque, huan amo quitajque imijquil in Tata Jesús. ⁴Yojque, nepa cataloaya, amo quimatiloaya len quijtulosquiaya. Cuaquinon nestiquisajque ome lacames, cataloaya lalaquentili ca nahuajmes hual niman laixpelaloaya. ⁵Huan momajtijque in sihuames lachixtataloaya pan lali

pampa in laixpelalisli quinmixpelaya pa inmixtololojmes. Innojen lacames quinlajlanijque in sihuames, quinmilijque:

—¿Leca anquitemujtica nican pin mijquimes yihual hual yultica?

⁶Amo unca nican, axcan yultica oc sejpa. Xiquijnamiquican quinami anmitzilic inon pa innojen tonalijmes quiman ayamo anquisaya pa Galilea.

⁷Anmitzilic pampa monequiaya pa yihual ilacal in cielo yesquiaya latemacali ca lacames ej'elehuis. Yehuanten yahuiiloaya quipilulo pan se cuahuil, huan quiman panuje ye tonalijmes, yihual yahuiaya yuli oc sejpa.

⁸Cuaquinon quijnamiquijque len quinmilic Jesús. ⁹Quisaje pin coyunquil (ostul), uyajtiquisajque pa quimachiltulosquiaya in once lanahuatinijmes huan moxtin in oc sequin monextilinijmes mochi innojen hual panujque. ¹⁰Cataloaya María Magdalena, huan Juana huan María inantzin Jacobo huan in oc sequin sihuames ca yehuanten hual quinmilijque in lanahuatinijmes innojen lajtomes. ¹¹Huan ca yehuanten in lanahuatinijmes nesiaya quinami in sihuames amo quimatiloaya len quijtutataloaya, pampa inon amo quineltocaloaya. ¹²Ma yoje, moquetzac Pedro, molaluc pa in coyunquil, mopachuc quinmitac quinami in tzotzomajli cataya ihuían. Cuaquinon uyac Pedro ihuían, laijnamiquiaya pa quimatisquiaya len quinequiaya quijtú inon.

Yehuanten hual canajque ojli pa Emaús quitalo Jesús

(Mr. 16:12-13)

¹³Huan noje pan in tonali yahuiiloaya ome imonextilinijmes Jesús pa se caltilan tipichin itoca Emaús. Pa ajsilosquiaya nepa, nejnemilosquiaya

quinami once kilómetros pan in ojli hual quisac nepa Jerusalén.

¹⁴Yehuanten molaquetzilijtataloaya ca mochi innojen hual panujque.

¹⁵Huan cataloaya laquezatataloaya huan quijnamictataloaya mochi hual panuc, jan axcan hualaya inminahuac yihual Jesús capa yehuanten nejnentataloaya, pehuaya nejnemi ca yehuanten. Ma yoje, yehuanten amo quiximatiloaya Jesús, ¹⁶Dios quinchihuilic inmixtololojmes pa camo quislaculosquiaya. ¹⁷Huan Jesús quinmilic:

—¿Len inon hual anmolaquetzilijtía capa annejntía?

Cuaquín yehuanten moquetzajque, lachixtataloaya quinami quincocujtataya inminyolo. ¹⁸Se ca in omenten motocaya Cleopas quinanquilic, quilajlanic:

—¿Tehual tiunca se ca in míac judfos hual amo lacatije nican hual chanticate pa Jerusalén pa ticayas pa in fiesta huan amo ticmati innojen lachihualisli hual panuje pa Jerusalén pan in tonalijmes? Sinda amo ticmati, cuaquín tiunca in se san hual amo quimati.

¹⁹Huan Jesús quinmilic:

—Cuaquín, ¿len panuc?

Yehuanten quilijque:

—Unca in hual quipanuc Jesús in nazareteco. Yihual yec lacal hual lanextiliaya pampa yihual yec ilajtuni Dios. Yec se lajtuni hual quipiaya míac lahueliltilisli ca mochi len quichihuaya huan quijtuaya. Yoje quinextiliaya ilahueliltilisli ilaixpan Dios huan inminlaixpan moxtin lacames.

²⁰Ma yoje, totiopistas huejué huan yehuanten hual huelitli ca tehuanten quitemacaje pa in huelitini romano pa yihual latilanisquiaya pa yesquiaya lamictili, huan quipiluje pan se cuahuil.

²¹Huan tehuanten ticchixtataloaya pampa cataya yihual hual yesquiaya

in se hual yahuiaya laxlahui pa techquixtisquiaya moxtin tehuanten in israelitos pin toplehuilislí. Huan axan, ca mochi inon, quipía ye tonalijmes quiman quipanuc yihual inon. ²²Huan unca oc se lajto ca inon. Sequin sihuames ca tehuanten techmacajsije. Uyaje laxpoyahuíta pa in coyunquil capa quilalije in mijquil. ²³Amo quitaje in mijquil, quil. Ma yoje, techlamachilitihualaje pampa quinmitaje chicuenta lanahuatinijmes hual quisaje pin cielo hual quinmilije pampa yuliaya oc sejpa. ²⁴Cuaquinon yaje sequin lacames ca tehuanten pa in coyunquil, quitaje mochi jan quinami techilije in sihuames. Ma yoje, yihual amo quitaje.

²⁵Cuaquín Jesús quinmilic:

—Amhuanten, iquinami amo anquimati! Anhuejcahua pa anquineltocas mochi inon hual quijtunijme Dios ilajtunijmes.

²⁶Monequiaya pa panusquiaya in Cristo mochi inon, yoje laxlahuic pa mochi inminlajlaculislí in lacames pin lalticpan. Cuaquinon pampa inon Dios quichíac niman hué, yahui quipía in Cristo pa imajma cuali pa huelitli.

²⁷Huan pehuac quinmilic in hual quijcuiluc Moisés. Cuaquín quinmiliaya len quijtujque mochi oc sequin ilajtunijmes Dios. Quinmilic len quinequiaya quijtu mochi hual quijcuilujque pa quinmachiltilosquiaya in hual yahuiaya quipanu Cristo.

²⁸Huan quiman ajsijque pa in cali ca capic yajtiahuiloaya, yihual Jesús quichíac quinami yahuiaya nejnentía pa ca yojque. ²⁹Cuaquín yehuanten quilijque ca mochi inminyolo, quilijque:

—Ximosehui ca tehuanten, axan unca tiolac huan layuajtutihuala.

Yoje calaquic ca yehuanten pa mocahuasquiaya. ³⁰Huan cataya nepa molalijtataya pa lacuasquiaya ca yehuanten, yihual canac in pan,

quisehuic Dios, quilapanac in pan huan quinmacaya. ³¹ Cuaquinon Dios quinlapulic in omenten inmixtololojmes huan quiximatijque Jesús. Huan jan axcan yajmo nesiaya Jesús ca yehuanten. ³² Cuaquinon moilijque: —¿Amo ticpiaje míac paquilisli pa toyolo nepa pan ojli quiman yihual techmachiltitihualaya len quinequi quijtúa in hual unca lajcuiluli pa ilajtol Dios?

³³ Cuaquinon moquetzajque jan ajnaxcan, mocuetiquisaje pa Jerusalén huan quinmitajque in once lanahuatinijmes, cataloaya lanechiculi ca in oc sequin monextiliniijmes.

³⁴ Huan yehuanten quinmilijque in omenten:

—Neli yultica oc sejpa in Tata huan Simón quitac.

³⁵ Cuaquinon in omenten quinlamachiltijque len quinpanuaya pan in ojli pa Emaús, quinmachiltijque quinami quiximatijque Jesús quiman quilapanac in pan.

Jesús quinmonextilía imonextiliniijmes

(Mt. 28:16-20; Mr. 16:14-18; Jn. 20:19-23)

³⁶ Molaquetzilijtataloaya pa momachiltilosquiaya mochi inon huan yihual Jesús nestiquisac lajco ca yehuanten capa cataloaya, quinmilic: —Ma mosehui anmoyolo.

³⁷ Yehuanten momajtitiquisajque huan mocahuajque momajtiticate, quijtujque pampa quiztataloaya se lamajtini. ³⁸ Huan Jesús quinmilic: —¿Leca anyuyucatica? Huan ¿pa len anlajtutica yoje pa anmoyolo?

³⁹ Xichitilican nomajmajuan huan nocxihuajmes, huan xicmatican pampa nehual niyultica. Xichquitzaican huan xiquitacan, pampa anquimati se lamajtini amo quinpía nacal huan umimes quinami anquita pampa nehual niqunpía.

⁴⁰ Quinmilic inon, quinnexilic icxihuajmes huan imajmajuan. ⁴¹ Huan ayamo quineltoaloaya cataya Jesús pampa quipialoaya niman míac paquilisli huan pampa mocahualoaya quiztataloaya Jesús ca lamajtilisli. Huan Jesús quinmilic:

—¿Amo anquipía nican len pa nijcuas?

⁴² Cuaquinon quimacajque se lajco michin lahuatzali huan se xuchiyo néculi. ⁴³ Yihual canac huan quicuac inminlaixpan. ⁴⁴ Cuaquinon quinmilic: —Ayamo annimitzcahuac quiman annimitzlaquetziliaya in lajtomes pa annimitznextilisquiaya quinami monequiaya pa mochihuasquiaya mochi innojen lajtomes hual cate lajcuiluli pa ilajtol Dios hual quijtuc pan ipampa Moisés. Huan yoje quijtuc pa inminamames ilajtunijmes Dios huan pa iamal in cantaditas (cuicames) Salmos. Annimitzilic mochi in lajtomes hual cate lajcuiluli pa ilajtol Dios nonahuac nehual.

⁴⁵ Cuaquinon quinmachiltic len quinequilo quijtulo innojen lajtomes hual cate lajcuiluli pa ilajtol Dios.

⁴⁶ Huan quinmilic:

—Yoje unca lajcuiluli. Monequiaya pa nipanusquiaya míac lacocoltilisli nehual in Cristo, huan monequiaya pa nimiquis huan pa niyulis oc sejpa quiman panuje ye tonalijmes.

⁴⁷ Axan, pampa nicchíac mochi inon, in unca ilahueliltisli notoca. Ca in lahueliltisli, monequi pa anquinlamachiltis moxtin pin lalticpan pampa quipialo pa quipalasi inminyolo pa laijnamiquis quinami Dios quinequi. Yoje Dios huil quinpujpuhuilis inminlaijlaculisli. Xipehuacan xicchihuacan inon pa Jerusalén.

⁴⁸ Amhuanten anunca aquinojen hual anquitac panuje mochi inon hual nechpanuc. ⁴⁹ Huan xiquitacan. Nehual nía annimitztilanilía in se hual

noTajtzin neli quijtuc pampa yahuiaya
 anmitzmaca. Huan amhuanten,
 ximocahuacan nican pa Jerusalén.
 Amo huejcahuas ajsis in tonali quiman
 yihual anmitzmacas ilahueliltilisli
 yihual hual quisas pin cielo pa hualas
 ca amhuanten.

Jesús lejcúa pin cielo (ilhuicac)

(Mr. 16:19-20)

⁵⁰Cuaquín quinhuicac Jesús
 yehuanten capa cataloaya amo
 huejca pa quiahuac Betania.

Cuaquinon quinmajcoquic
 imajmajuan huan quitemachic Dios
 pa quinchihuilisquiaya cuali. ⁵¹Huan
 quiman cataya quilajlantataya Dios
 pa yehuanten, mohuicac lejcutataya
 pa pani pin cielo (ilhuicac).

⁵²Yehuanten quimolancuacuetzilijque,
 cuaquinon mocuepajque pa Jerusalén
 ca paquilisli niman hué. ⁵³Huan
 cataloaya mojmosta pin tiopan
 hué, quijtutataloaya lajtomes niman
 huejué huan cuajcuali pa Dios.
 Yojque ma ye.